

KOZIPOLAMA YA NZAMBE



Tótikala ndenge totelemi mwa moke wana togumbi mitó mpo na kobondela.

² Nkolo na biso na Ngolu, tozali mpenza na matondi lelo mpo na litomba oyo tozui ya kosangana awa nse liboso na Boyei na Nkolo. Tika ete tótala malamú mitema na biso lelo, na nzela ya Liloba na Yo, mpo tóyeba soki tozali kati na Kondima, mpo tókoka komilengela, mpo, na ntango ya Komonana na Ye. Tókóma ndenge Makomi elobi ete, “Tokonetwa elongo, ná baoyo balali, mpo na kokutana na Nkolo na mopepe, pe kozala na Ye libela.”

³ Totondi Yo mpo na Molimo ya Baklisto ya solosolo oyo ezali naino na mokili, elongo na bato, baoyo bazali naino kondimela Yo pe Liloba na Yo. Bongo tosengi mapamboli na Yo likolo na biso lelo, ete Ósopa likolo na moko moko na biso makambo oyo tosengeli na yango, ete tómwangisama na mai ya Liloba, pe tókoka kokóla pe tókóma bisalelo na maboko na Yo, mpo na ntango oyo ya suka. Mpo tosengi yango na Nkombo na Nkolo Yesu Klisto, Mobateli-mpate monene na biso, oyo tozali kozela komonisama. Amen.

Bokoki kofanda.

⁴ Nalingi koloba ete ezali lisusu mpo na ngai litómba monene ya kozala awa na ntongo oyo. Bólimbisa biso ndenge tozangi esika oyo ekoki mpo na kofandisa bato nyonso. Pe tokomeka, na mpokwa ya lelo, kobondela mpo na babeli; lelo, na ntongo oyo, ekozala mwa mpasi.

⁵ Pe—pe nalingaki kotia Liteya ya lelo na bande. Ngai . . . Emonanaki lokola Nkolo alingaki kolobela ngai na ntina na yango, oh, eleki sanza moko to mibale, pe ezali molai. Nazalaka na ntango mingi te libanda na mayangani, mpo topesaka miníti ntuku misato to ntuku minei na liteya. Na sima biso . . . Lokola bato basengeli kokende na mosala pe nyonso wana, namonaki ekozala malamú soki nayeisi Mateya na ngai mikuse. Pe kuna bazalaki mpenza na ntango te ya kotia yango na bande, bongo namilobelaki ete nakozela kino ntango nakokóma awa na mongombo mpo na kotia yango na bande awa. Ezali mwa molai, pe nayebi ete bozali ya kotelema, pe na—nakosala noki, na lombangu mpenza. Pe, sikawa, bokotungisa ngai te soki bozali kotikelana bisika ya kofanda, to nini lisusu, eko—ekotungisa ngai ata moke te, mpo lelo ezali mokolo ya ndenge mosusu, oyo tozali kosala ba-bande oyo.

⁶ Na bongo, tozuaki matatoli minene na makambo Nkolo asalaki kuna na elanga, kasi ntango mosusu tokolobela yango

mingi na mpokwa, wana tokopesa ntango molai mpo na yango, wana tokozala na ntango molai mpo na yango.

⁷ Pe sikawa tozali kolikia ete Nkolo akopambola moko moko na bino. Nayebi ete mitema na bino etondi na esengo, ezali bino kozela Boyei na Nkolo. Oyo ya ngai pe, ezali kopunja-punja, mpo na komona lolenge makambo mazali kosalema. Pe—pe bitumba kati na bikólo, pe lolenge lingomba ekómi, komona bilembo ya Boyei na Ye, na nzoto pe na molimo, pe koyeba ete ntango ya Komonana na Ye ebélémi mpenza, yango ezali kotondisa mitema na biso na esengo, koyeba ete tokobongwana moko na mikolo oyo. Tokobongwana, tokozala lisusu bikelamu oyo tozali te.

⁸ Sikawa, nabanzi, soki nasosoli, bazali na nzela moko ya telephone, esika Liteya oyo ezali koyokana kino na Phoenix pe na—pe na bisika ndenge na ndenge, na nzela ya telefóne. Na boye sikawa, tozali kolikia ete soki ezali bongo . . . nayebi te; elobamaki bongo liboso na ngai kokota. Pe—pe bato nyonso kuna bazali mpenza na nzoto kólóngónu pe—pe Nkembo na Nkolo ezali likolo na bango.

⁹ Pe sikawa—sikawa tokofungola Liloba ya Nkolo. Pe likambo biso nyonso toyeli awa, ezali kosepela pe kosala keba na oyo tozali . . . To—toyaka awa ata moke te mpo na kozala . . . Moto nyonso oyo azali awa ayebi ete moto moko te akoki kofanda na esika ya molunge boye, bobele mpo na kozala awa. Tozali awa bobele mpo na ntina moko, ezali mpo na “kotambola pene na Nzambe koleka.” Nyonso tokoki kosala, ezali kondima ete Nkolo Yesu azali elongo na biso. Pe tozali awa mpo na—mpo na kotambola pene na Ye koleka.

¹⁰ Sikawa molunge oyo ezali mwa makasi mpo na ngai. Nameseni moke na molunge ya kokauka ezalaka kuna na Tucson, oyo ezali . . . Molunge ya mai ya esika oyo; molunge na biso kuna eleki mpenza molunge oyo, kasi ekaúká. Mwa mai na mopepe na biso ezalaka mbala mosusu moko likolo na ntuku mibale na moko likolo na mokama, ntango mosusu, eloko moko ya ndenge wana, ezali lokola kobika na nse ya hema ya oxygène. Kasi awa ezali na mwa ma—ma—mai kati na yango, pe esalaka lokola komiyoka ete “pema esili yo,” ndenge tozaláká kobenga yango. Bongo ezali mpasi mpo na bino, pe nayebi yango, ná bino ba-mama oyo bozali na bana mike pe bino baoyo botelemi, mibange ná bilenge, pe botiami elongo esika moko. Na bongo tozali—tozali kolikia ete Nzambe akozongisela bino ya mingi mpo na komipesa mbeka na bino.

¹¹ Nasosoli ete Ndeko Roy Borders azali awa esika moko. Nayokaki ndenge balobaki mpo na ye, kasi nabanzi ntango mosusu akokaki kokota te. Malamu. Azali monyangeli ya mayangani.

¹² Na bongo, sikawa tolingi pe koyebisa bino ete moto moko oyo azaláká kati na biso auti kokende epai na Nkolo na ntongo ya

lelo, moto yango ezali Ndeko Jackson, ya Sturgis, na Michigan. Moto moko te ayebi ndenge akei to likambo ekómeli ye. Azalaki na ye malamumu, pe bobele. . . Nakanisi bakutaki ye asili kokufa, to likambo ya bongo. Na—nayoki yango na bolai te. Pe tozali kozongisa matondi mingi na Nzambe ndenge Ndeko Jackson azalaki Moklisto. Eleki mibu ebele oyo namonanaki na ye te, kasi afandaki elongo na biso pe azalaki moko na biso. Nzambe ápesa kimia na molimo na ye ya motuya! Kokende lolenge wana, tondimi ete, ntango mosusu ezalaki eloko moko, ete ezalaki ntango na ye ya kokende. Nkolo ayebisaki biso yango liboso ata moke te, to ye moko, akei se boye. Esalemaki ndenge wana. Pe nakobenga mwasi na ye noki mpenza, mpo na kotalisa ye mawa na biso. Pe biso nyonso tolingi kozongisa matondi na Nzambe mpo na bomoi na ye malamumu lokola Moklisto, pe nyonso ye asalaki awa na mokili, koleka mingi mpo na biso awa na losambo oyo.

¹³ Sikawa na mpokwa ya lelo, nalobaki ete ekozala mabondeli mpo na babeli na mpokwa oyo, pe nakoloba mingi na ntina na babeli na mpokwa oyo.

¹⁴ Kasi mpo na ntango oyo, tókota mbala moko na Liloba sikawa, mpo bato baleki mingi ná molunge. Tokokende mbala moko na Liloba. Nalingi kotánga biteni mibale ya Makomi na ntongo oyo, ezali molai, mpo épesa ngai mwa mobóko na makambo nalingi koloba.

¹⁵ Pe, sikawa, nalingi ete bábimisa naino bande yango te, Ndeko Sothmann ná bamosusu, liboso ya kotéka yango, soki ekokoka, na—nalingi koyoka yango liboso tó. . . liboso ébima mpo na bato nyonso.

¹⁶ Sikawa na. . . Nalingi kotánga na Bafilipi, mokapo ya 2, 1 kino 8; pe na Bakolinti ya Mibale mokapo ya 3, kobanda eteni ya 6, pe tokotánga kino na mokapo ya 4 ya Bakolinti ya Mibale, bobele lokola mobóko. Sikawa, nakotánga liboso na Bafilipi, mokapo ya 2.

Liboso ya kotánga, tóbondela.

¹⁷ Nkolo Yesu, Liloba na Yo ezali Solo. Pe na ntango ya mobulu oyo tozali kobika na yango, ekólo kotelemela ekólo, maládi mabe, koningana ya mabelé bisika ndenge na ndenge, mitema na bato kosézwawa, nsomo, tozali komona loboko kokomá na etutú. Sikawa, yango ezali na ngámbo ya mokili, ete mokili mobimba ékoka komona yango. Kasi sikawa, ezali pe na ngámbo ya molimo, tozali komona makambo minene kosalema, pe tolingi kolobela yango lelo.

¹⁸ Pambola Liloba na Yo na mitema na biso. Toyebi ete ata moto moko te na Likolo to na mokili azali na makoki ya kozua Buku oyo, kofungola Bilembo, to, ata, kotala Yango. Kasi Moko amonanaki, Mwana-Mpate oyo abomamaki, kotanga makila, ayaki pe azuaki Buku, abongaki pe azalaki na makoki ya

kofungola Yango. E Mwana-Mpate ya Nzambe, fungola Liloba na Yo na mitema na biso lelo, mpo tóbondisama. Tozali basali na Yo. Limbisa masumu na biso, Nkolo. Pe nyonso oyo ekoki kopekisa Liloba kopesama na nguya monene pe kobenda bato lelo, longola yango, Nkolo, epekiselo nyonso, mpo tókoka kozua mapamboli nyonso elakámeláki biso na Liloba na Yo. Tosengi yango na Nkombo na Yesu. Amen.

¹⁹ Bafilipi 2.

Boye soki elendiseli kati na Klisto ezali, soki libondisi ya bolingo ezali, soki boyokani ya Molimo ezali, soki bokaboli mawa ezali,

Bótondisa esengo na ngai, ete bózala na likanisi moko, bózala na bolingo moko, bózala na bomoko na molimo, na—na likanisi moko mpenza.

Bósala eloko moko te na kowelana to mpo bozali komimona ete boleki bamosusu; kasi na komikitisa bómona ete bamosusu baleki bino.

Moto na moto átala bobele na makambo na ye moko te, kasi makambo na bamosusu lokola.

Bókanisa na kati na bino makanisi oyo Yesu Klisto azalaki na yango,

Oyo, atako azalaki na lolenge ya Nzambe, atalaki kokokana na Nzambe lokola eloko ya kobotola te,

Kasi amiyeisaki mpamba, azuaki lolenge ya moombo, akómaki lokola moto;

Ntango akómaki na lolenge ya moto, amikitisaki pe atosaki kino na kufa, ee, kino kufa na ekulusu.

²⁰ Sikawa, soki tokoki kofungola sikawa Bakolinti ya Mibale, mokapo ya 3, tokobanda na molongo ya 6, pe tokotánga kino na eteni ya 18, ná eteni ndambo ya mokapo ya 4.

Abongisi biso mpo na kozala basali ya kondimana ya sika, ya mibeko oyo ekomami te, kasi ya molimo; mpo mibeko oyo ekomami ebomaka, kasi molimo epesaka bomoi.

Lisusu, soki mosala ya kufa, oyo ekomami na mabanga, eyaki na nkembo, na lolenge ete bana ya Yisalaele bakokaki kotala elongi ya Mose te, mpo na nkembo ya elongi na ye, atako nkembo yango esengelaki koleka,

Mpo na nini mosala ya molimo ézala na nkembo mingi koleka te?

Mpo soki mosala ya bikweli ezalaki na nkembo, mosala ya boyengebene eleki na nkembo mingi.

Mpo ete eloko ezalaki na nkembo ezangi nkembo liboso na nkembo mosusu oyo eleki yango.

Mpo soki eloko oyo esengelaki koleka ezalaki na nkembo, nde...oyo ezali koumela ezali na nkembo mingi koleka.

Na yango, lokola tozali na elikia oyo, tosengeli mpenza...tozali koloba polele mpenza pe na bosembo,

Pe tozali kosala te lokola Mose, oyo azalaki kozipa elongi na ye, mpo bana ya Yisalaele bátala na bokebi te suka ya eloko oyo eleká.

Kasi makanisi na bango elembaki. Mpo ete kino lelo oyo, ezipelo yango ezali kaka, ntango batángaka Kondimana na Kala, elongwe te, mpo elongolami nde na nzela na Klisto.

Kino lelo oyo, ntango batángaka Mose, ezipelo ezali na mitema na bango.

Kasi soki moto abongwani epai na Nkolo, ezipelo yango ekolongwa.

Nzokande Nkolo azali Molimo: pe esika Molimo ya Nkolo...bonsomi ezali wana.

Biso nyonso, na bilongi oyo ezipolami, tozali kongengisa nkembo ya Nkolo lokola talatála, tobongwani kino na elilingi na ye longwa na nkembo kino na nkembo, oyo euti na Nkolo, ye Molimo.

Yango wana, lokola tozali na mosala oyo, kokokana na mawa oyo tozui, tozali kotika te;

Tosili koboya makambo ya kobombama pe oyo ya nsoni, tozali kotambola na mayele mabe te, tozali pe kobebisa liloba na Nzambe te; kasi na nzela na kosakola makambo ya sembo polele, tozali komeka komisembola epai na lisosoli ya moto na moto liboso na Nzambe.

Soki Nsango Malamu na biso ezipami, ezipami nde epai na baoyo bazali kokufa:

²¹ Tika ete Nkolo ábakisa mapamboli na Ye na kotánga Liloba na Ye!

²² Sikawa, liteya na ngai ya ntongo oyo, nandimi mpenza ete Nzambe akomonisa likambo oyo. Pe ntango nyonso, soki bino baoyo bozuaka ba-bande mpo na koyoka yango, nazali kolikia pe nandimi mpenza ete—ete bozali na lisosoli ya molimo na makambo Nzambe azali koluka kotalisa na Lingomba kozanga koloba yango polele. Bomoni? Ezali likambo oyo, mbala mosusu, tosengeli koloba makambo na lolenge oyo ekoki kopanza makita, ekoki kobimisa kobimisa bamosusu libanda, bamosusu kokende, pe bamosusu ko—ko—kokanisa malamu. Kasi esalemaka bobele na nko. Esengeli kosalema ndenge wana.

23 Na bongo ekoki kosalema ete bamosusu bakoloba: “Olingi koloba ete Nzambe akoki kosala likambo ya boye na nko?” Asalaki yango mpenza mpenza. Azali kokoba kosala yango.

24 Alobaki mokolo moko, ntango Azalaki na nkoto-na-nkoto na bato zonga-zonga na Ye, Alobaki: “Soki bolei Mosuni ya Mwana na Nzambe te, to ya Mwana na moto te, pe bomeli Makila na Ye te, bozali pe na Bomoi kati na bino te.”

25 Maloba ya ndenge nini bokanisi ete monganga to infirmière, to moto ya mayele mingi, akoki kokanisa na maloba ya boye, kouta na Moto oyo azalaki na lotomo lokola Ye? Tala, akoloba: “Kolia mosuni? Ezali kozala molei-mosuni-ya-bato! Komela makila ya moto? Ezali kozala! Na elobeli mosusu, Alingi kokómisa biso balei-mosuni-ya-bato ná bameli-makila-ya-bato.” Pe bato nyonso ya eyanganelo batikaki Ye.

26 Ezalaki pe na lisanga moko ya batei elongo na Ye, ntuku nsambo, oyo baponamaki. Abongwanaki epai na bango, pe Alobaki: “Bokokanisa nini ntango bokomona Mwana na moto komata esika Ye aútáki?” Sikawa, Alimbolaki yango te. Alimbolaki te *ndenge nini*; Polo alimbolaki yango na sima. Alobaki Yango bobele koloba. Bomoni? Bongo ntango, Alobaki: “Bokoloba nini”, na batei yango, “ntango bokomona Mwana na moto komata esika Aútáki?”

27 Na ntembe te bato yango balobaki: “Sikawa, zela naino. Oh, toliaka elongo na Ye. Tolóboko mbisi elongo na Ye. Toláláka elongo na Ye. To—toyebi esika Abotámáki. Tomonaki mbeto ya bomwana oyo batiaki Ye—Ye kati na yango. Bongo ndenge nini Mobali oyo . . . Liloba oyo ezali makasi.”

28 Pe Biblia elobi: “Batambolaki lisusu elongo na Ye te.” Batikaki Ye.

29 Bongo Atikalaki na zomi na mibale. Aponaki zomi na mibale, pe moko na bango azalaki molimo mabe, Alobaki bongo. Na bongo abongwanaki epai na bango.

Pe ata moko na bango te akokaki kolimbola likambo Autaki koloba. “Ndenge nini bakolia Mosuni na Ye pe komela Makila na Ye? Pe ndenge nini Akitaki, ntango oyo Abotamaki awa na mokili oyo?” Bomoni? Bakokaki kososola Yango te.

Na sima Abongwanaki epai na bantoma, pe Alobaki: “Bino pe bolingi nde kokende?”

30 Pe ezali ntango yango nde Ntoma Petelo alobaki maloba ya motuya oyo: “Nkolo, tokokende epai ya nani?” Bomoni? “Mpo tosili kondima. Toyebi na bósólo ete Yo, pe bobele Yo, nde ozali na Liloba ya Bomoi ya eleko oyo.” Bomoni? “Pe tondimisami na yango.” Bomoni, bakokaki kolimbola Yango te. Bango . . .

Bokoki kolimbola kondima te. Ezali eloko oyo moto andimi, pe etelemi mpenza ngwi pe eloko mosusu te ekoki kozua esika na yango.

Boye, bayebaki ete Liloba oyo ekomamaki mpo na eleko yango oyo bazalaki kobikela, eleko-ya-Masiya, pe Ye moto akokaki na esika yango. Bongo bakokaki kosala nini, kozonga na mangomba ya malili, ya momesano oyo babimaki na yango? Balobaki: “Tokokende wapi?” Bomoni? “Tondimisami mpenza ete Yo ozali na Liloba ya Bomoi.” Bomoni? Ba—bakokaki kolimbola Yango te, kasi bandimaki Yango. Bomoni?

³¹ Yesu alobaki bongo mpo na kokitisa motango ya bato na Ye, bomoni, mpo Ákoka kosangisa etonga. Pe kati na bato nyonso wana, bango, bobele bato zomi na moko kati na bango nde basolaki mpenza Nani Ye azalaki. Bayebaki ete Azalaki Nzambe, Nzambe se moko. Sikawa . . .

³² Liteya na ngai na ntongo oyo ezali mpo na komonisa, to kozipola Nzambe yango.

³³ Nzambe amibombaka ntango nyonso, na bileko nyonso, sima na ezipelo, na bileko nyonso, kasi Azali ntango nyonso Nzambe. Bomoni? Kasi Amibombaka mpo na mokili, pe Amimonisaka na Baponami na Ye, lokola bantoma na eleko wana. Nzokande, ezalaki Nzambe koloba kati na Klisto.

³⁴ Sikawa, ntango nyonso moto, ezalaka lolenge ya moto, alukaka komona (na nzoto mpenza) Nzambe yango. Azalaka ntango nyonso na mposa ya komona Ye. Moto asalaka bikelamu oyo ezali lokola Ye. Bakanisaka na . . . Ba—Indien bazalaki kosambela moi. Pe—pe tomoni, na Afrika, banyama ya ndenge na ndenge, pe bongo na bongo. Pe kuna na . . . bililingi oyo eyemamá na makonzi kuna na Alaska, pe—pe makambo ndenge na ndenge oyo bakanisaka ete Nzambe azali kati na yango. Ndenge Polo alobaki yango kuna na Athènes na eleko wana, na Aelopaji, pe alobaki na bango ete bazalaki bato na kobanza-banza na ntina na Nzambe oyo ayebani te, bayebaki ete Azali wana kasi bayebaki Ye te.

³⁵ Na bongo tomoni ata na ntango eleki ya Yobo. Yobo ayebaki ete Nzambe moko azali. Ayebaki yango. Pe mo—mo—moto ata moko te, na mayele na ye nyonso, azangi koyeba ete Eloko moko esengeli kozala esika moko. Na bongo, Yobo azalaki na mposa ya kosolola na Ye.

Pe nalingi ete bótala malamumu lolenge nini Nzambe aponaki mpo na kosolola na Yobo. Nzambe azipamaki ntango asololaki na Yobo. Azipamaki kati na ekumbaki, Akitaki kati na ekumbaki. Bondimi ete Nzambe ayaka kino lelo kati na ekumbaki oyo ekoki koya esika bozali komona? [Losambo balobi: “Amen.”—N.D.E.]

³⁶ Ezali na bato mingi bafandi awa, bazali mwa mingi, baoyo bazalaki elongo na biso mokolo mosusu ntango Ayaki kati na ekumbaki. Ayebisaki biso mokolo moko liboso, Ndeko Banks Wood ná bamosusu, ntango Alobaki: “Lokota libanga oyo, bwaka yango likolo, pe loba: ‘YANGO ELOBI NKOLO!’

Bokomona yango kala mingi te.” Pe nalokotaki libanga yango, na sɔngé ya ngomba, nabwakaki yango likolo, pe. . . na ntembe te, ntango ekitaki na nse, ebandisaki ekumbaki, bomoni, ezalaki kobenda mopepe.

³⁷ Esengeli na yo kosala likambo moko mpo likambo mosusu élanda yango. Yesu azuaki eteni ya lipa pe abukaki yango, na sima ayikanisaki yango longwa na eteni ya lipa wana. Azuaki mai, asopaki yango kati na mbeki. Eliya azuaki mungwa, atiaki yango kati na sani; abukaki etape ya nzete, abwakaki yango likolo na mai. Ezali eloko moko kotalisa elembo.

Pe nalokotaki libanga yango pe nabwakaki yango likolo, kokita na yango ebandisaki ekumbaki.

³⁸ Na mokolo elandaki, ee, motei moko azalaki elongo na biso na mobembo ya bokila. Azalaki pembeni na ngai, pe alobaki na ngai: “Nkolo apesaka mamono libanda, na bisika ya boye, Ndeko Branham?”

³⁹ Nalobaki: “Iyo, kasi mbala mingi nayaka awa mpo na kopema.” Pe mbala moko emononeli eyaki.

⁴⁰ Pe Ndeko Borders, nakanisi azali libanda sikawa, azalaki wana. Ndeko Banks Wood, nakanisi, ná, oh, ebele na bato bazalaki kuna, mwambe to zomi. Pe Ndeko Banks Wood azalaki kolandela yango. Likolo na ngomba mpenza, na ngámbo mosusu ya, mpenza, pene na ntaka ya mètèrè nkama mwambe kolongwa esika Banje nsambo bamonanaki, na ntina na yango nde nalongwaki awa mpo na kokende kuna, nazongaki pe nasololaki. . . likolo na Bilembo Nsambo. Bobele pene na mètèrè nkama mwambe longwa esika yango.

⁴¹ Bongo na mokolo elandaki, ntango likambo oyo elingaki kosalema, ee. . . Nalobaki na ndeko, ndeko yango, nalobaki: “Likambo na yo, ezali ete ozali na allergie na liso na yo. Na mibu mibale to misato oyo, minganga bamekaki kosalisa yango kasi bakokaki te. Balobi ete oko. . . ekoboma liso na yo.” Pe nalobaki: “Kasi komitungisa te, Nkolo Yesu asepeti na kondima na yo.” Pe atikaki bondóki na ye na nse. Pe nalobaki: “mama na yo,” nani ye azalaki pe mpasi azalaki na yango.

Pe alobaki: “Ezali solo.”

⁴² Ndeko Roy Roberson ya losambo oyo, azalaki wana, nabanzi bino nyonso boyebi ye. Lokola azalaki soda ya kalakala, pe nayebaki likambo elingaki kosalema, nasimbaki ye na lipeka; nalobaki: “Ndeko Roberson, zala na ekéngé, keba, likambo moko elingi kosalema.”

⁴³ Nazongaki esika oyo nasengelaki kotelema, pe ekumbaki eyaki longwa na mopepe, ekitaki pe elekaki na lobwakú moko ya bozindo, longwa likolo, ezalaki monene mingi kino epasolaki mabanga, na bozindo ya centimètèrè ntuku mibale to ntuku mibale na mitano, na sɔngé ya ngomba, pe ebwakaki yango na

ntaka ya mètre nkama mibale. Esalaki makelele makasi mbala misato boye, pe Mongongo ebimaki uta na yango. Bomoni?

44 Pe bango nyonso bazalaki wana. Ndeko Banks, azali awa sikawa, apusanaki pe alobaki: “Likambo oyo nde oyebisaki ngai lobi yango?”

Nalobaki: “Iyo, misie, ezali yango.”

Alobaki: “Bongo, Elobi nini?”

45 Nalobaki: “Bobele ngai moko nde nasengeli koyeba yango, Ndeko Banks, omoni, mpo ezalaki. . . Ekoki kobangisa bato.”

46 Kasi Ekobaki kokende, esalemaki bobele mwa. . . ekendeki ngambo ya nordi. Mwa moke, sima na mikolo moke, Ebetaki mai na mbu, pe bomonaki likambo nini esalemaki na etuka ya Fairbanks. Ezalaki elembo ya kosambisama. Sikawa tomoni ete—ete Nzambe azali naino. . . Bomoni, elingaki kopesa bato nsomo. Na bongo bazalaki na. . . Esengelaki kosalema, bomoni. Esengeli mpenza kosalema. Makambo masengeli kosalema, esengeli kosalema, ata ndenge nini. Bomoni, ekosalema, ata ndenge nini.

47 Mokolo moko, Mose azalaki na mposa ya komona Nzambe, pe Nzambe ayebisaki ye ete átelema likolo na libanga. Pe, likolo na libanga, Mose atelemaki pe amonaki Nzambe koleka, pe mokongo na Ye ezalaki lokola mokongo ya moto. Nzambe azalaki kati na ekumbaki, pe Nzambe. . . wana Mose atelemaki likolo na libanga.

48 Nabanzi ete bino nyonso bomonaki fotó yango kuna mokolo wana, totelemaki pembeni na libanga yango moko. Pe Pole yango ezali wana, Mwanje na Nkolo, esika oyo Epasukaki mpenza. Etiami. . . Ezali naino kuna na etánda oyo totiaka mayebisi, sikawa.

49 Botala, Yahwe ya Kondimana na Kala azali Yesu na Kondimana ya Sika. Bomoni? Azali Nzambe yango moko, azali bobele kobongola lolenge na Ye.

50 Sikawa, moto moko alobaki mokolo mosusu, mo—mo—motei ya ba-Batiste kuna na Tucson: “Ndenge nini okoki koloba ete—ete Yesu ná Nzambe bazali bobele Moto moko?”

51 Nalobaki: “Ee, ezali mpenza pete soki okoki kotia pembeni lisosoli na yo moko, mpo na kososola elobeli ya Biblia. Bazali bobele Mozali moko. Nzambe azali Molimo; Yesu azali nzoto oyo Ye azipamaki na kati. Bomoni?” Nalobaki: “Ndakisa, na libota na ngai. Mpo na mwasi na ngai, nazali mobali na ye. Pe nazali na elenge ya mwasi, Rebeka, nazali tata na ye. Pe nazali na nkoko ya mobali, nkombo na ye Polo, nazali nkoko na ye. Nazali mobali, tata pe nkoko. Mwasi na ngai azali na ndingisa moko te likolo na ngai lokola tata to nkoko; azali na ndingisa likolo na ngai bobele lokola mobali. Pe mwana na ngai ya mwasi azali na makoki moko te likolo na ngai lokola mobali to nkoko; azali mwana na

ngai. Bomoni? Ata bongo bato nyonso misato oyo bazali bobele moto moko. Bomoni? Ezali Nzambe; Tata, Mwana, pe Molimo Mosanto, ezali bobele ndingisa ya eleko ya mosala.” Nzambe azali ndenge moko, Nzambe moko.

⁵² Nzambe Amibongolaki, abongolaki lolenge na Ye. Soki botali malamumu awa na Bafilipi, Alobaki: “Atalaki yango lokola eloko ya kobotola te, kasi azuaki *lolenge* ya moto.”

⁵³ Sikawa, na lokóta ya Greki, liloba oyo *lolenge*, mokolo mobimba ya lobi nazalaki kotala yango, koluka kososola yango, namonaki, nakómaki na liloba oyo “en morphe”. Ebengamaka e-n m-o-r-p-h-e. Nalukaki na lokóta ya Greki, mpo na komona ndimbola ya en morphe . . . Nakoki ntsngo mosusu koloba yango malamumu te, yango nde ntina nalobelaki yango moko moko, ezali mpo soki bande yango ebimi, bato, bato ya mayele mingi, bakososola likambo na—nalingi kolobela. Ye, ntango en morphe, elingi koloba ete Amibongolaki. Ye, Ye akitaki na nse. Sikawa, na lokóta ya Greki, yango elingi koloba ete “Eloko oyo ekokaki komonana te, kasi ezali wana, na sima ebongwani pe liso ekómi komona yango”. Bomoni?

⁵⁴ Lokola Eliya, na Dothan. Bomoni, mo—mosali akokaki komona Banje nyonso oyo bazalaki zonga-zonga, pe Nzambe abongolaki; Akitisaki Banje te, kasi Abongolaki emoneli ya mosali. Pe ba-ngomba etondaki na Banje, ná móto, pe bampunda ya móto, ná makálo ya móto, zonga-zonga na mosakoli na Ye. Bomoni, bango, Abongolaki emoneli. E—eloko yango ezalaki na yango wana.

⁵⁵ Na bongo, likambo nazali koluka koloba ezali ete Nzambe, oyo azaláká ntango nyonso, azali awa. Likambo bobele moko oyo Asalaki ntango Akómaki moto, ezali ete Abongolaki ezipelo na Ye. Bomoni? Ye—Ye, oyo nde en morphe, A—Amibongolaki, na oyo Azalaki kino na oyo Azali, to ezipelo na Ye, lisano mosusu.

⁵⁶ Ndakisa, na lisano ya théâtre. Ndenge nazalaki koloba na ntongo ya lolo, nazalaki kotalisa, lisolo ya Shakespeare. Eleki ntango molai mpenza. Kasi ntango Shakespeare akomaki lisano ya thé—thé—théâtre yango. . . mpo na Mokonzi Jacques ya Angleterre, ntango a . . . ezaleli ya Macbeth. Bomoni, Shakespeare azalaki kondima bandoki te; kasi kati na lisano, lokola mokonzi azalaki kondima bandoki, na bongo, na lisano yango, asengelaki kokotisa bandoki. Bomoni? Bongo, mpo na kosala yango, babongolaki misala.

⁵⁷ Becky, awa, na lisano ya *Carmen*, basalaki yango na—na eteyelo epai auti kozua diplome ba-mposo oyo eleki. Sikawa, moto moko akokaki kosala lisano ya bato misato to minei. Mpo na kosala yango, a—azalaki kobongola bizipelo. Na mbala oyo, azali moto *songolo*; na mbala ya sima ntango abimi, akómi moto mosusu. Kasi ezali bobele moto yango moko ntango nyonso.

⁵⁸ Yango nde Nzambe. Amibongolaki longwa—longwa na Likonzi na Mótó, mpo na kokóma Moto. Na sima Amibongolaki longwa na yango, mpo na kozonga na lolenge ya Molimo, mpo Ákoka kofanda kati na moto. Nzambe, kosala kati na moto, oyo Ye azalaki. Yesu Klisto, azalaki Nzambe kosala kati na Moto, kati na Moto *moko*. Kati na Moto moko, yango nde Azalaki. Abongwanaki longwa na Likonzi na Mótó, na sima Akótáki na kati; yango nde ezipelo oyo ezalaki na biliki, oyo ezipaki Nzambe na miso ya Yisalaele. Mose amonaki lolenge ya nzoto na Ye, kasi na bosóló, Azalaki ntango nyonso komibomba sima na Likonzi na Mótó, yango ezalaki Logos oyo eutaki na Nzambe.

⁵⁹ Sikawa tomoni awa ete kobanda na Pantekote, Nzambe azali kosala *kati na moto* te, to kosala . . . sikawa Azali kosala *na nzela ya moto*. Bomoni? Na ntango wana Azalaki kosala *kati na Moto*, Yesu. Sikawa Azali kosala *na nzela na moto* oyo Aponáki mpo na ntina oyo. Nzambe, na lolenge ya moto, Amibongolaki longwa na lolenge ya—ya . . . ya Nzambe, kino na lolenge ya moto.

⁶⁰ Ayaki na nkombo misato, na nkombo misato ya mwana. Ayaki na Mwana . . . nkombo ya Mwana na—na moto, Mwana na Dawidi, pe Mwana na Nzambe; nkombo misato ya mwana.

⁶¹ Sikawa, Ayaki liboso na Mwana na Da-. . . Mwana na moto, mpo Azalaki Mosakoli. Sikawa, Yawe Ye moko abengaki Ezekiele ná basakoli, “mwana na moto, ozali komona nini?” Yesu amibengaki Mwana na Nzambe moko moko te; Amibengaki Mwana na moto, mpo ma—Makomi ekoki kobukama te.

Eloko ata moko te ekoki kobukama kati na Makomi. Liloba moko na moko esengeli kozala bongo. Ngai nandimaka yango ndenge wana. Esengeli kozala nde ndenge wana, ezali te mpo nandimaka yango, kasi mpo Ezali Liloba na Nzambe.

⁶² Sikawa soki botali na ebandeli, Liloba moko, na lokasa ya liboso na Biblia, na Genese 1, tomoni ete nyonso. . . Bokono nyonso, mpasi nyonso, mpasi nyonso ya mitema, pe makambo nyonso oyo esilá kokómela bato, esalemaki mpo moto *moko* azangaki kondima Liloba *moko*, yango nde ebotaki makambo nyonso oyo. Ezali na ebandeli ya Biblia. Na suka ya Biblia, Emoniseli 22, Nzambe yango moko alobi: “Moto nyonso akolongola Liloba moko na Yango, to akobakisa liloba moko likolo na Yango.” Bomoni, esengeli kozala Liloba likolo na Liloba, bobele ndenge Ezali.

⁶³ Bongo, yango wana, pe bozua, ndakisa, eloko moke oyo ngai. . . moto moko alandelaka ngai ntango nyonso mpo na likambo ya basi oyo bakataka suki na bango. Sikawa, mpo na ngai, ntango nyonso oyo azali kosala bongo, ata azali mosanto ndenge nini, pe ata azali na boyebi ndenge nini, azali bobele na libunga. Alataka ba-kupé ná bilamba ya ndenge wana; ata asalaka nini, ata ayembaka ndenge nini, ata ateyaka malamu ndenge nini, ata akoki kosala likambo nini, ata abikaka bomoi

ya ndenge nini, ata bongo, ezali bobele Liloba moko wana nde ebukani. Bomoni? Bomoni, esengeli kozala Liloba moko na moko. Lisakola te; Liloba, Liloba moko! Boye, Biblia ezali ndimbola ya moto moko te. Esengeli kozala Liloba likolo na Liloba, lolenge Ekomámi. Tosengeli kondima Yango.

⁶⁴ Pe bobele kondima Yango te, kasi kobikela Yango. Soki tobikeli Yango te, boye tondimi Yango te; tolobi Yango bobele na maloba. Ndenge ngai... Kokokana na oyo nalobaki, ete bayekoli bakokaki kolimbola Yango te, kasi bandimaki Yango, ata bongo, pe bazalaki kotatola yango pe kobikela yango. Ntango bato mosusu nyonso batangwaki mosika na Yango, bango bakangamaki na Yango! Bandimaki Yango! Ezali bongo nde tozali kosala. Ezali bongo nde bosengeli kosala. Ata moto mosusu asali nini, biso tondimi Yango pe, na sima, tosaleli Yango. Soki bosali bongo te, boye bondimi Yango te.

⁶⁵ Sikawa botala, sikawa, ntango Ayaki, Asengelaki koya lokola Mwana na moto, mpo Makomi Mosanto elobaki ete Ye, “Nzambe akopesa bango Mosakoli”. Na bongo Akokaki Komibenga Mwana na Nzambe te ntango Ayaki, mpo ezalaki eleko ya mosala yango te. Azalaki Mwana na moto, azalaki kosakola, mpo na kokokisa, pe azalaki komonisela bango makambo nyonso oyo esilaki kosalema, pe ezalaki kotalisa nani Ye azalaki. Bongo, Azalaki na mokili lokola Mwana na moto.

⁶⁶ Botala mwasi wana ya mboka Silofenisia, oyo ayaki mbangu liboso na Ye, alobaki: “Mwana na Dawidi, yokela ngai mawa!” Atombolaki motó na Ye ata moke te. Azalaki na ndingisa moko te likolo na Ye lokola Mwana na Dawidi. Azalaki moto ya Mabota.

Lokola pe mwana na ngai ya mwasi azali na ndingisa moko te likolo na ngai lokola mobali; to mwasi na ngai, lokola mwana na ngai ya mwasi. Ata bongo, azali mwana na ngai pe mwasi na ngai, azali mwana na ngai na Nsango-Malamu. Kasi, na ndenge ya mokili, azali na ndingisa te ya kobenga ngai ta-tata. Bomoni?

Sikawa botala, mwasi ya Mabota oyo azalaki na ndingisa moko te likolo na Ye lokola Mwana na Dawidi. Kasi mokufi-miso Balatimai azalaki na yango, bomoni, azalaki Moyuda. Bongo, Ayaki lokola Mwana na moto.

⁶⁷ Bosengeli koyeba maloba oyo pe makambo oyo. Botala Hattie Wright, ntango wana, na ntango ya Kobendama ya Misato. Bomikaniseli yango. Kati na makambo nyonso, mwasi yango alobaki likambo esengelaki. Bosengeli koloba liloba oyo esengeli, likambo esengeli epai na Nzambe.

⁶⁸ Botala sikawa, Ayaki liboso lokola Mosakoli, pe babakaki Ye na ekulusu. Bato na Ye moko babakaki Ye na ekulusu. Ayaki lokola Mwana na moto.

⁶⁹ Pe na sima na koya ya Molimo Mosanto, bongo Akómaki Mwana na Nzambe. Nzambe azali Molimo. Azalaki Molimo

Mosanto, Mwana na Nzambe. Abikaki kati na bileko na lingomba lokola Mwana na Nzambe.

⁷⁰ Sikawa, na Bileko-Nkoto, Akozala Mwana na Dawidi, akofanda na Ngwende ya tata na Ye, Dawidi. Akozala Mwana na Dawidi, na ntango wana.

⁷¹ Pe, bomikasela, kati na Mwana na Nzambe. . . Na eleko ya lingomba ya Laodikia, babimisaki Ye libanda. Pe na Luka, Alobaki ete Akomonisama lisusu lokola Mwana na moto, Mosakoli, mpo na kokokisa oyo etikalaki. Bomoni? Makomi etambolaka elongo malamau mpenza. Mwana na moto, Mwana na Nzambe, Mwana na Dawidi. Ezalaki nini? Ezali Nzambe yango moko ntango nyonso, kobongola se lolenge na Ye, en morphe. Azali se kobongola yango. Mpo na Ye, ezali lisano ya theatre monene. Azali kosala mosala yango.

⁷² Ayaki lokola Mwana na moto, Mosakoli. Asalaki mpenza bongo. Ata mwasi wana kati na masumu na ye nyonso, kuna na libulu ya mai, ayebaki Ye. Alobaki: “Toyebi ete Masiya akoya, oyo babengaka Klisto, yango makambo Akosala.” Bomoni, asosolaki mpo azalaki Momboto oyo eponámá. Na bongo ye. . .

Kasi bato mosusu basosolaki Ye te. Bazalaki na eloko moko te mpo na kososolisa bango. Mpo na kobanda, bazalaki kati na masumu.

⁷³ Mpo—mpo na misala na Ye, Abongolaka lolenge na Ye. Na sima Ayaki na lolenge ya Mwana na moto.

Mpo na eleko ya ba-reformateur, Wesley, Luther, pe bango nyonso mosusu, bongo tomoni ete babulunganisaki yango mingi, bobele lokola bana ya Yisalaele basalaki, kino ntango Amimonisi mpenza na ntango ya suka, na eleko ya ba-Pantekotiste, lokola Molimo Mosanto, baboyaki Yango. Basalaki makambo ndenge moko na Yisalaele.

Pe sikawa Asali nini? Azongi lokola Mwana na moto. Na sima, longwa na yango, Mwana na Dawidi. Bomoni ndenge tokómi pene? Mwana na moto, Mwana na Dawidi, Mwana na Nzambe. Amimonisi na mikolo ya suka lokola Mwana na moto, kokokana na Malaki 4, pe bisakoli mosusu nyonso oyo etali eleko oyo. Azali lisusu kosala na lingomba te sima na Ye. . . Babimisá Ye libanda; azali libanda, azali kobeta na ekuke. Ezali naino na ndambo na Mimboto eponámá na kati. Asengeli kokómela bango.

⁷⁴ Pe Nzambe, kati na moto, Amisopaki. Na Yoele 2:28, tomoni ete Alobaki: “Nakosopa, na mikolo ya suka, Molimo na Ngai.” Sikawa, soki botali malamau liloba yango, na lokóta ya Greki. Nakoki kokoma yango mabe, kasi oyo namonaki. . .

⁷⁵ Bosengeli kokebaka na maloba. Maloba na Ngelesa, mbala mosusu, ezalaka na ndimbola mibale. Ndakisa, liloba oyo tolobaka: “nzambe”. Nzambe akelaki likolo ná nsé, Genese

1. Kasi sikawa, na Biblia, Elobami: “Na ebandeli, Elohim.” Sikawa, Elohim, Ngelesa elobi “nzambe”, kasi ezalaki mpenza *Elohim* te. Eloko nyonso ekoki kozala nzambe, mpo na liloba oyo *nzambe*; okoki kokómisa ekeko nzambe; okoki kokómisa piano wana nzambe; okoki kokómisa eloko nyonso nzambe.

⁷⁶ Kasi ezali bongo te mpo na liloba oyo *Elohim*; Elingi koloba “Oyo azali na nzela na Ye moko”. Bomoni? Piano wana ekoki kozala na nzela na yango moko te, eloko moko te ekoki kozala na nzela na yango moko. Boye, ebiangelo oyo *Elohim* elingi koloba “Oyo azalaka ntango nyonso”. *Nzambe*, ekoki koloba eloko nyonso. Bomoni bokesene kati na ebiangelo? [Losambo balobi: “Amen.”—N.D.E.]

⁷⁷ Sikawa, ntango Elobami awa ete *Amisilisaki*, to *Amisopaki*, sikawa, biso tokoki kokanisa boye, ete “Asanzaki”, ebiangelo oyo na Ngelesa, *komisilisa*, to *komisopa* uta na Ye, bomoni, eloko moko ebimaki na Ye oyo ekeseni na Ye. Kasi ebiangelo oyo *kenos*, na Greki, elingi koloba te ete “Asanzaki”, to eloko. . . loboko na Ye elongwaki, to liso na Ye elongwaki, moto mosusu.

⁷⁸ Elingi koloba, Amibongolaki, “Amisopaki kati” (Amen!), kati na ezipelo mosusu, kati na lolenge mosusu. Ezali te ete moto mosusu abimaki na Ye, oyo abengami Molimo Mosanto, kasi Ezalaki Ye Moko. Bososoli yango? [Losambo balobi: “Amen.”—N.D.E.] Ye moko Amisopaki kati na bato. “Klisto kati na yo!” Ezali kitoko mingi, ezali malam mingi, kokanisa ete Nzambe Amisopi kati na moto, kati na mondimi. “Kosopa!” Kosala bongo, ezalaki eteni ya lisano ya théâtre na Ye.

Nzambe, litondi mobimba, Bonzambe nyonso na nzoto, ezalaki kati na Moto oyo, Yesu Klisto. Azalaki Nzambe, Nzambe sé moko. Moto ya misato to moto ya mibale te, to moto ya liboso te; kasi Moto *yango*, Nzambe azipami kati na nzoto ya moto.

⁷⁹ Timote ya Liboso 3:16: “Na ntembe te, libombami ya bonzambe ezali monene; mpo ete, N-z-a-m-b-e, Elohim”, N monene-z-a-m-b-e, na Biblia. Boluka yango, moto nyonso. Ezali kolobela, na elobeli ya ebandeli, Elobami: “Elohim.” “Na ebandeli, Elohim.” Bomoni? “Pe, Elohim, na ntembe te, libombami ya Elohim ezali monene; mpo ete Elohim akómaki nzoto, pe tosimbaki Ye.” Elohim, azipami na nzoto ya moto! Yawe monene, oyo atondisaki etando mobimba, ntango, pe bisika nyonso, akómaki moto. Tosimbaki Ye, Elohim. “Na ebandeli, Elohim. Pe Elohim akómaki nzoto, afandaki elongo na biso.”

⁸⁰ Nini? Ezali lolenge na Ye ya kosala, biteni ya lisano yango. Asengeli kosala yango ndenge wana, ezali lolenge na Ye ya komimonisa na biso lokola moto mosusu. Bisu tozali bobele bato, pe Ye ayebi yango. Pe tososolaka bobele lokola bato. Toyebaka bobele lokola bato. Toyebi bobele makambo biyokeli na biso ezali kolakisa biso, pe oyo etikali, tosengeli kondima yango na kondima. Tosengeli koloba ete Nzambe azali; ata tomóni Ye, to te,

tondimi yango ata bongo. Bomoni? Ata ezali to te, tozali kokoba kondima yango, mpo Nzambe alobi bongo.

⁸¹ Lokola Abalayama, akokaki komona mwana yango te, elembo moko te, zemi moko te ya—ya Salah, ata pe sanza ya bomwasi moko te to eloko mosusu, kasi ata bongo, Nzambe alobaki bongo. Elikia nyonso, ata pe libumu na ye—na ye esilaki kokufa, pe bomoi ya mobali, kati na ye, ezalaki lisusu te, pe nguya ya bomoi ya mobali na ye ekaukaki nye, pe bomoi ya bomwasi—ya bomwasi ekaukaki nye kati na ye. “Kasi ata bongo, atengátengaki te, na kozanga kondima, mpo na elaka ya Nzambe, kasi akómaki na makasi, apesaki nkembo, koyeba ete Nzambe azalaki na makoki ya kokokisa nyonso oyo Alobaki ete Akosala.”

Na lolenge wana nde tosengeli kondima Liloba lelo. Ekosalema ndenge nini? Nayebi te. Nzambe alobaki ete ekosalema bongo, pe yango ekati likambo.

⁸² Nani yango nde Moto monene oyo amonanaka te? Nani yango Ye oyo Abalayama amonaki na bimononeli? Kasi, na suka mpenza, Amonisamaki na nzoto, liboso na koya ya mwana. Nzambe Ye moko ayaki epai na Abalayama na lolenge ya moto, na ntango ya suka. Komonisama! Mokolo moko amonaki Ye kati na Pole ya moke; amonáki Ye na bimononeli; ayókáki Mongongo na Ye; bimoniseli mingi. Kasi liboso mpenza ya koyá ya mwana na elaka, amonaki Ye na lolenge ya moto, pe asololaki na Ye, pe apesaki Ye mosuni ya kolia ná eloko ya komela. Bomoni? Botala, Nzambe Ye moko azipamaki kati na nzoto ya moto.

⁸³ Ezali lolenge na Ye ya kosala. Ezali lolenge oyo Amitalisaka na biso, Atalisaka Liloba ya Seko, Nzambe, Yawe akómi nzoto. Lokola na Santu Yoane 1: “Na ebandeli Liloba ezalaki, pe Liloba ezalaki elongo na Nzambe, pe . . . Na ebandeli Elohim azalaki, pe Elohim azalaki . . . akómaki Liloba, pe Liloba ezalaki Elohim. Pe Liloba ekómaki Elohim.” Bomoni? Ezali eloko yango moko, ezali bobele komizipola.

⁸⁴ Lokola makoki, bomoni, ezali kati na Nzambe. Makoki ezali makanisi na yo. Nzambe, na ebandeli, Oyo-na-Seko, Azalaki ata Nzambe te. Azalaki Oyo-na-Seko. Azalaki ata Nzambe te; Nzambe ezali eloko oyo bakumbamelaka, to eloko moko. Bomoni? Na bongo Azalaki ata yango te. Azalaki Elohim, Oyo-na-Seko. Kasi kati na Ye, Azalaki na makanisi oyo Alingaki kokomisa yango polele. Pe Asalaki nini? Bongo Alobaki Liloba, pe Liloba emónisamaki polele. Ezalaki bongo na mobimba, kobanda Genese kino Emoniseli. Eloko moko ya mabe ezali te. Elohim nde amonisami polele, mpo Ákoka kosimbama, komama. Bongo na Bilanga-Nkoto, Elohim akofanda na Ngwende, bomoni, ezali solo, elongo ná bato na Ye nyonso zongazonga na Ye, baoyo Abongisaki liboso, liboso ya kozalisama ya mokili.

⁸⁵ Ezali lokola moto oyo atongaka ba-ngonga ya mike-mike to asalaka ba-ngonga ya mike-mike, motúli. Ngonga moko na moko esengeli kobeta kokesene na mosusu. Ezali bisalelo yango moko, kasi ndambo ya ebende, ndambo ya kwivre, ndambo ya motáko, mpo ékoka kobéta “tingi”.

⁸⁶ Nzambe asalaki pe bongo. Asangisaki eloko oyo na oyo kuna, oyo kuna na oyo mosusu, oyo mosusu na oyo kuna, kino Akozua mpenza eloko Alingaki kozua. Ezali bongo nde Akitaki. Nzambe amizipolaki kati na Likonzi na Móto, na nzela ya basakoli, na sima kati na Mwana na Nzambe, oyo Azalaki Nzambe. Bomoni, ezali ete Nzambe yango moko azalaki komitalisa polele mpenza, kobonga likolo na kobonga be, nkembo likolo na nkembo. Ezali bongo nde Lingomba etambolaka.

⁸⁷ Botala, kati na bileko, ndenge moko, na nzela ya basakoli na Ye, Amimonisaki. Bazalaki mpenza basakoli te, bazalaki banzambe. Alobaki bongo. Mpamba te, makambo balobaki ezalaki Liloba na Nzambe. Bazalaki ba-nzoto oyo Nzambe azipamaki kati na yango. Bazalaki ba-nzambe. Yesu alobaki, Ye moko alobaki: “Ndenge nini bokoki kokweisa Ngai ntango Nalobi ete Nazali Mwana na Nzambe, pe mobeko na bino moko elobi ete baoyo Liloba na Nkolo eyaki epai na bango bazalaki banzambe?” Bomoni?

⁸⁸ Na bongo ezalaki Nzambe kosala na lolenge ya moto oyo abengami mosakoli. Bomoni? Pe Liloba na Nkolo eyaki na moto oyo, bongo ezalaki mosakoli te; mosakoli azalaki ezipelo, kasi Liloba ezalaki Nzambe. Liloba ya moto ekoki kosala bongo te. Bososoli likambo nalingi koloba? Ekoki kosala lolenge wana te. Kasi na moke na yango ezalaki Nzambe. Bomoni, Azalaki Liloba na Nzambe na lolenge ya moto, abengami “moto”.

Botala, Abongolaki bozali na Ye te, bobele lolenge na Ye. Baebele 13:8 elobi: “Azali motindo moko lobi, lelo, pe libela.” Na bongo, Abongolaki bozali na Ye te ntango Ayaki. Azali ntango nyonso Mosakoli yango, na bileko nyonso, motindo moko: Liloba, Liloba, Liloba, Liloba. Bomoni? Akokaki kobongola bozali na Ye te, kasi Abongolaki lolenge na Ye. Baebele 13:8 elobi “Azali motindo moko lobi, lelo, pe libela.” Abongolaki bobele ezipelo na Ye.

⁸⁹ Lokola ngai nabongwanaki kozala mobali, ntango mwana na ngai abotamaki, na bongo nakómaki tata. Ntango nkoko na ngai abotamaki, nakómaki tata-nkoko. Bomoni? Kasi, nabongwani te; ezali bobele—bobebe ngai. Bomoni? (Bongo pe na Nzambe.) Ezali ete nabongwanaki kozala. . . Bomoni, ebongolaka lolenge na yo. Bomoni?

Botala. Pe bozali ebongolaka yango na kozala elenge mobali kino mobali akóli, kino kokóma mobange. Pe yo wana, bomoni, obongoli bobele lolenge na yo.

⁹⁰ Sikawa, okoki koloba te ete elenge mobali oyo atele mi awa, ya mibu zomi na motoba, ete azali nkoko. Akoki kozala yango te. Lolenge na ye esengeli kobongwana. Mibu moke na sima ekobongola yango, bongo nde akokóma papa-nkoko. Bomoni eloko nalingi koloba?

⁹¹ Kasi ezali bobele Moto yango moko ntango nyonso, Moto yango moko, Nzambe ntango nyonso. Na lolenge oyo Amimonisaka na bato na Ye, kosalaka makambo oyo. Botala, kati na eleko ya Likonzi na Móto, Amimonisaki na bato na Ye. Na eleko ya—ya Yesu, Amimonisaki na bato na Ye. Na eleko ya Molimo Mosanto, lokola Mwana na Nzambe. Mwana na Dawidi . . . Amimonisaka ntango nyonso lolenge wana na bato na Ye, kosala ete bato báyeba Ye. Azipamaka sima na eloko moko, botala, lolenge moko, to bozali moko, ntango nyonso.

⁹² Nzambe azipamaki kati na Yesu, mpo na kosala mosala ya lisíko na ekulusu. Nzambe akokaki kokufa te, lokola Molimo. Azali Seko-na-Seko. Kasi Asengelaki kolata ezipelo mpo na kosala mosala ya kufa. Akufaki mpenza, kasi Akokaki kosala yango na lolenge na Ye ya Nzambe te. Asengelaki kosala yango na lolenge ya Mwana, lokola Mwana na moto, na mokili. Bomoni? Asengelaki kozala na lolenge ya Mwana. Na sima, ntango Ayaki lisusu na Pantekote, Azalaki lisusu Mwana na Nzambe. Bosoli likambo nalingi koloba? Bokati ntina na yango? Azalaki . . .

⁹³ Asengelaki koya na kati ya nzoto ya moto, mpo . . . pe, moto moko te, mposa ya nzoto moko te. Mpo yango ezali kotalisa lisusu polele makambo tolobaka likolo na momboto na nyoka, bomoni, “koyebana ya nzoto”, koyebana ya nzoto mpenza. Ezali mbuma ya pomme te; koyebana nzoto! Ezali solo. Esengelaki kozala. Botala awa, bomoni, mpo na moto malamú nyonso . . . Botala basakoli wana kuna, kasi Asengelaki kozala koleka mosakoli. Bomoni? Mpo na kosala yango, Asengelaki kobotama na nzela ya mongondo, kolakisa ete mbotama wana na mongondo etalisaki polele . . . Asengelaki kobotama na na nzela ya mongondo, mpo na kolongola elakeli mabe, Monó. Bomoni likambo nalingi koloba? Boye, esengelaki kozala koyebana ya nzoto. Atalisaki yango polele na boyei na Ye moko; Ayaki na mposa ya nzoto te, kasi na mbotama na nzela ya mongondo. Pe Abongolaki ezipelo na Ye longwa na Yawe kino na Yesu, mpo na kosala mosala ya lisíko, na lisano ya théâtre oyo Azalaki kosala, Nzambe na ekulusu.

⁹⁴ Ba-Greki balingaki komona Ye. Na Santu Yoane 12:20, bato mingi kati na bino bayóká ngai koteya likolo na yango, koloba: “Misie, tolingi komona Yesu.” Bomonaki yango?

⁹⁵ Sikawa, ba-Greki bazalaki bato ya mayele mingi, bazalaki bato minene. Pe bazalaki na—bazalaki na—na mposa makasi ya Nzambe, ndenge Polo ateyaki bango na Aleopaji. Pe bazalaki, ba—bakambaki—bakambaki mokili na makambo ya zebi pe—pe

koyekola mingi, bazalaki bato minene. Kasi bazalaki kosambela pe kondimela masapo pe nyonso wana, ba-buku ya ntóki pe ntóki ya kokámwa, pe bongo na bongo.

⁹⁶ Kasi ba—ba—bamitungisaki mingi na ntina na Moto wana Oyo akokaki kobikisa babeli pe kosakola makambo mazalaki kokokisama bongo mpenza. Bamitungisaki mingi, kino bayaki mpo na komona Ye. Sikawa, bótala malamú sikawa, bózanga likambo oyo te. Bomoni? Bayaki pe balobaki na Filipi, moto na Bethsaída: “Misie, tolingi komona Yesu.” Pe Filipi ná moyekoli mosusu bamemaki ye epai na Yesu, mpo na komona Yesu.

⁹⁷ Sikawa bótala maloba mpenza oyo Yesu azongiselaki bango, mpamba te bayaki komona Nani Ye azalaki, pe bakokaki komona Ye te. Bamonaki lolenge, kasi Azalaki kati na tempelo na Ye. Nzambe azalaki kati na tempelo na Ye, Azipamaki kati na nzoto ya moto. Bótala maloba Alobaki: “Soki mbuma ya lisangu ekwei na mabelé te, bomoni, pe ekufi te, ekotikala yango moko.” Bomoni? “Ntango eyei, etikali moke oyo Mwana na moto akokembisama, bomoni, Asengeli kotika mokili oyo. Pe soki ngonga yango ekomi te, bokozala na makoki ya komona Yango ata moke te.” Bomoni?

⁹⁸ Botala, mpo na nini bakokaki komona Yesu te? Azipamaki. Nzambe azipamaki. Ba-Greki bazalaki na mposa ya Nzambe, pe Ye wana, kasi bakokaki komona Ye te na ntina na ezipelo. Ezali pe bongo lelo, bakoki komona Ye te na ntina na ezipelo. Ezipi elongi na bango. Ba-Greki yango bazipamaki, to Yesu azipamaki mpo na ba-Greki yango.

⁹⁹ Botala, Alobaki na bango: “Soki mbuma na lisangu ekwei na mabelé te, ekotikala yango moko.”

¹⁰⁰ Bango, bakokaki kososola te ndenge nini, mpo na nini bakokaki komona Ye te. Moto moko atelemaki wana. Bayaki mpo na komona Nzambe, kasi bamonaki moto moko. Bomoni? Bakokaki komona Nzambe te mpo Nzambe azipamaki mpo na bango. Sikawa bóbosana likambo yango te, Nzambe azipamaki kati na moto. Bakokaki koloba: “Moto moko te akoki kosala misala oyo, bobele Nzambe. Moto moko te akoki kosala yango, pe moto moko atele mi wana, pe tala, misala na Nzambe ezali kotalisama na nzela na Ye!” Bomoni, bakokaki kososola te ete Nzambe azipamaki.

¹⁰¹ Azipami kati na moto, ndenge Azipamaka ntango nyonso. Kasi, Azipamaki mpo na bango, Azalaki kati na tempelo na Ye ya bomoto. Nzambe azalaki kati na tempelo ya bomoto. Sikawa, bózala na bokébi mpenza, sikawa Azali motindo moko lobi, lelo, pe libela. Bomoni? Nzambe azipami, Amibombi na miso ya mokili, Azipami kati na moto. Bomoni? Nzambe azalaki wana! Ba-Greki wana balobaki: “Tolingi komona Ye.”

102 Pe Yesu alobaki: “Mbuma ya lisangu esengeli kokweya pe kokufa.” Osengeli kokufa na makanisi na yo nyonso. Osengeli kobima libanda na makanisi na yo moko.

Lokola bayekoli wana, bakokaki kolimbola te likambo ya kolia nzoto na Ye pe—pe ya komela Makila na Ye, kasi, bomoni, basilaki kokufa mpenza na makambo yango. Bakufaki na Likambo na motuya moko, bakufaki mpo na Klisto. Ata likambo nini, to ata emonanaki lokola Alongamaki, bango bakobaki kondima Yango ata bongo. Bomoni? Bakokaki komona kati na Moto yango; Moto oyo azalaki kolia, komela, kolóbo mbisi, kolala, pe nyonso mosusu, abotamaki awa na mokili, pe atambolaki elongo na bango, asololaki na bango, alataki bilamba lokola bango nyonso, kasi ezalaki Nzambe.

103 Boye, ba-Greki bakokaki komona Ye te, mpo Abombamaki na miso na bango, kati na moto. Botala Liloba na Ye mpo na bango: “Soki mbuma ya lisangu ekwei na mabelé te.”

104 Nzambe azipamaki na lolenge ya moto, Amibombaki na miso na bango. Bango bakokaki bobele komona moto. Kasi baponami wana bamonaki Nzambe. Moto moko amonaki moto, mosusu amonaki Nzambe. Bomoni? Pe ezalaki Nzambe azipamaki kati na moto, bango mibale balóbaki solo, kasi ezali kondima na yo na eloko ozali komona te. Ondimi yango ata bongo. Nzambe azipami kati na moto. Azalaki kati na nzoto yango, pe nzoto yango ezalaki ezipelo na Ye. Ezipelo yango epasukaki, bomoni, mpo Nzambe átalísama polele.

105 Na Kondimana na Kala, Nzambe abombamaki na ezipelo, ntango Afandaki na ebóngá na Ye ya mawa; na ebóngá ya mawa. Na Kondimana na Kala, Nzambe azalaki kati na tempelo na Ye. Kasi bato bazalaki koya kokumbamela boye, kasi, bómikanisela, ezipelo ezalaki wana (amen) oyo ezalaki kobomba Nzambe. Bayebaki ete Nzambe azalaki wana. Bakokaki komona Ye te. Likonzi na Móto yango emonanaki lisusu kuna te. Bomonaki yango? Ata mbala moko te, na Makomi, kobanda ntango Likonzi na Móto yango ekotaki na sima ya ezipelo wana, Emonanaki lisusu te, kino ntango Eyaki na nzela na Yesu Klisto. Nzambe azipamaki!

106 Ntango Azalaki na mokili, Alobaki: “Nauti na Nzambe pe Nakozonga na Nzambe.”

107 Na sima Polo, (sima na liwa na Ye, kokundama, pe lisekwa), na nzela ya Damaseke, Likonzi na Móto yango emonanaki lisusu. Ezalaki nini? Eutaki na sima ya ezipelo! Nkembo na Nzambe!

108 Azalaki na sima ya ezipelo. Sikawa Azalaki sima na nini? Ezipelo ya mposo. Bomoni, “ba-mposo ya gambala”, sima ya ezipelo. Pe ntango ezipelo yango epasukaki mokolo ya kobakama na ekulusu, ntango ezipelo oyo Azipamaki na yango epasukaki mokolo ya kobakama na ekulusu, ebóngá mobimba ya mawa emonanaki polele.

¹⁰⁹ Sikawa, Bayuda bakokaki kososola te ndenge nini Nzambe akokaki koyokela bato ya masumu, bato mabe lokola biso mawa. Kasi bakokaki komona te Moto oyo azalaki koyokela bato mawa, mpo Abombamaki. Azalaki sima na ebóngá ya mawa, na kati, ba-mposo ya gambala ezalaki wana, kozipa Ye. Liboso . . .

¹¹⁰ Liboso, soki moto akoti sima ya ezipelo, ezalaki liwa ya mpwasa. Amen. Oh, na miniti moke tokoyekola likambo moko awa, bomoni, soki bokoki—bokoki koyamba Yango. Koleka sima ya ba-mposo wana . . . Ata moko na bana ya nganganzambe amekaki kosala yango mbala moko, pe akufaki. “Koleka sima ya ezipelo wana te.” Moto oyo alekaki sima na . . . Mpo na nini? Lisiko ezalaki naino kati na yango te. Ezalaki se moke na yango. Ezalaki bobele ya moke na yango. Pe eloko nyonso *ya moke* ezali naino eloko ya solo mpenza te, bomoni, bobele moke na yango. Ezalaki lisiko . . . Masumu ezipamaki, elongolamaki te . . . elimbisamaki, te, elimbisamaki te. *Kolimbisama* ezali “kolongolama pe kobwakama”. Na bongo, makila ya ba-mpate ná ba-ntaba ekokaki kosala yango te, boye Yawe abombamaki sima na ezipelo. Sikawa, kuna na sima ya ezipelo esika Abombamaki, kokota kuna, moto azalaki kokufa mbala moko, komeka kokota Kuna.

¹¹¹ Kasi longwa na Pantekote, longwa na Kobakama-na-ekulusu, ntango ezipelo yango epasukaki longwa na likolo kino na nse, mpo na ekeke wana . . . Yesu azalaki Nzambe yango, azipamaki. Pe ntango Akufaki na Kalvari, Nzambe atindaki móto pe mikalikali, pe Apasolaki ezipelo yango longwa na likolo kino na nse, pe ebóngá mobimba ya mawa emonisamaki polele. Kasi bango bakufaki mpenza miso mpo na komona Yango. Ndenge Mose alobaki awa, ata bongo, to . . . Polo alobaki, ezali bango kotángá Mose: “Ntango batángaka Mose, kino lelo, ezipelo yango ezali naino likolo na mitema na bango.” Oh, ndeko mobali, ndeko mwasi, yango nde Bayuda basalaki ntango ezipelo epasukaki pe Nzambe amonisamaki polele, likolo na ekulusu. Amonisamaki polele, kasi bango bakokaki komona Yango te.

¹¹² Ekoki pe kosalema ete bato na Mabota basálá ndenge moko? E Nzambe! Ntango oyo bazalaki na bileko ya lingomba, Mwana na Nzambe; kasi sikawa ntango ezipelo ya bibongiseli oyo pe makambo nyonso oyo, ezipelo ya mimesano oyo tozali na yango longwa na Pantekote, ntango mimesano ya lingomba epasuki, makambo bato bazalaki koloba: “Ntango ya bikamwa esílá na yango, pe makambo wana”, pe Nzambe alongoli ezipelo likolo na Yango, pe atalisi Yango mpenza polele, kasi babelemi mpo na kobaka Yango lisusu na ekulusu, bobele ndenge moko.

¹¹³ Nzambe oyo azipolami, amonisami polele, basengelaki komona Ye ateleme wana. Kasi Azalaki mpenza lokola bato nyonso, Azalaki moto lokola bato nyonso. Bakokaki komona Yango te. Bomoni, ezalaki na moto moko wana. “Ee,” balobaki, “moto oyo, Atángá na eteyelo nini?” Kasi, bomikanisela, ntango

likongá wana ekotaki na nzoto na Ye, Molimo yango etikaki Ye, tempelo. . . makonzi ya ebomelo mbeka ekweisamaki, pe mikalikali ebetaki tempelo lokola fimbo pe epasolaki ezipelo. Ezalaki nini? Nzambe na bango azalaki wana, abakami na Ekulusu, kasi bakufaki mpenza miso mpo na komona yango.

114 Etalisaki Ye mpenza polele, kasi bazali komona yango te! Babomami miso. Nzambe, azipami kati na moto!

115 Bomikaniseli, na sima, Azongelaki Polo sima na yango, pe na Petelo na Boloko, lokola Likonzi na Móto. Bomikaniseli yango? [Losambo balobi: “Amen.”—N.D.E.]

116 Kasi na mikolo ya suka Asengeli kozonga lisusu, kasi Likonzi na Móto esengeli koya lisusu mpo na kotalisa Mwana na moto, bomoni, mpo na komonisa Liloba, Pole. Mimesano, ezalaki, ekosila nye. Eloko moko te ekobulunganisa Yango; ekosalema, ata ndenge nini. Nzambe akobuka bibongiseli pe mimesano nyonso wana.

Akosala yango na Molimo ya lolenge nini? Ndenge Asalaki mbala ya liboso. Botala makambo Asalaki na mikolo ya Eliya, na mikolo ya Yoane. “Bókanisa komiloba kati na bino te ete ‘Abalayama nde tata na bino’, mpo Nzambe azali na makoki ya kotelemisa longwa na mabanga oyo bana mpo na Abalayama.” Bomoni? Bókanisa te ete: “Mpo nazali moto ya lisanga *oyo* pe nazali moto ya lisanga *oyo kuna*.” Bomoni? Nzambe azali kopasola ezipelo, bomoni, mpo na kotalisa Nani Ye azali. Bomoni, botala ezipelo, ntango ezali kopasuka awa sikawa, tomoni sikawa.

117 Bongo, na ntango moko, soki moto alekaki sima ya ezipelo yango, ezalaki liwa ya mpwasa. Sikawa, kozanga koleka sima na Yango ezali liwa! Amen. Soki okoki kobuka ezipelo yango ya mimesano te, kodusola etutu wana ya bibongiseli, mpo na komona Nzambe kati na nguya na Ye, ezali liwa. Esika ezaláká liwa mpo na kokoka kati na yango, sikawa, kotikala libánda ezali liwa. Ebóngá mobimba ya Mawa ezali komonana polele, moto nyonso akoki komona Yango, ezipelo epasuki. Nkembo na Nzambe! Ebóngá mobimba ya mawa emonisami polele.

118 Ndenge nini Nzambe akoyokela basumuki mabe lokola biso mawa, ntango Amibombaki, ezalaki libombami. Pe sikawa Emonani polele, to na miso ya bato nyonso, Emonisami na nzela ya Liloba na Ye. Ezali se Liloba, ntango nyonso, yango nde Nzambe. Liloba nde efungolaka yango. Soki bato yango bakokaki koyeba Liloba na Nzambe na eleko wana, ntango Yesu akufaki, balingaki komona Ebóngá ya Mawa, balingaki komona Nani Ye azalaki.

119 “Azalaki Nani ntango wana? Mpo na nini ezipelo epasukaki?” Bomikanisela, kokota Kuna kati ezalaki liwa. Moto moko te akokaki komona Yango. Mose amonaki Yango na lolenge moko, Ezalaki ekumb- . . . ezalaki mo—mokongo ya Moto.

Ee, Yango oyo, mokongo kotanga makila, bobele Moto yango moko! Ezalaki nini? Nzambe alingaki kolakisa bango Ebóngá na Mawa. Nzambe alingaki kolakisa bango Nani Ye azalaki. Bongo, ezipelo kati na tempelo, na loboko ya Nzambe, longwa na likolo, epasukaki longwa likolo kino na nse, pe etalisaki Nzambe polele. Ezalaki Yesu Klisto likolo na ekulusu, Ebóngá na Mawa. Pe ezalaki nini? Bato bakufaki mpenza miso mpo na komona Yango.

¹²⁰ Sikawa, likambo yango esalemi lisusu, mimesano na bango! Lolenge nini, na sima, Mokolo ya Pantekote, Liloba eyaki pe ezalaki na lolenge ya “Mwana na Nzambe”. Pe babandaki kokómisa yango ebongiseli na mboka Nicée, na Rome. Pe, nokinoki, bakómaki ba-Methodiste, ba-Batiste, ba-Presbiterien, ba-Pantekotiste, pe bongo na bongo. Ekómi mimesano ebongisami kino moto ayebi lisusu te esika azali.

Kasi, nkembo na Nzambe, Alakaki na mikolo na suka makambo Akosala. Akotalisa Liloba na Ye polele, kofungola yango lisusu liboso na biso, bomoni, kofungola Yango.

¹²¹ Soki bayebaki Liloba, balingaki koyeba Nani Yesu azalaki. Soki moto ayebaki se Liloba na Nzambe, alingaki koyeba eleko nini tozali kobika pe makambo mazali kosalema. Baboyi na bango koyoka Liloba yango. Mimesano na bango! Eloko nini ezangisaki Bayuda yango komona yango? Eloko nini? Emonanaki lokola bakokaki mpenza komona, mpo likambo yango efungwamaki polele. Efungwamaki polele na ntina.

¹²² Mpo na nini kolamuka oyo ezali kokoba sikawa? Ndenge nini ezali se kofuluka? Ndenge nini ezali se kopambolama? Ata bamekoli bazali boni, to eloko nini mosusu, ekotungisa ngai ata... Ntango Mose abimaki, ezalaki na bato ya ndenge na ndenge baoyo babimaki elongo na ye. Kasi esalemaki mpo na nini? Yawe Ye moko nde alongolaka ezipelo likolo na Nzambe, mpo na kotalisa bokeseni kati na solo pe lokuta. Kati na ba-Methodiste, ba-Batiste, ba-Presbiterien, ba-nani bazali na solo? Liloba na Nzambe nde ezali na solo! “Tika liloba ya moto nyonso ézala lokuta, pe oyo ya Ngai ézala Solo.” Nzambe azali na ntina ya molimboli te. Ye moko Alimbolaka Yango. Akokisaka Yango, pe... yango epesaka ndimbola. Nzambe Ye moko azali komizipola. Oh! la la! Katikati na biso mpenza, tozali komona loboko na Ye monene kolobela makambo oyo, kosala makambo oyo.

¹²³ Nazali na eloko ya koloba likolo na yango na mpokwa, bomoni, lolenge ya kotalela loboko na Nzambe, nini Yango esalaka, lolenge Emifungolaka. Bomoni?

¹²⁴ Pe bato balobaka: “Oh, Ezali boléma. Wana ezali bilandálanda. Yango ezali na ntina moko te. Ezali boléma. Ezali Bezezebula. Ezali zabolo. Ezali kisoloka. Ezali oyo.” Bomoni, makambo ndenge moko balobaki mpo na Ye.

125 E lingomba, pe soki bande oyo ebimi, bokoki komona te, batei ya Nsango-Malamu, esika bozali kobika? Bokoki komona te ntango nini tozali na yango? Nzambe, azali komitalisa, kotia pembeni. . . Botala, Azuaki ezipelo ya tempelo yango pe Apasolaki yango na biteni, mpo bango bákoka komona Nzambe polele, kasi bakufaki mpenza miso mpo na komona Yango. Asali pe ndenge moko lelo, kotalisa Liloba na Ye polele liboso na bango, makambo oyo Alakaki. Bilaka nyonso kati na Liloba, etandisami liboso na biso, polele!

126 Boyebi likambo lingomba ya Mabota esali? Lolenge moko lingomba ya Bayuda esalaki, bakufi mpenza miso mpo na komona Yango. Esili. Ekotiana na mitema na bango, lolenge moko mpenza lokola na eleko wana.

127 Botala, kozala mosika na Yango, ezali liwa sikawa. Bosengeli kokota kati na Yango na nzela na ezipelo oyo, to bokokota te. Lolenge nini Nzambe akokaki koyokela bango mawa, kasi bokanisa likambo oyo ezalaki, ete Nzambe azali kotalisa eloko oyo ezalaki sima na ezipelo yango. Botala eloko nini ezalaka sima na ezipelo, Liloba! Ezipaki eloko nini? Liloba! Ezalaki nini? Ezali kati na sanduku. Ezipelo yango ezalaki kozipa Liloba. Bomoni? Pe Yesu azalaki Liloba yango, pe Azali Liloba yango, pe ezipelo ya nzoto na Ye ezipaki Yango.

128 Pe lelo oyo ezipelo ya mimesano ezali lisusu kobomba Liloba, kolobaka: “Ezali bongo te.” Kasi Ezali bongo! Nzambe Ye moko azali kotatola Yango, Azali koyula, kongengisa Yango lokola moi, liboso na bato nyonso, kasi bazali komona Yango te. Nzambe, yokela biso mawa.

129 Na elilingi, Mose autaki kozala Liboso na Nzambe, ná Liloba na Nzambe mpo na eleko wana. Sikawa botala, tozali sikawa na Esode 19. Bózanga likambo oyo te sikawa. Esode 19, Mose azali koya kouta Liboso na Nzambe, to eteni ya 20 pe 21, 19:20 pe 21. Mose azali koya kouta na Liboso na Nzambe. Azalaki kati na Liloba. Liloba esilaki kokomama. Pe ye, Liboso na Nzambe, ná Liloba, azalaki na Liloba mpo na eleko wana. Ezali na Liloba moko mpo na eleko moko na moko. Pe ntango Mose azalaki koya, elongi na ye ezalaki kongenga mpenza! Bomoni? Liloba ezalaki kati na ye, ebelemaki mpo na kotalisama, kopesama epai na bato.

130 Liloba ya solo, Nzambe akomaki Yango, pe Ezalaki elongo na Mose. Botala, Ezalaki elongo na Mose pe ebelemaki mpo na kotalisama. Azalaki Liloba mpo na bango, azalaki Liloba na bomoi, oyo ebombami. Amizipaki, Mose asengelaki kotia ezipelo likolo na elongi na ye moko. Mpo na nini? Azalaki Liloba yango. Amen. Liboso Liloba yango éyebana, Mose asengelaki komizipa. Amen!

Bomoni Yango? Bisika nyonso Liloba ezali, Ezipamaka.

¹³¹ Mose azalaki na Liloba. Sikawa bomikanisela, sima na Liloba kotalisama, Mose azongaki kozala Mose. Bomoni? Kasi wana Liloba yango ezalaki kati na ye mpo na kopesama, azalaki Nzambe; ee, azalaki lisusu Mose te. Azalaki na Liloba na Nzambe mpo na eleko wana. Eloko moko te ekokaki kosimba ye, kino ntango esilaki; azalaki na Liloba yango elongo na ye. Boye, na bongo, ntango akómaki, bato babalolaki bilongi; bakokaki kososola te. Basilaki kobongwana. Akómaki moto mosusu. Ayaki ná Liloba yango. “Pe atiaki ezipelo,” Biblia elobi, “likolo na elongi na ye,” mpo azalaki na Liloba. Pe azalaki Liloba mpo na bango.

¹³² Sikawa botala, soki Mose. . . E ndeko, oyo ekozala kotúka. Kasi soki Mose. . . Ndenge Polo alobaki awa na Bakolinti ya Mibale, mokapo ya 3. Soki esengelaki na Mose kozipa elongi na ye, ná Nkembo ya lolenge wana likolo na ye. . . bomoni, mpo wana ezalaki nkembo ya mokili, ezalaki mobeko ya mokili. Pe soki Mose, koyeba ete mobeko yango esengelaki kokufa, kasi Nkembo yango ezalaki monene mingi kino ebomaki bato miso, pe basengelaki kotia ezipelo likolo na elongi na ye. Koleka boni Ekozala? Bakúfi miso ya molimo! Iyo. Nkembo wana esengelaki koleka, kasi Nkembo Oyo ekoleka te. Bomoni? Mose azalaki na mibeko ya nzoto, kokweisama, ngolu te, eloko moko te; ezalaki bobele kokweisa bino. Kasi Oyo tozali kolobela. . . Oyo wana ezalaki na bolimbisi te, ezalaki bobele koyebisa bato oyo bango bazalaki. Oyo ezali kopesa bino ekimelo.

¹³³ Pe ntango Liloba yango ekozipolama, oh! la la! ekozala lolenge nini ya elongi? Ekosengela kozipama. Esengeli kozipama. Sikawa botala. Boye, Molimo ezipami kati na tempelo ya moto, bomoni, Ezali mpo na koloba maloba ya mokili na nzela na ezipelo ya mokili.

¹³⁴ Sikawa, Polo azali koloba awa sikawa, pe na lo—lolenge oyo, Liloba-Molimo: “Tozali batei, ya mokanda te, mobeko; kasi basali ya makoki ya Molimo,” ete Molimo azali kozua mokanda mpo na kotalisa Yango.

¹³⁵ Oyo wana ezalaki bobele mobeko, bato basengelaki kokende kotala yango, elobaki: “Okosala ekobo te. Okoyiba te. Okokosa te. Okosala *boye, boye*, na *boye* te.” Bomoni? Basengelaki kotala yango.

¹³⁶ Kasi oyo ezali Molimo oyo eyei likolo na Liloba ya elaka mpo na eleko *oyo*, pe ezali kobota mbuma pe kotalisa, bitanda mibale ya mabanga te, kasi Bozali ya Nzambe na bomoi. Makanisi ya masapo te oyo moto amisaleli, to Houdini moko boye, mayele mabe; kasi elaka mpenza ya Nzambe emonisami pe etalisami polele libo na biso. Ekozala sima na ezipelo ya lolenge nini? Pe ko—kobungisa yango. . .

¹³⁷ Bomoni, ezalaki monene mingi kino ata bato balobaki, balobaki, ntango bamonaki Yawe kokita kati na Likonzi na Mító

oyo, pe kobanda koningisa mabelé, pe—pe makambo Asalaki, ná ngomba kopela móto. Pe soki ata moto moko amekaki kopusana pene na ngomba yango alingaki kokufa. Ezalaki monene mingi kino ata Mose ye moko abangaki koningana yango. Bongo, soki na ntango wana Aningisaki bobele ngomba, na ntango oyo Akoningisa likolo pe mabelé.

¹³⁸ Ezali boni mpo na Nkembo Oyo? Soki yango ezipamaki na ezipelo ya mokili, oyo ezali mpenza. . . ezipami na ezipelo ya molimo. Boye, bóluka kotala oyo ya mokili te; bókota na Molimo mpo na koyeba esika bozali, koyeba ntango nini tozali kobika na yango.

¹³⁹ Bozali kososola ntina na Yango? Bomoni, Ezipelo ya molimo nde ezali likolo na bato, balobaka: “Nazali Metodiste. Nazali moto malamu lokola bato nyonso. Nazali Batiste. Pe nazali Pantekotiste.” Bozali koyeba te ete eloko yango ezali ezipelo ya mimesano? Ezali kopekisa bino komóna Nzambe. Makambo yango nde ezali kopekisa bino kosepela na nyonso. . .

Oh, bokoloba: “Nagángaka pe napumbwaka.”

¹⁴⁰ Alobaki: “Liloba nyonso!” Eva andimaki Liloba nyonso longola bobele moko. Bomoni? Ezali Liloba mobimba ya Nzambe, elaka ya eleko oyo etalisami polele. Bomoni?

¹⁴¹ Bótala sikawa wana tozali kokoba. Nazali na makambo mingi ya kolobela awa, kasi nazali na pene nkasa ntuku mibale, kasi. . . ya—ya nkomá, kasi na—nakolobela yango nyonso te. Bomoni, nakosala noki.

¹⁴² Azipami na ezipelo ya mokili, liboso ya kosakola Liloba na bato. Sikawa, Nzambe asengeli komizipa, ndenge Alakaki, kati na nzoto ya moto. Nzambe! Bozali kososola Yango? [Losambo balobi: “Amen.”—N.D.E.] Nzambe asengeli komizipa kati na nzoto ya moto, pe kotia ezipelo ya molimo likolo na bango, (koloba: “Ee, nazali *oyo* pe nazali *oyo kuna*”), mpo na kolobela bato. Ntango ezipelo yango, oyo ezali ezipelo ya mimesano, epasukaki, nde. . . bango balobaka: “Ee, ntango ya bikamwa esilá koleka.”

¹⁴³ Mobali moko alobaki na ngai mokolo mosusu, e—elenge motei ya Batiste, kuna, ayaki epai na ngai, Ndeko Green, pe alobaki: “Ndeko Branham, tala likambo moko oyo natelemelaka yo.” Alobaki: “Ozali koluka kosala ete bato. . .” Esalemaki na Ramada Inn, ntango toyanganaki kuna. Alobaki: “Ozali koluka kosala ete bato bándimela eleko ya bantóma, kobika lelo ndenge bazalaki na eleko ya bantóma.” Alobaki: “Eleko ya bantóma esilaki elongo na bantóma.”

Nalobaki: “Ya solo?”

“Iyo.”

Nalobaki: “Nani azalaki molobeli na eleko ya bantóma?”

Alobaki: “Bantóma zomi na mibale na eteni-ya-ndako ya likolo.”

¹⁴⁴ Nalobaki: “Na bongo, Polo azalaki te.” Nalobaki: “Molobeli ezalaki Petelo. Pe Petelo alobaki, na Mokolo ya Pantekote, ntango bamonaki makambo nyonso oyo kosalema, pe misala ya Molimo Mosanto, alobaki: ‘Elaka yango ezali mpo na bino, mpo na bana na bino, pe mpo na baoyo bazali mosika, motángo na baoyo nyonso Nkolo Nzambe na biso akobenga.’ Soki Azali naino kobenga, boye Likambo yango moko ezali awa. Boye, eleko ya bantóma esilaki ntango nini? Eleko ya bantóma ekosila ntango Nzambe akosilisa kobenga.” Alobaki lisusu liloba ata moko te, azuaki bobele ekoti na ye pe akendeki na ye.

¹⁴⁵ Esengeli na Liloba mpo na kosala yango. Ezali Liloba. Yesu alobaki na Satana: “Ekomami.” Bomoni? Ezali yango: “Ekomami.”

¹⁴⁶ Nalobaki: “Petelo alobaki ete ekosuka te. Baoyo nyonso Nkolo abengaki, Lipamboli oyo ezalaki mpo na bango. Sikawa bokoloba: ‘Asukisaki.’ Ntango nini?”

“Na likanisi ya mabe te?”

Nalobaki: “Te, misie, ata moke te. Kende liboso.” Ah-ha. Bobele wana. Bomoni?

¹⁴⁷ Petelo alobaki ete ezali mpo na moto nyonso oyo Nzambe akobenga, akozua Lipamboli yango moko ya bantóma. Yango—yango nde Liloba ya Nkolo. Bomoni?

¹⁴⁸ Sikawa, ezipelo ya mokili. Nzambe, Liloba, azipami na nzoto ya moto. Ezalaki nini? Nzambe azipamaki kati na Mose. Nzambe azalaki kati na Mose, azipamaki, pe Bozali ya Nzambe ezalaki kati na ye. Abongaki be ná Liloba yango kati na ye, kino asengelaki kozipa elongi na ye. Azalaki mosakoli oyo atatolami, oyo azipolaki Liloba pe alobaki na bango: “Okosala boye te! Okosala boye! Pe okosala boye te!” Bomoni?

¹⁴⁹ Mpo na kopesa Liloba na ye na ekeke wana, Amizipaki kati na moto moko, to Liloba ebomaki ata miso ya babengami mpo na kobima. Bomoni? Ata baoyo bazalaki kuna libanda, bakokaki komona yango te. Na—na Esode, tomoni yango, balobaki: “Tika ete Mose áloba, Nzambe te.” Bomoni ntina nini Likonzi na Móto emonanaka mingi-mingi te? Bomoni?

¹⁵⁰ Nzambe alobaki: “Na—Na—Nakosala yango. Nakopesa bango Mosakoli.” Amen! “Nakotelemisa moko kati na bango.” Pe Ayaki mpenza bongo. “Nakopesa, pe Akozala na, Akozala Liloba.”

¹⁵¹ Alobaki: “Soki balingi komona nini Liloba ezali...” Alobaki: “Sikawa, Mose, Namonanaki na yo kuna, na nzete ezali kopela.” Alobaki: “Nakokita pe Nakopelisa móto na ngomba wana.” Alobaki: “Bakoyeba ete olobaki solo. Nakomonana awa bobele na—na—na lolenge yango moko ya móto. Nakomonana

awa mpo na kotalisa bato polele, Nakotatola mosala na yo.” Yango nde Ayebisaki Mose awa, maloba nyonso wana.

¹⁵² Botala, Alobaki: “Sikawa Nako—Nakopesa yo nkembo liboso na bato.” Alobaki: “Sikawa, olobaki na bango ete Nakutanaki na yo kuna, na nzete ezali kopela; sikawa Nakokita, Mótó yango moko, pe Nakosala ete bato báyebe ete okosaki ata moke te mpo na likambo Yango.” Bokoki kotalisa Yango polele ata na nzela ya boyebi-na-bato, soki bolingi. Bomoni? “Nakokita mpo bákoka koyeba.”

¹⁵³ Pe ntango Abandaki konguluma, ntango Yawe abandaki konguluma, bato balobaki: “Te! Te! Te! Kotika Yawe koloba te; toko—tokokufa.”

¹⁵⁴ Bomoni, Asengelaki kozipama, boye Nzambe Amizipaki kati na Mose, pe Apesaki Mose Liloba. Pe Mose akitaki pe asakolaki Liloba na Nkolo, ná ezipelo likolo na elongi na ye. Ezali solo? Yawe azipamaki na lolenge ya mosakoli, mpo ezalaki, na ntembe te. . . Pe Nzambe alobaki ete Akoloba na bango lisusu ndenge wana te. Akoloba na bango bobele na nzela ya mosakoli. Yango nde nzela se moko oyo Akolobelaka kobanda ntango wana. Yango nde nzela se moko oyo Alobelaka. Ezali solo. Na nzela mosusu ata moke te. Akosaka te.

¹⁵⁵ Botala malamumu, bobele Mose nde azalaki na Liloba. Sikawa, ezalaki na e—etóngá moko te oyo ekitaki, ezalaki na Bafalisayi te, to Basadukayi, to ezalaki mwa—mwa lisanga moko te to etúká moko boye. Ezalaki Mose! Azalaki na moto moko. Akoki kozala na makanisi mibale to misato mikeseni te. Azuaka moto moko. Mose azalaki na Liloba, bobele Mose. Ata Yoshua azalaki na Yango te. Moto mosusu te azalaki na Yango. Amen! Yoshua azalaki gé—général; Yoshua azalaki mokambi ya mampinga; Yoshua azalaki mondimi, Moklisto. Kasi Mose azalaki mosakoli! Liloba ekoki koya na Yoshua te; Esengeli koya na Mose. Azalaki mosakoli monene ya eleko wana. Botala malamumu, Liloba eyaki ata moke te na Yoshua kino Mose akendeiki. Te, misie. Nzambe asalaka na moto moko na mbala moko. Nzambe azali moko. Bomoni? Boye, bobele Mose nde azalaki na Liloba, etóngá na bato te.

¹⁵⁶ Botala, Nzambe akebisaki bato nyonso ete bámeke kolanda Mose te kati na ezipelo wana; bamekoli. Bomoni? Mwasi, mobali, nganganzambe, ézala nani, ózala mosanto, ózala mobali, ózala na lokumu, bázala ndenge nini; Akebisaki: “Mose áya ye moko! Pe soki moto, ata nyama, amamí yango, asengelaki kokufa mbala moko.” Kokota sima na ezipelo yango ata moke te. Ezipelo yango ezali ya moto moko. Nsango yango ezali moko. Bomoni? Na tempelo, bobele moto moko azalaki kokota kuna mbala moko na mobu moko, apakolami pe abongisami mpo na kokota; mpo na kobima ná Liloba te, kasi kopesa mbeka ya makila. Ata mpo

na kokota kuna sima na Yango, bobele moto moko. Moto mosusu azalaki kokufa. Bomoni?

¹⁵⁷ Sikawa bazali kokufa na molimo. Oyo ezali ezipelo ya molimo. Bomoni? Oyo wana ezalaki ezipelo ya mokili. Oyo ezali ezipelo ya molimo. Bomoni? Bazali kokoba kokota kuna na sima, ata oyebisi bango. “Oh, nayebi! Nayebi yango, kasi ngai. . .”

Nalobaki: “Bókende liboso, ezali malamau, elingi bobele koloba. . .” Bomikanisela, bolozu ya suka na Ezipito ezalaki liwa, liboso na esode. Bolozu ya suka na mokili ezali liwa ya molimo, liboso na esode. Bongo bakozikisama pe bakokóma mputulú, pe bayengebeni bakotambola likolo na mputulú na bango. Kasi likambo ya suka ezali liwa ya molimo, bazali kobwaka Liloba.

¹⁵⁸ Sikawa botala, Nzambe akebisaki bato nyonso ete bámeke kolanda Mose kati na ezipelo ya Móto te. Mose asengelaki kozipama, asengelaki kobima bongo. Mose akotaki kuna lokola Mose, akotaki na Likonzi na Móto yango; pe ntango abimaki, azipamaki. Mpo ete, akotaki kati na Yango, libanda na mimesano na ye, mimesano ya bampaka. *Amónáká* Likonzi na Móto, kasi sikawa akoti *kati* na Likonzi na Móto. Bomoni? Amen! Pe abimaki, azipami. Liloba na Nzambe kati na moto, ezipami! Ye wana azali koya libanda, oh! la la! nakoki komona yango. Akebisaki ete moto mosusu ámeke te, moto moko te akoki komekola Yango. Komeka na yo te. Bomoni? Ata nganganzambe to moto mosanto, ézala nani, cardinal, epískópo, to nini mosusu, soki ameki kokota kati na ezipelo yango, azalaki kokufa. Nzambe akebisaki bango. Tokomekola yango ata moke te.

¹⁵⁹ Liloba na Ye emonisamaka na moto moko. Ezalaka ntango nyonso bongo, mosakoli azalaki koya ná Liloba na Nkolo, na eleko moko na moko, na ntango nyonso, kati na Makomi. Liloba eyaka na moto moko. Na bileko nyonso, ndenge moko, ata na bileko ya lingomba, kobanda ya liboso mpenza kino ya suka. Bamosusu bazalaka na bisika na bango, ezali solo, botala malamau, kasi bótíkala mosika na Likonzi na Móto wana. Bomoni? Tozali koyekola likambo moko monene awa! Bomoni, moto nyonso alingi kozala Mose, pe moto nyonso. . .

¹⁶⁰ Boyebi lisusu likambo Dathan ná bamosusu balobaki kuna? Balobaki: “Tala, Mose, zela naino mwa moke awa! Yo moko ozali komema mokumba mingi koleka, omoni. Tala, ezali na bato mosusu awa baoyo Nzambe abengi.”

¹⁶¹ Ezali ya solo. Bango, moko na moko na bango, bazalaki kolanda malamau, ntango nyonso oyo bazalaki kolanda, kasi ntango moto moko amekaki komata mpo na kozua esika Nzambe apesaki Mose, ye oyo abongisamáká liboso pe atiamáká mpo na mosala yango, ntango amekaki kozua yango, móto ekitaki, efungolaki mabelé pe emelaki bango mbala moko. Bomoni? Bomoni? Bokeba. Bomoni? Zalá se Moklisto malamau, mosanto

ya Nzambe, oyo azali kondima Liloba. Bomoni? Zalá mosika na Likonzi wana. Oyo ezali mpenza liteya!

¹⁶² Nzambe amonanaki liboso na Mose kati na nzete ezali-kopela-moto, Nzambe azipamaki na Likonzi na Móto. Sikawa boyoka malamumu mpenza, miniti moke. Nzambe ayaki liboso epai na Mose, Azipamaki. Nzambe azalaki kati na Likonzi na Móto, Amibombaki kati na nzete, bomoni; lokola sima na ba-mposo, bomoni, kuna, pembeni na ebóngá na mawa, na etumbelo. Bomoni? Azipamaki. Azipamaka ntango nyonso. Pe ntango Akómelaki Mose, Azalaki kati na Likonzi na Móto, Azipamaki kati na Likonzi na Móto. Kasi awa, liboso na bato, Nzambe atalolaki ye na nzela ya Likonzi na Móto yango moko. Bomoni? Mose alobaki . . .

¹⁶³ Sikawa botala malamumu. Bozali kososola? [Losambo balobi: “Amen.”—N.D.E.] Bozali kotika makanisi na bino kokende mosika? Bokoki? Bokoki. . . “Oyo azali na matoi, áyoka.” Bomoni?

¹⁶⁴ Ntango Nzambe amonanaki na Mose, ezalaki kati na Likonzi na Móto, ntango Abengaki ye na mosala na ye. Pe Mose ayaki koyebisa bato likambo yango. Bakokaki kondima yango te, ata asalaki bikamwa pe nyonso wana. Kasi, na mbala oyo, Amimosaki mpenza, amonanaki polele, pe Atalolaki mosala ya Mose, ete ezalaki Nzambe yango moko, oyo asololáki na ye, mpo Amimonisaki na lolenge ya Likonzi na Móto pe Apelisasi móto na ngomba. Eyáká na Mose kati na nzete, esololáká na ye. Malamumu.

¹⁶⁵ Komonana ya liboso ya Nzambe, epai na Mose, kati na nzete ezali-kopela-moto, ezipelo. Liboso na bato, Nzambe azipamaki lisusu pe atalolaki Mose, na nzela ya ezipelo, wana Amizipaki na Móto yango moko, Likonzi na Móto yango moko ekitaki. Kobanda—kobanda ntango wana. . . Kobanda na bango, mpo bákoka koyoka bobele Liloba na Nzambe. Bososoli yango? Bobele Liloba, bayokaki Mongongo na Ye. Mpamba te, Mose azalaki, mpo na bango, Liloba na bomoi. Mose! Bomoni, Nzambe atalolaki mpenza Liloba yango na nzela na Mose! Bomoni, Mose alobaki. . . Nzambe alobaki na Mose: “Kende kuna. Nakozala na yo elongo. Azali. . . Eloko ata moko te ekotelema liboso na yo. NAZALI OYO NAZALI.”

¹⁶⁶ Mose ayaki pe alobaki: “Ntango mosusu bokondima yango te, kasi Nzambe amonanaki na ngai kati na Likonzi na Móto pe Ayebisaki ngai makambo oyo.”

¹⁶⁷ “Oh, tozali na makambo ndenge na ndenge ya boye oyo esalemaka.” Falo alobaki: “Tala!” Mokengeli Falo alobaki: “Ee, kisolóka na yo ezali makasi te. Tala, ngai nazali na bato ya kisolóka awa baoyo bakoki kobongola nyoka na. . . lingenda—lingenda na nyoka. Boya awa, bato na solóka.” Pe bayaki wana pe basalaki ndenge moko.

168 Mose ayebaki. Eloko ata moko te etungisaki ye. Motángo boni ya bamekoli na bango, esalaki ata eloko moko te. Mose afandaki se kimia. Mbala moko, batámbolaki mwa moke, pe, mbala moko, nyoka ya Mose emelaki baoyo misusu nyonso. Bomoni? Mpo na nini? Lokola bantóma, bakokaki kolimbola Yango te. Mose ayebaki te ndenge Nzambe akosala yango, kasi Alingaki kosala yango.

169 Bomikanisela, Alobaki ete Yane ná Yambèle bakozonga na ntango ya suka, bomoni, bomekoli. “Pe bakopengwisa Baponami mpenza, soki ekokaki,” Matai 24:24. Bomoni? Makambo ndenge moko mpenza, bakosala bikamwa ya ndenge moko pe nyonso wana. Bótalela Liloba yango! Bótalela Liloba yango! Moto alobi ete alali ekamwiseli kasi azali kokoba kondima ete ba-Nzambe bazali misato, pe makambo nyonso wana; bókende mosika na bato ya ndenge wana. Toyebi ete ezali—ezali lokuta, bomoni, ezalaka te. Bomoni? Liloba, Liloba nyonso, Liloba nyonso oyo ekobima na monoko na Nzambe! Na Genèse, Liloba moko! Awa, elobami: “Kolongola te, to kobakisa liloba moko te.” Bomoni, esengeli kozala Liloba yango moko. Bomoni?

170 Botala, bato bamonaki ete likambo moko esalemaki. Mose azipamaki, lokola...Azalaki mosakoli, pe sikawa Nzambe atatulaki Liloba na Ye, akendeki kuna. Pe amonaki bilembo pe bikamwa. Na sima, malamu, bato oyo bakabwanaki bango moko, lingomba. Bomoni, *lingomba* elingi koloba “kobengama libanda.” Bomoni? Sima na bango kobengama libanda na mokili pe kokóma libota, bomoni, na ntango wana Nzambe Amitikaki koyebana, ete Ye azalaki Likonzi na Móto yango. Atatulaki nsango ya Mose. Bomoni? Azalaki Likonzi na Móto. Bakokaki kokanga Yango fotó, nabanzi, soki bazalaki na ba-cameras, mpo ezingamaki nyonso na Móto. Kasi ba—batalisaki polele ete, Nzambe atalisaki polele ete Nsango yango ezalaki solo. Nsango ebelemaki, makambo nyonso, balingaki nan tango wana kobanda kosala mobembo. Azipaki mosakoli na Ye liboso ya libota oyo elingaki kosala mobembo.

171 Bókanisa naino, bato bamonaki ete likambo moko ekómelaki ye. Akesanaki sikawa na libota mobimba ya Yisalaele. Akómaki ndenge mosusu, nsango na ye ezalaki ndenge mosusu, akesanaki na banganganzambe, akesanaki na makambo nyonso. Bomoni, akómaki moto ya ndenge mosusu. Bato bamonaki ete likambo moko esalemaki. Nzambe Amizipaki kati na mosakoli na Ye, mpo na kolobela bango Maloba na Ye. Ezali yango nde Asalaki. Mose azalaki Liloba yango ya bomoi mpo na bato, ezipamaki na Likonzi na Móto, ezalaki kotalisa makambo masengelaki kozipama ndélé, na sima ya ba-mposo ya gambala. Bomoni?

172 Liloba esengelaki kouta na Mose, liboso. Bomoni? Mose moto azalaki na Liloba. Ekomamaki na Nzambe, moto moko te akokaki kolimbola Yango, Mose asengelaki kolimbola Yango,

liboso. Yango wana azipaki elongi na ye, mpo a...Bozali komona Yango? [Losambo balobi: “Amen.”—N.D.E.] Bomoni?

Yango *oyo*. [Ndeko Branham azui Biblia na ye.—N.D.E.] Tokoki kozua Yango, komema Yango, pe nyonso mosusu wana, kasi Esengeli komonisama. Mpo na komonisa, Mose asengelaki kokóma Nzambe mpo na bato.

Bokoloba: “Ezali boléma.”

173 Tala, Ayebisaki, ayebisaki ata na Mose, Ye moko: “Okozala Nzambe, pe Arona akozala mosakoli na yo! . . . ? . . .” Bomoni? Na bongo, Ayaki kuna, bomoni, Asengelaki komizipa, mpo Nzambe azalaka ntango nyonso sima na ezipelo. Oh! la la! Bozali komona Yango? [Losambo balobi: “Amen.”—N.D.E.] Nzambe abombami mosika na bato.

174 Alobaki: “Tata, Natondi Yo, Obombi Yango mosika na bato ya bwanya pe ya mayele, pe Omonisi Yango epai na bana mike, na baoyo balingi koyekola.” Bomoni?

175 Nzambe abombami sima na ezipelo Mose azipaki elongi na ye. Mose azalaki Liloba na bomoi ezipamaki ntango wana. Bato bamonaki Likonzi na Móto yango, balobaki: “Sikawa tondimisami.” Bomoni? “Tika Mose áloba.” Bomoni? “Nzambe áloba te, likama ete tókufa.” Mose akotaki kati na Likonzi na Móto yango. Bomoni?

176 Bongo Alobaki, Alobaki: “Sikawa Na—Nakoloba na bango lisusu boye te. Nakopesa bango mosakoli.” Bomoni? Pe Asalaka ntango nyonso bongo. Bomoni? Alobaki: “Sikawa, tika bango bákende kuna.” Kasi mosakoli oyo asengeli kozala na Liloba oyo. Soki azipami na mimesano, Nzambe atindaki ye ata moke te. Soki azipami na Liloba, Nzambe akotatola Yango. Nzambe alimbolaka Liloba na Ye moko. Mose alobaki Yango; Nzambe alimbolaki Yango. Amen.

177 Mose alobaki: “Nkolo alobi bongo!” Pe Nkolo azalaki kosala makambo Alobaki. Yango nde ekomisaka Yango solo.

178 Sikawa Alobaki: “Sikawa, Mose, ososoli. Bato basosoli sikawa. Omoni, Natalisi yo, Natatoli yo.” Nzambe Amizipaki kati na mosakoli oyo, mpo na kolobela bato Liloba na Ye. Mose azalaki Nzambe na bomoi, mpo na bango, Liloba na bomoi ya Nzambe, etalisami polele. Yango wana elongi na ye ezipamaki. Bomoni?

179 Pe boyebi ete likambo yango moko kati na Moklisto ya solosolo ezipami lelo mpo na bazangi kondima? Bamonaka basi oyo bazali na suki milai pe nyonso wana, balobaka ete ezali. . . “Tala wana na lolenge ya kala.” Basi oyo bazalaka na suki na bango milai tii na mokongo, bato balobaka: “Ozali na piné ya kotoboka, na piné mosusu na motó.” Bomoni, ezipámá na mobimba. Bazali bakufi miso. “Oh,” balobaka, “Nazali na diplome ya philosophie, mo. . .” Ata ozali na eloko nini, ozali

bobele moyínga ya Liloba. Ya solo mpenza. “Oh, oyo kuna, wana ezali eloko ya moke. Ngai . . .” Yékola liboso makambo ya mike.

¹⁸⁰ Tóloba nini mpo na bato balobaka ete bazipámi Liboso na Nzambe, kasi bateyaka mimesano ya lingomba? Oh, mawa mingi mpenza! Babakisaka pe balongolaka, pe makambo nyonso wana, ntango bakotisaka makambo na bango moko pe makanisi na bango moko, kasi Liloba na Nzambe te, bomoni, ezali ezipelo ya ndenge nini? Bazali na ezipelo ya mangomba. Nzambe apasolaki ezipelo yango na mobimba mpenza!

¹⁸¹ Balobaka: “Likambo lokola basakoli ezalaka lisusu te. Na mikolo ya suka oyo, likambo lokola bantóma ná basakoli ezalaka lisusu te. Likambo lokola lobiko na nzoto kouta na Nzambe ezalaka lisusu te. Likambo lokola bamóni ezalaka lisusu te. Likambo lokola Malako 16 kokokisama ezalaka lisusu te. Ntango ya bantóma esílá.” Bazipí Yango mosika na bato. Kasi Nzambe abimaki ná Molimo Mosanto na Ye ya Móto, pe Apasolaki ezipelo yango kobanda likolo kino na ns- . . . [Maloba oyo ezangi na bande—N.D.E.] Nzambe apasolaki ezipelo yango.

¹⁸² Mose azalaki ezipelo, Liloba na bomoi ya Nzambe ezipami sima na nzoto ya moto. Likonzi na Móto ezalaki kati na Mose, na ntembe te, kotalisa makambo masengelaki kozipama ndélé, sima na ba-mposo, bomoni.

¹⁸³ Sikawa, yango, Liloba, Liloba epesamaki, na sima Ekomamaki, na sima Etiamaki na sima pe ekobaki Kozipama, mpo Nzambe azalaka ntango nyonso kati na Liloba yango. Amen! Azali Liloba, ntango nyonso. Azalaki kati na Liloba yango. Yango wana Liloba yango esengelaki kozipama.

¹⁸⁴ Oh, ndeko mobali, ndeko mwasi, bozali kososola Yango? [Losambo balobi: “Amen.”—N.D.E.] Botala! Bozali komona te? Ezipamaki kati na bileko oyo, kokokana na oyo Nzambe alobaki, pe Ekofungwama na mikolo na suka, Bilembo Nsambo yango ekofungwama, pe Eloko yango na mobimba ekomonana polele na miso ya bato, makambo masalemaki na ntango nyonso oyo. Ntango ya Nsango ya mwanje na nsambo, mabombami nyonso ya Nzambe ekomonisama na Eliya yango, na ngonga oyo ya suka; lolenge Klisto atiami libanda na lingomba na Ye, Mwana na Nzambe; lolenge Amonisami lisusu lokola Mwana na moto; lolenge Lingomba esengeli kotiyama na molongo, ná makambo nyonso mpo na ntango ya suka, endimeli moko te, ebongiseli moko te, bobele Liloba kobika kati na moto. “Nakozua moko, pe Nakotika mosusu. Nakozua oyo, pe Nakotika oyo wana.” Bomoni? Ezali bobele. . . Ezali na kokangama moko te, bibongiseli te, bikanganelo to eloko mosusu te; ezali motema ná Nzambe, pe bobele Ye. Bomoni?

¹⁸⁵ Botala malamau, kozipama na nzoto ya moto. Mose ná Liloba yango, ezalaki kotalisa makambo masengelaki kotiyama, ndélé, sima na mposo ya gambala. Bongo yango. . . Lokola pe

Klisto azali Mose na biso. Klisto azali Mose na biso. Azalaki Nzambe oyo azipami na nzoto ya moto, azipami na bomoto, na nzoto. Ezali solo. Pe Azali motindo moko lobi, lelo pe libela. Azipamaki na ba-mposo ya gambala. Azipamaki. Pe na ntango oyo Azipamaki kati na Moto. Bomoni? Sikawa bótala malamumu, “motindo moko lobi, lelo pe libela,” alakaki Liloba na Ye mpo na eleko oyo. Azali bobele Klisto, Liloba oyo elakamaki mpo na eleko oyo, Ezipami kati na nzoto ya moto. Liloba ezali Nzambe.

¹⁸⁶ Epakolami ezali moto. Liloba oyo *Klisto* elingi koloba oyo apakolami, bomoni, “mopakolami.” Boye, Mose azalaki Klisto na eleko na ye, azalaki mopakolami. Yilimia azalaki Klisto na eleko na ye, ná eteni ya Liloba mpo na eleko wana.

¹⁸⁷ Kasi ntango Klisto ayaki, Ayaki lokola Mosikoli Mopakolami; pe wana ezalaki na mbala moko Mose ná nyonso ezalaki kati na Mose, ná Liloba nyonso, ná Bonzambe nyonso kati na nzoto ezalaki kati na Ye. Yango wana ezipelo mobimba ya tempelo epasukaki, pe ebóngá na mawa emonanaki polele mpenza, Azalaki Mopakolami.

¹⁸⁸ Botala sikawa, ezipelo na nzoto ya moto, Liloba elakamaki mpo na eleko oyo esengeli pe kozipama. Botala malamumu. Bandimi ya mangomba oyo balingaka masumu ná basumuki bakoki komona Yango te mpo na ezipelo ya moto.

¹⁸⁹ Yango wana bakokaki komona Ye te. “Ee, Azali moto. Aútá wapi? Azali na kálati ya lingomba nini? Azali moto ya lingomba nini?” Nalingi kolobela yango na mpokwa ya lelo: “Azali moto ya lingomba nini?” Bomoni? Na bongo, bomoni, sikawa: “Azali moto ya lingomba nini, ya—ya etóngá nini? Atángaki kelasi nini? Ayekolaki wapi? Ee, Moto oyo abótamaki, kokokana na mimesano, to kokokana na—na lisolo bato balobelaka Ye awa, Moto oyo abótamaki libanda na ekanganelo mosanto ya libala. Ee, Ye, na ntembe te, Azali ya zabolo. Bomoni, Azali—Azali ya zabolo. Abótamaki libanda na ekanganelo mosanto ya libala, pe Yosefe abalaki ye mpo báboma ye na mabanga te, mpo azalaki mwasi ya ekobo. Bongo Moto yango nde ayei mpo na koloba na biso ba-nganganzambe makambo tosengeli kosala?”

¹⁹⁰ Pe Nzambe azalaki wana, komonisa Liloba yango, kogángá: “Nzambe na Ngai, mpo na nini Otiki Ngai?” Ba-nzembo mpenza oyo bazalaki koyemba na tempelo, oyo Dawidi asáláká mpo na bango eleki mibu mingi, ezalaki kolobela Klisto. “Mikuwa na Ngai nyonso bazali kotala Ngai pii. Batoboli maboko na Ngai pe makolo na Ngai.” Pe kuna bazalaki wana, koyemba yango, pe Moto yango mpenza azalaki kobunda na liwa na ekulusu. Pe ntango basilisaki pe . . .

¹⁹¹ Ntango Akufaki, Nzambe ya Lola akitaki, ndenge Asalaki na Ngomba ya Sinai, ná Móto ya Bule, pe Azikisaki ezipelo ya tempelo yango kobanda likolo kino na nse, Apasolaki yango. Bongo bakokaki kosala nini? Kotala se kuna na lininisa ya

tempelo, na Kalvari, pe tala, Nzambe azalaki wana, polele liboso na bato, Mbeka.

¹⁹² Kasi ata bongo bazali komona Yango te, lelo. Nzambe, na ntango oyo ya suka, apasoli mimesano yango nyonso, pe Atalisi Liloba ya eleko oyo polele mpenza liboso na bato, kasi bazali kaka koyeba Yango te. Bayebi Yango mpenza te. Ezali—ezali mpenza petee. Bomoni, ezali mpenza na bopetee mingi. Ezali mpenza mosika na makambo ya mokili.

¹⁹³ Mokolo mosusu nateyaki na liyangani moko, likolo na “Kozala libóma.” Moko na mikolo oyo nalingi kolobela yango, “Kozala libóma.” Bisó banso tozali bato ya mabóma mpo na moto moko, na bongo—na bongo ngai nakozala moko mpo na Klisto. Polo alobaki ete “abengamaki moto ya libóma.” Ya solo, osengeli kozala bongo. Bomoni, esengeli na ebende ya écrou mpo na kokangisa biloko makasi. Bomoni? Ya solo.

¹⁹⁴ Na bongo, botala malamú, ezipelo, nzoto ya moto. Te, sikawa, bato-balingaka masumu bakokaki komona yango te. Basambeli oyo bakangámá na mimesano, bakokaki komona yango te, mpo Azalaki moto. Mpo na nini? Nzoto ya moto yango ezalaki kobomba Nzambe.

¹⁹⁵ Sikawa, soki Azalaki Likonzi na Móto monene oyo ekitaki, bomoni, soki Likonzi na Móto monene ekitaki pe etalisaki bango nani Ye azalaki, ete Azalaki Likonzi na Móto monene oyo, bakokaki kondima yango; soki Yawe azalaki zingazinga na yango.

Kasi bomoni makambo Asalaki, mpo Ákoka koleka pembeni na bato ya mayele wana, bato ya bwanya, Amimonisaki Ye moko ndenge Alakaki na Mose, bomoni: “Nakolobela bango na nzela ya Mosakoli.” Pe Azalaki Mwana na moto, Mosakoli. Pe bamosusu na bango basosolaki Yango, pene na moto moko na mokáma likolo na mokáma na mokili mobimba, bandimaki Yango; bamosusu bandimaki te. Kasi Azalaki, se motindo moko.

¹⁹⁶ Kasi Nzambe na Nguya azalaki wana, na polele liboso na bato nyonso, Ebóngá ya Mawa! Akufaki ntango bana na Ye moko bazalaki koloba . . . Bana na Ye moko kuna, balobaki: “Bisó toboi Ye! Álongwa wana!” Babwakelaki Ye nsói.

¹⁹⁷ Elílingí, kalakala mpenza, ntango Dawidi abimaki na tempelo, mokonzi oyo aboyami. Azalaki kotambola na balabala, pe mwa ebósono moko, oyo azalaki konguluma na nse, alingaki ye ata moke te, abengaki ye “yo mokosi” to eloko ya ndenge wana, abwakelaki ye mpenza nsói na elongi. Pe mokengeli wana abimisaki mopánga, alobaki: “Nátika motó ya mbwa wana likolo na ye, wana abwakeli mokonzi na ngai nsói?”

¹⁹⁸ Dawidi alobaki: “Tika ye, Nzambe moto atindi ye.” Ntango mosusu Dawidi ayebacki te likambo oyo alobaki. Amataki likolo na ngomba, abwakaki miso na sima pe alelaki.

199 Mibu nkama mwambe na sima, Mwana na Dawidi azalaki komata ngomba yango moko, atalaki na mosika, alelaki likolo na Yelusaleme, Mokonzi oyo aboyami. Pe babwakelaki Ye nsói na elongi.

200 Bozali komona te? Ezali ndenge moko. Bozali komona ndenge Liloba yango ezali koya, kolandana kino lelo? Eboyamaka ntango nyonso na boike na bato, bomoni, pe Endimamaka na bato moke.

201 Sikawa, bomoni, bakokaki kondima Yango te. Ba-Greki wana, bakokaki komona Ye te, Azalaki kati na tempelo na Ye ya bomoto. “Ee,” balobaki, “nkombo ya moto oyo ezali Yesu; Auti na Nazalete.”

202 Sikawa, na eleko wana, bazalaki bobele na nkombo moko. Ndakisa, “Yoane, Jimi,” balobaka, “Yoane ya Jeffersonville, Jimi ya New Albany,” to eloko moko ya ndenge wana, bomoni.

203 Alobaki: “Oyo nde Yesu ya Nazalete. Bato nyonso balobaka ete mama na Ye akúmbaki zemi na sodá.” Bomoni? Na bongo, bazalaki kokanisa mpenza bongo. Ya solo! Pe tóloba, bongo, balobaki: “Oyo nde Yesu ya Nazalete.” Bomoni? “Azali Nani?” Bomoni, bakokaki kososola Yango te.

204 Kasi, ee, Liloba oyo mpo na eleko wana, ntango Azalaki koteya, Alobaki: “Bólukaluka na Makomi. Na Yango nde bokanisaka ete bokozua Bomoi na Seko, pe Yango nde etatolaka Nani Ngai nazali. Soki bokoki kondima Ngai te, bóbosana Ngai, lokola ezipelo, bóndima Liloba oyo ezali kobima. Mibale ezali litatoli,” Alobaki, “Ngai nazali koloba pe Tata azali kolobela Ngai.” Amen. Ya solo.

205 Ngai nalobelaka Liloba ya eleko oyo, pe Tata atitolaka Yango. Sikawa, ezali litatoli mpo na bino? [Losambo balobi: “Amen.”—N.D.E.] Ezali bongo, bomoni. Ezali bongo nde esengeli kokokisama.

206 Botala na Bakolinti ya Mibale sikawa, mo. . . na Bakolinti ya Mibale, mokapo ya 3, molongo ya 6, na tempelo ya kala, Nzambe afandaki sima ya ba-mposo ya kala, kopekisa Bayuda komona. Ntango ezipelo ya kala epasukaki, Bayuda bakobaki se. . . babomamaki miso mpo na koyeba Nani Ye azalaki, pe Nani Ye azali naino. Na bongo, Pantekote emonisaki Nani Nzambe ya solo pe ya bomoi azalaki, ntango Nzambe akataki ezipelo wana na biteni mibale, kobanda likolo. Mpo na nini ezipelo yango esalaki bongo? Mpo na nini esalemaki bongo?

207 Mpo na nini Nsango ya boye eyei lelo mpo na kosala makambo Esalemaki? Eyei mpo na nini? Mpo na nini?

208 Moto moko alingaki kobenga ngai, mokolo moko awa, kala mingi te, alingaki kowelana na ngai na ntina na—na eleko ya lingomba, ete “Nzambe azalaki kati na lingomba na Ye mosanto,” pe makambo ya ndenge wana. Pe nayaki

koyeba ete ezalaki mwasi motei, pe nabosanaki likambo yango. Bomoni, soki ezalaki mobali elingaki kozala malamumu mpenza, elingaki kozala ndenge mosusu. Kasi, na boye, kasi ntina nini kokende mosika kuna, na ekólo mosusu, ntango nasengeli kotika liyangani moko awa, mpo na kosala bongo, bomoni? Na boye, natikaki bango bongo. Soki mokufi miso akambi bakufi miso, bango—bango nyonso bakokweya na libulu.

²⁰⁹ Boye, boye, sikawa, na eleko oyo, ezipelo ya kala, ya bibongiseli pe mimesano, oyo ezalaki kozipa Liloba na Nzambe, ntango epasukaki, ezali mpo Ékoka kotalisama! Bomoni likambo nalingi koloba? Mimesano elobaka: “Makambo nyonso wana esíli koleka.” Tika Yango ékota mwa moke. “Makambo yango esíli koleka.” Kasi, na eleko oyo ya suka, ezipelo ya mimesano yango esilaki kopasuka, pe Likonzi na Móto etele mi awa. Bomoni? Ye oyo awa, kotalisa Liloba mpo na eleko oyo. Ezipelo esili kopasuka.

Sikawa, mokili, bazali kaka kondima Yango te. Ata ndenge nini, bakomona Yango te. Bakomona Yango te. Etindamaki mpo na bango te.

²¹⁰ Bomikanisela, Mwana na Nzambe amonisamaki na Sodoma te; ezalaki batindami mibale. Ezali solo.

²¹¹ Kasi, oyo, Nzambe Ye moko, na nzoto ya moto, amonisamaki na Abalayama, Moponami. Pe botala malamumu likambo Asalaki mpo na komimonisa Ye moko. Sikawa, Abalayama ayebaki, ntango Asosolisaki makambo ezalaki na makanisi ya Sala, sima na Ye, alobaki, abengaki Ye “Elohim! Mosali na Yo . . .”

²¹² Botala malamumu sikawa, mpo yango ékoka kotalisama. Liloba ezalaki na ezipelo likolo na Yango mibu nyonso oyo, mpo na bato: “Ekoki kosalema te.”

²¹³ Bomikanisela liteya nateyaki na ntongo ntango nalongwaki awa, mbala ya liboso, likolo na Goliath ná Dawidi? Nalobaki: “Botala mobundi wana, azalaki koloba ete ‘mikolo ya bikamwa esíla koleka.’”

Bótala ba-bande wana, ndenge elandanaki, bótala bande moko na moko, ndenge ezali kokóma polele koleka moko sima na mosusu; soki ozali na matoi ya koyoka, bomoni, miso ya komona.

Ezali nini? Nalobaki: “Bato ya mangomba minene bazali kuna, balobaka, na eleko oyo ya bato na mayele, ete ekoki kosalema te.” Kasi nalobaki: “Nzambe . . .” Kati na Pole yango, liboso bákokoka kokanga Yango fotó, ata mbala moko; bakangáká naino Yango fotó te na ntango wana. Esalemaki kuna na ebale; bakangaki Yango naino fotó te. Bomoni? Nalobaki: “Ayebisaki ngai ete ekosalema; Akosala mbela na Ye pe ekotambola na bikólo nyonso.”

²¹⁴ Ata Docteur Davis, alobaki: “Yo moto otángá bobele na eteyelo ya liboso, osúka na kelasi ya nsambo, okobondela mpo

na bakonzi pe ba-nkúmú, pe okobanda kolamuka oyo ekokende na bikólo nyonso?”

Nalobaki: “Yango nde Alobaki.”

215 Pe ekokisamaki. Bomoni? Bomoni, ekokisamaki. Yango wana, ezali yango, Azali na bosenga ya ndimbola te. Akokisaki yango. Bomoni, Asili kokokisa yango, yango emilimbolaka yango moko, bomoni, ezali kobenga Baponami na Ye, bomoni, kobima na—na bisika ndenge na ndenge. Sikawa esili kotalisama.

216 Nalobaki ete Dawidi azalaki wana, mwana moke ya nzoto mike, mokongo egúmbámá, asimbaki bilingóngo. Pe, ee, Saulo, mokonzi ya lisanga ya batei, atalaki ye pe alobaki: “Ee, yo, oyekolisami ata moke te!” Alobaki: “Nakotála soki nakoki kopesa yo Diplome ya Philosophie to eloko moko.” Alatisaki ye bibundeli, yango. . . Amonaki ete yango elongobanaki te na moto na Nzambe.

217 Alobaki: “Bólongola ngai eloko oyo.” Alobaki: “Nayebi makambo oyo ata moke te.” Alobaki: “Bótika ngai kokende na lolenge ngai nayebi, lolenge oyo nabundáki na nkosi, lolenge nabundáki na ngombolo.” Azalaki lokola moto ya zamba. Alobaki: “Botika ngai kokende bongo.”

218 Pe moto yango Goliata alobaki: “Botindi nde mbwa mpo na kobunda na ngai?” Alobaki: “Nakotobola yo na nsonge ya likonga na ngai pe nakotombola ebembe na yo wana mpo badeke bália yango.”

219 Dawidi alobaki: “Oyei kokutana na ngai lokola Mofilistia, ná ebundeli pe likonga, ngai nakokutana na yo na Nkombo na Yawe, Nzambe ya Yisalaele.” Botala malamú mosakoli, Dawidi, alobaki: “Lelo nakokata motó na yo likolo na mapeka.” Amen! Oh! la la! Ayebaki eloko nini azalaki na yango, nani ye andimelaki, pe andimaki na motema mobimba ete Ye azalaki na makoki ya kokokisa likambo oyo etiami na maboko na Ye. Bomoni? Boye, ata bongo, ekokisamaki.

220 Elobamaka ete: “Ntango ya bikamwa esíli koleka,” bitutú esílí kobukana! Yawe azali naino komonana polele mpenza, kotalisa Liloba na Ye, Azipolami. Ya solo. Botala.

221 Lingomba ya Mabota pe esílí kobomama miso liboso na ezipelo, sima na yango kopasuka pe komonisa Nzambe polele, ezipelo ya mangomba. Ndenge nini? Ndenge Liloba ezipami lisusu kati na moto. Ezali mpenza yango nde Yisalaele azangaki komona. Soki ezalaki Mwanje to eloko moko, Yisalaele alingaki kondima Yango. Kasi lokola ekokaki kozala Mwanje te, esengelaki kozala moto. Amen!

Nzambe akoki kobuka Liloba na Ye te. Na mikolo na suka esengeli lisusu kozala likambo yango moko. Bomoni? Eloko nini ebomaki miso ya Yisalaele? Moto wana. “Yo ozali Moto, Ozali komikómisa Nzambe.” Yango nde ntina babomaki Ye,

pe, lelo, mpo Nsango eyei na nzela na moto kasi na nzela na Banje te. Bomoni? Nzambe akoki kobongola lolenge na Ye te, Akoki kobongola Liloba na Ye te. Alobaki ete Abongwanaka te. Bomoni? Botala, elakamaki! Pe lelo oyo bato ya Mabota babomami miso lokola Yisalaele abomamaki miso, mpo na (nini?) ezipelo. Nzambe azipamaki kati na moto, ebomaki miso ya Yisalaele.

Botala malamumu, ntango nyonso moto moko abomamaka miso. Moko, Ekoboma ye miso; mosusu, Ekomonisa ye Solo. Ekozipa miso ya bamoko, pe Ekofungola miso ya bamosusu.

²²² Botala, Yesu atelemaki pe alobaki: “Ee, nkombo na yo ezali—ezali—ezali Simona, pe nkombo ya tata na yo ezalaki Yona.”

Alobaki: “Nkolo Nzambe!” Bomoni? Filipino . . .

Alobaki: “Ndenge nini Oyebaki ngai?”

Alobaki: “Tala Moyisalaele oyo azangi bokosi kati na ye!”

Pe alobaki: “Labi, ntangi nini Oyebaki ngai?”

²²³ Alobaki: “Liboso Filipino ábenga yo, ntango ozalaki na nse ya nzete, Namonaki yo.”

²²⁴ Alobaki: “Labi, Ozali Mwana na Nzambe. Ozali Mokonzi ya Yisalaele.”

²²⁵ Ee, bato mosusu bazalaki wana, koloba: “Azali Belezebula.” Bomoni? Esalaki nini? Efungolaki miso ya bamoko, Ebomaki miso ya bamosusu. Ba-nganganzambe balobaki nini? “Tala, Moto yango azali Belezebula!”

²²⁶ Mwasi moke wana alobaki: “Nayebi ete Masiya akoya, Ye oyo abengami Mopakolami. Omoni, Ye Mopakolami akoya. Tozalaki na basakoli te . . . Osengeli kozala mosakoli. Kasi Ye Mopakolami akoya. Tozali kozela Ye. Oyo ezali mikolo ya suka mpo na Mabota . . . to mpo na Bayuda.” Alobaki: “Oyo ezali ntango ya suka.” Bomoni, Basamalia ná Bayuda bazalaki kozela Masiya. Bomoni? Alobaki: “Oyo ezali ntango oyo Asengeli komonana. Toyebi ete ntango Akoya, Akosala makambo oyo. Akolobela biso makambo oyo.”

Yesu alobaki: “Ngai nazali Ye.”

Miso na ye efungwamaki; ba-polisi, ba-nganganzambe babomamaki miso.

²²⁷ Yango nde Nsango Malamumu esalaka ntango nyonso. Efungolaka miso ya bamoko, epesaka emoniseli ya Solo na bamoko, wana Ebomaka miso ya bamosusu; ezali na ndimbola mibale. Bamoko bakoki kozua Mwana yango, kotala mpenza kati na Ye, pe kokufa miso; bamosusu bakoki kozua Ye pe kozonga elongo na Ye. Yango nde bokeseni.

²²⁸ Ndenge esalemaki na bileko nyonso, Bonzambe ezipamaki kati na nzoto ya moto. Botala malamumu, Asalaki yango. Basakoli bazalaki Bonzambe, ezipami. Bazalaki Liloba na Nzambe (ezali

solo?) ezipami kati na nzoto ya moto. Bongo, bakebaki pe na Mose na biso te, bomoni, Yesu.

²²⁹ Botala malamumu, oyo ezipamaki sima ya ba-mposo ya gambala na tempelo ya kala, ezalaki Liloba, ezalaki Liloba etalisamaki na bitando ya mabanga.

²³⁰ Sikawa, nakomeka kosukisa na pene na miníti ntuku mibale sikawa, soki nakokoka, mpo tósilisa na ngonga ya zomi na moko na ndambo. Botala malamumu, soki botali malamumu, nalekisi nkasa mosusu awa, bomoni, mpo na koboya. . . ezali te mpo na, nakokata. . . mpo na koyeisa yango molai koleka. Nayebi ete bozali koyoka molunge, bolembi.

²³¹ Sima na tempelo ya kala, kati na ezipelo, eloko nini ezalaki kuna na sima? Yawe azalaki nini? Eloko nini ebombamaki kuna na sima? Ezipelo ezalaki kobomba eloko nini? Oh, aleluya! Ezipelo ezalaki kobomba nini? Ezalaki kobomba Liloba. Ezipelo, ba-mposo ya gambala ya kala, ebombamaki, ezalaki kobomba Liloba na miso na bango ya mokili. Kuna na sima, mapa ya kolakisama pe ezalaki. Kuna na sima, Nkembo ya Shekinah pe ezalaki. Kasi nyonso wana Ebombamaki na miso na bango. Nyonso wana ebombamaki. Nkembo nyonso ya Nzambe ezalaki mpenza sima na mposo ya gambala ya kala yango, ezali solo, nyonso wana ebombamaki na miso ya mokili.

²³² Ezali pe bongo lelo. Ebengamaka “etonga ya batúntuki, bilándálanda,” kasi bayebi te eloko nini ebombami kuna na sima. Yango nde likambo bayebi te. Bomoni?

²³³ Bongo, ntango Nzambe, na mawa, apasolaki ezipelo mpo bámona, bakangamaki mingi na mimesano na bango kino. . . ebombamaki naino mpo na bango, atá kino lelo.

²³⁴ Ndenge moko sikawa! Nkembo, Nguya ya Molimo Mosanto, Nkembo ya Shekinah, oyo ekitaka likolo na mondimi, nalingi koloba mondimi ya solo sikawa, oyo esalaka ete misala na Nzambe pe kondima ékota kati na ye, mpo na kondima Liloba na Nzambe, nyonso wana ebombami na miso na bango. Balobaka: “Makambo wana esilá.” Bomoni, bazali naino kobika sima na ezipelo.

Bozali lisusu sima na ezipelo wana te, Bana mike, Nzambe asili komitalisa polele liboso na bino.

²³⁵ Mokolo mosusu, Ndeko Fred Sothmann, Ndeko Tom Simpson. . . nayebi te soki akómaki awa to te. Tozalaki ebele kuna na lingomba moko Batiste, pe motei alobaki likambo moko ya malamumu mpenza. Bisó nyonso tolobaki: “Amen!” Bato nyonso kati na losambo batómbolaki kingo mpo na kotala na sima. Bomoni? Bomoni? Tozuaki eteni moko ya mapa oyo eutaki sima na Shekinah, kuna, boyebi, pe tosepelaki moke mpo na kozua yango. Tolobaki, na elobeli mosusu: “Matondi, Nkolo!” Bomoni? Pe, ntango esalemaki, bato yango bazipamaki mpenza miso pe batiolaki yango. Bayebaki Yango nyonso wana ata moke te.

Bomoni? Bazali naino kozipama. Boye, bamoko bazali na kati pe bamosusu libanda. Na bongo. . . Kasi Nzambe atalisami polele liboso na biso, abombami. Ndenge moko sikawa!

²³⁶ Bongo, ntango Nzambe, na mawa na Ye, apasolaki ezipelo, Atalisamaki polele. Kasi, bakangamaki mingi na mimesano na bango, Azalaki naino kobombama mpo na bango.

Ndenge moko sikawa! Nkembo nyonso wana, ebómbámi, ebómbámi mpo na biso kati na Klisto, Liloba, Ye nde Tempelo na biso.

²³⁷ Oh, sikawa, nasengeli kotimola likambo oyo mwa moke. Bolimbisa ngai mpo na ndenge nazali komiyoka na ntongo oyo, kasi, oh, na—nalingaki likambo oyo uta kala, ngai. . . ezali mpenza kotoka kati na ngai. Bomoni?

²³⁸ Botala malamau, Nkembo nyonso oyo ezali kati na Nzambe ezali kati na Liloba. Mapamboli nyonso oyo ezali kati na Nzambe ezali kati na Liloba. Ebombami, mpo na mozangi-kondima, na nzela ya mimesano. Bomoni likambo nalingi koloba? Kasi nyonso Ezali kati na Klisto. Nyonso oyo Nzambe azalaki, *Amisopaki*, “kenos,” pe Akotaki kati na Klisto; pe biso, kati na Klisto, tozali sima na ezipelo.

²³⁹ Okoloba: “Ee, ngai nazali kati na Klisto.” Na sima ondimaka ete ba-Nzambe bazali misato? Obatisaka na nkombo ya “Tata, Mwana pe Molimo Mosanto”? Ondimaka mimesano nyonso wana, pe makambo nyonso oyo ondimaka, ya ba-mpaka? Te, ozali naino sima na ezipelo. Omoni? Kota kati na ezipelo. Ye, Klisto, azali Liloba.

²⁴⁰ “Ndenge nini? Nandimaka kobikisama ya bo-Nzambe te. Nandimaka bikamwa pe makambo ya ndenge Wana te.”

²⁴¹ Ee, omoni, ozali—ozali na kati te, kati na ezipelo. Oyebi Yango ata moke te. Omoni? Klisto azali Liloba! Pe ntango tozali kati na Liloba, tozali kati na Klisto. Bongo ndenge nini nakoki kozala kati na Klisto pe koboya Klisto? Ezalaki Ye nde alobaki: “Liloba ata moko te ekobakisama to ekolongolama.” Bongo, ndenge nini okoki kolongola to kobakisa? Omoni, ezali kotalisa yo ezipelo nini omizipelaki. Omoni?

²⁴² Bisó kati na Ye! Na bongo, lokola tozali kati na Ye, tozali se kozipama liboso ya basambeli pe balakisi minene ya mokili. Bomoni, Nkembo oyo tozali kosepela na yango, tozali se kozipama mpo na bato ya libanda. Bakanisaka biso tozali mpenza “bato ya mabómá, ba-écrou”, lisusu. Bomoni? Bomoni? Ya solo. Kasi biso baoyo tozali awa na kati, kati na Klisto, tobatisámi kati na Ye (Bakolinti ya Liboso 12), kati na Ye, tozali kosangana na Nkembo oyo. Bomoni? Kasi ezali te ntango ozali libanda; ozali kobwaka miso na kati, pe koboya Yango. Bomoni?

²⁴³ Boye, sikawa tobengami kokota kati na Ye, mpo na kosangana na nyonso oyo Ye azali. Tobengami kokota kati na Ye,

yango ebombami mpo na bazangi kondima, na nzela na nzoto ya moto. Bomoni? Bayebi Nkembo yango, batángaka Yango, Ezali awa kati na Liloba, “Nkembo ya Nzambe” pe makambo ya ndenge wana, ezali bobele liloba, mpo na bango. Mpo na biso, ezali kotalisama! Bomoni? Ezali lisusu liloba te; ezali likambo ya solo mpenza! Amen!

²⁴⁴ Nzambe alobaki: “Tika pole ézala,” ezalaki liloba. Kasi sikawa pole yango wana. Ezali liloba te; ezali pole. Bomoni likambo nalingi koloba?

²⁴⁵ Sikawa ezali bobele Liloba likomami mpo na biso te, ezali likambo ya solo mpenza. Tozali kati na Ye. Sikawa tozali kosepela na yango. Sikawa tozali kotala Ye. Sikawa tozali komona Ye, Liloba, Azali komitalisa. Ebombami, na bato ya libanda, mpo (mpo na nini?) Ezipami kati na nzoto ya moto. Bomoni?

²⁴⁶ Oh, balobaka: “Etonga na bato wana, batángá wapi? Ba-batángá kelasi nini? Wapi, babimeli wa—wapi? Ba—ba—bazali bato ya etonga nini?” Bomoni? Ah! Bomoni, basosolaka Yango te.

²⁴⁷ Moto moko alobaki na moto mosusu, mokolo mosusu, alobaki: “Osengeli kozala na ebongiseli moko mpo na kozala Moklisto.”

²⁴⁸ Alobaki: “Nazali Moklisto; nazalaka na ebongiseli moko te.” Ah. Alobaki: “Nzambe alongolaki ngai cancer oyo,” alobaki, “sikawa olobi nini mpo na yango?” Ezalaki monganga. Alobaki: “Lakisa ngai bibongiseli oyo basalaka yango.” Bomoni? Malamu. Bomoni? Ezipami naino.

²⁴⁹ Tozali na kati ya Klisto. Sikawa, lokola na eleko wana, bandimi ya solo nyonso bazali komona Ye, Liloba ya eleka ya eleko oyo, etalisami polele. Nalobi likambo moko monene soki bokoki kososola yango. Bomoni? Bomoni? Bandimi nyonso ya solo, baoyo bazali kati na Liloba, bazali komona Nzambe polele. Ezipelo esíli kopasuka, pe Nzambe azali komonana polele liboso na bino, komonisama. Bomoni? Nzambe, amonisami, polele.

²⁵⁰ Mpo na kosala yango, ezipelo na biso ya kala, oyo ya bibongiseli pe mimesano, esengeli kopasuka lisusu. Mpo na komona mpenza nini Yango ezali, osengeli kobima na makambo pamba wana. Bomoni? Bokosala yango ata moke te; bakokoba kobenda ezipelo yango liboso na bino, ntango nyonso: “Oh, ezali na eloko moko te na Yango.” Kasi Yango ekomámi awa, pe Yango oyo ezali kotalisama, bomoni. Bomoni?

²⁵¹ Sikawa, ekozala boni soki moto aboyi komona moi, alobi: “Oh, kuna, nayebi Nzambe alobaki: ‘Tika pole ézala,’ kasi ezalaka na yango te. Nakokita na ngai na nse ya ndako. Na—naboyi na ngai komona yango?” Moto wana azali na libómá. Eloko moko ezali kotambola malamumu te kati na ye.

252 Eloko moko ezali kotambola malamau te kati na mobali to mwasi oyo akoki komona elaka ya Nzambe pe, komona Yango kotalisama, na sima aboyi na ye kondima Yango mpo ebongiseli ekitisi ezipelo. Bomoni, ezipami!

253 Mpo na kosala makambo oyo, bizipelo na biso ya bibongiseli pe mimesano esengeli kobukana, na nzela ya Molimo ya Móto pe Mopánga ya Nzambe, oyo ezali Liloba na Ye. Ntango nyonso, Liloba na Ye ezalaka Mopánga na Ye. Bomoni? Mokolo wana, Azuaki Mopánga na Ye, ezalaki kopela Móto, pe Apasolaki ezipelo kobanda likolo kino na nse. Azali kosala ndenge moko ná Mopánga yango moko lelo! Ezali te “bindimeli na ngai, buku na ngai ya bindimeli, ka—katekísimo na ngai.” Kasi Mopánga ya Nkolo, bomoni, ezali kopasola ezipelo, pe bomoni Nzambe polele, kotalisama kati na Liloba na Ye. Oyo likambo ya nkembo mpo na kotala! Bomoni? Malamau. Molimo Mosanto pe Móto ya Nzambe, Mopánga na Ye, ezali kopasola yango. Liloba epasoli ezipelo ya bibongiseli.

254 Ee, soki okoki koloba “Liloba,” pe Liloba esali eloko te? Ntina nini kozala na Mopánga awa, pe koloba: “Ekoki kopasola te”? Koloba: “Ah,” pe yango ekopasola te?

255 Kasi ntango otomboli Mopánga wana ya Nzambe likolo, pe omoni yango kopasola, e—esimbami na loboko ebongisámá liboso pe etindámá mpo na kosala bongo. Bomoni, ekopasola yango nye, pe botala Ye wana. Wana ekotalisa mpenza Nzambe polele, Yawe monene. Yango nde Liloba na Ye oyo etalisami, eteni oyo elakamaki mpo na mokolo yango. Bososoli Yango? Bomoni? Ntango Mopánga, elaka ya lelo, makambo esengeli kozala na eleko oyo, pe Nzambe azui Mopánga na Ye mpo na kopasola ezipelo ya bibongiseli pe kofungola yango, pe Amitalisi pe Amonisi ete Azali wana, ezali bobele Likonzi na Móto yango moko. Botala malamau, yango nde Liloba oyo etalisami mpo na bilaka ya lelo.

256 Tozali komona Yango lokola Petelo, ntango alobaki: “Nkolo, tokokende lisusu epai na nani, sima na komona makambo Oyo?” Tokokende wapi? Tokoki kokota na lingomba nini, ntango tobotami kati na Oyo? Bomoni? Eloko nini bokoki . . . Bokoki kokota na ebongiseli nini, sima na koyeba ba-Solo oyo, bomoni, ntango (bango nyonso) bazali koboya Yango? Bango nyonso! Nayebi ebongiseli ata moko te oyo ekoki koloba to kosala likambo moko mpo na Yango. Ya solo. Ezali ya solo.

257 Nabandaki kosala mibembo oyo, awa, esika mangomba ntuku minei na mibale basungaki kosalisa liyangani esika moko; ntango nakómaki kuna, nazuaki ata moko te. Bango nyonso balobaki: “Andimaka kobatelama ya Seko.” Yango etiaki balégaliste pembeni. Bamoko balobaki: “Abatisaka na Nkombo na Yesu.” Yango etiaki bamosusu nyonso pembeni, bomoni. Bongo,

moko na bango alobaki: “Andimaka momboto na nyoka. Nyoka azalaka na momboto te!” Yango etiaki. . .

²⁵⁸ Biblia elobi: “Nakotia koyinana kati na Momboto ya mwasi pe momboto ya nyoka.” Bomoni? Bomoni yango?

²⁵⁹ Yango, e—ezipelo elongolamaki likolo na Liloba. Bomoni? Ezali solo. Emonisami na bana mike. E—elongolami. Bazali komona Yango. Pe ekozala, ndenge elobamaki mbala moko. . . Ezali solo. Bongo, ekozala, ndenge elobamaki mbala moko: “Ntango bomoni,” ntango ezipelo oyo elongolami likolo na Liloba, mimesano elongolami likolo na Liloba, ndenge Yesu alobaki mbala moko, “soki bomoni Ngai, bomoni Tata.” Bomoni? Nzambe ná Liloba na Ye bazali moko. Sikawa bososoli? Ntango Liloba ekokisami, ezali nini? Bomoni?

²⁶⁰ Yesu alobaki: “Bozali kolukaluka kati na Makomi, bobanzi ete bozali na Bo- . . . Bondimaka Nzambe, bóndimela pe Ngai. Soki Nasali misala ya Tata na Ngai te, bóndimela pe Ngai te. Kasi soki Nasali mpenza misala yango, Ngai ná Tata na Ngai tozali Moko. Soki bomoni Ngai, bomoni Tata.”

²⁶¹ Pe soki bomoni Liloba kokokisama, bomoni Tata, Nzambe, mpo Liloba ezali Tata. Liloba ezali Nzambe. Pe Liloba, oyo ekokisami, ezali Nzambe Ye moko azali kozua Liloba na Ye moko pe kokokisa Yango kati na bandimi. Eloko moko te ekoki kokomisa Yango na bomoi libanda na bandimi, bobele bandimi. Ezali te. . . Ekozala te. . .

²⁶² Okoki kozua masangu pe kolona yango na—na—na lolenge mosusu ya mabelé, ekokóla ata moke te. Kasi, nini, esengeli kozala na bipolí kati na mabelé yango, mpo na kokólisa masangu. Kasi soki ezali te—soki kuna. . . soki bipolí kati na mabelé ezali te—ezali te, ete masangu ezangi kozua bomoi kouta na bipolí yango, ekokóla te. Boye, ata Liloba ekwei esika nini, soki Ekwei na lolenge malamau ya motema. . .

²⁶³ Yesu moto alobaki bongo. “Ndambo ekweyaki pembeni na nzela, na mabelé ya mabanga, pe ba-ndeke ya likolo eyaki kolia yango.” Na sima, Alobaki: “Ndambo mosusu ekweyaki kati na ba-nzube ná ba-nséndé, ba-nzube ekólaki pe efinaki yango,” mimesano, bibongiseli, mitungisi ya mokili efinaki Yango. Kasi elobamaki: “Ndambo mosusu ekendeki kino na mabelé malamau pe ebotaki mbala mokámá,” elobamaki, “yango nde Bokonzi na Nzambe.”

Ezali eloko yango moko, bomoni, bamosusu bakondima ata moke te.

²⁶⁴ Bamosusu bakondima mpo na ntango moke, lokola bayekoli. Balandaki Ye, mingi kati na bango, bayekoli ntuku nsambo balandaki Ye mibu mingi, mpo na koyeba; pene na mibu moko na ndambo, to mibu mibale; bobele mpo na koyeba, kino bamonaki eloko moko kati na Ye, eloko. . . lokola lolenge Azalaki na nguya ya kosala makambo, to, lokola nkisi, lolenge moko ya kisolóka,

makambo Akokaki kosala mpo na kokokisa makambo yango, lolenge nini Akokaki koyeba makambo mazalaki na mitema ya bato pe makambo bazalaki kokanisa. Pe bakomaki komona ete Alobaki ete Ye “autaki na Likolo,” ete Ye “Azali Liloba Ye moko.” Pe ntango basalaki yango, elekelaki bango mpenza. Balobaki: “Moto moko te akoki kososola Yango.” Pe batikaki Ye. Wana ezali mimboto oyo ekweyaki na kati ya ba-nzube.

²⁶⁵ Ezali kozongisa biso na likambo yango moko, kati na biyanganelo nyonso, ezalaka na bandimi-ya-maloba, bazangi kondima pe bandimi. Ezalaka bongo na biyanganelo nyonso. Bokomona bango ntango nyonso. Bamosusu na bango basalaka makambo lokola bandimi, baoyo wana bazali lolenge ya mabe koleka. Na sima, ezali na baoyo bazangi kondima mpenza; oyo wana akotungisa bino te, akokende na ye pe aningisi motó. Kasi baoyo basalaka lokola bandimí, balobaka bazali bandimi, bango nde, bango nde bosengeli kokeba na bango, bandimi-ya-maloba. Na sima, ezali na bandimi ya solosolo. Bomoni bango misato wana?

²⁶⁶ Ezalaki na bazangi kondima. Bobele ntango Alobaki: “Bólia mosuni ya Mwana na moto,” oh, tala, ekataki likambo!

²⁶⁷ Bamosusu bazalaki bandimi-ya-maloba. Batikalaki kino, lokola Yudasi asalaki, kino na suka mpenza.

²⁶⁸ Kasi, bandimi ya solosolo, bango bakokaki kolimbola Yango te, kasi bandimaki Yango, ata bongo. Bakóbaki kino suka.

²⁶⁹ Ezipelo, mimesano ya bazangi kondima, elongolamaki, bomoni Nzambe. Ntango ezipelo ya mimesano elongolami, bokoki komona ete Nzambe azali bobele Nzambe ya Liloba na Ye. Azali kokoba kokokisa Liloba na Ye. Azali—Azali Nzambe, Mokóló ya Liloba na Ye.

Yango ebombami sima na bizipelo ya ba-mposo, mpo na bamosusu. Iyo, ezali solo. Mpo na baoyo bakoki koleka sima na ezipelo te, Azali bobele sima na bizipelo ya ba-mposo.

²⁷⁰ Botala malamú. Na bongo, biso, na bongo biso tokómi eteni na Ye, wana bozali bizipelo oyo ezali kozipa Ye. Bozali eteni na Ye, ntango nyonso oyo Klisto azali kati na yo, ndenge Klisto azalaki ya Nzambe. Mpo Nzambe azalaki kati na Ye, ekomisaki Ye Nzambe. Pe wana Klisto azali kati na yo, elikia ya Nkembo, okómi eteni ya Klisto. “Ye oyo akondimela Ngai, misala mizali Ngai kosala, akosala yango pe lokola.” Bomoni? Okómi eteni ya Klisto, ntango nyonso oyo Klisto abombami kati na yo. Na bongo, ezipami mpo na mozangi-kondima, kasi yo oyebi ete Azali kati na yo. Ozali tempelo ya Klisto oyo azali sima na ezipelo, mposo. Boye biso, mpo n-. . . Na sima, mpo na ezipelo oyo, ezali lisusu ezipelo kati na nzoto ya moto, ezali kobomba Nzambe (Liloba) liboso na mozangi-kondima.

²⁷¹ Ndenge ekomámi, bomoni: “Ekomámá, bozali mikanda ekomámá,” elobami na Biblia. Sikawa, *mokanda* ezali nini? Ezali

“liloba ekomámá”. Pe bozali ba “ekomámá”. Na elobeli mosusu, bokotanga Yango boye: “Bino,” Elobami, “bozali mikanda ekomámá,” to “bozali Liloba oyo ekomámá, etalisami,” eloko moko te ekoki kobakisama na Yango. Okoki koloba te: “Ngai nazali mokanda ekomámá,” pe bomoi na yo ezali lolenge mosusu, kokesene na *Oyo* esíla kokomama, [Ndeko Branham abeti Biblia na ye mwa moke.—N.D.E.] mpo eloko moko te ekoki kobakisama to kolongolama.

²⁷² Ndenge Docteur Lee Vayle azali kokoma buku kitoko oyo, nalingi ete bókoka kotala yango, sima na ntango moke. Ndeko Vayle azali awa, azali awa esika moko. Namonaki ye na libanda. Nandimi te ete akokaki kokota. Kasi azali kokoma buku moko, sikawa, pe—pe ezali mpenza kitoko mingi, likolo na Eleko ya Laodikia. Pe nalingi ete bino. . . Ekobima kala mingi te lokola buku. Na bongo, tozali sikawa kosembola yango mpo na kosilisa. Pe tozali kokoma, pe tozali kopesana makanisi mpo na yango, bomoni, ya. . .

²⁷³ Bato nyonso bayaka ntango nyonso kokutana na ngai, balobaka: “Ndeko Branham, nkake nsambo oyo, mongongo engulumaki lokola nkake, pe Alobaki: ‘Kokoma Yango te, omoni, kasi kanga Yango,’” balobaki, “ekozala nkake nsambo oyo ekomonisama na ntango ya suka, bomoni, nkake nsambo oyo ekolobela biso?” Sikawa, ezali koyokana malamuni mpenza, boye te? Bomoni? Kasi bókeba na makambo bozali koloba ntango bolobaka bongo.

Alobaki: “Komeka kokoma Yango te.” Bomoni? Nkake nsambo oyo eyokisi mingongo na yango, bomoni, pe Alobaki: “Kokoma Yango te, omoni, kasi Esengeli kokangama na elemba kati na Buku kino na ntango ya suka.”

²⁷⁴ Sikawa, moto moko, bato mingi bazalaki koloba na ngai, pe bato na likindo balobaki: “Ndeko Branham, soki Nkolo Nzambe. . .” Balobaki: “Soki—soki. . . Ná makambo obikéla, oyo Nkolo apésá yo, mpo na libota na Ye,” koloba yango na komikitisa, balobaki, “yo moko ozali na makoki ya kokoma Bi—Biblia, Liloba na yo, soki Nzambe amonisami.”

²⁷⁵ Nalobaki: “Ekoki kozala ntango mosusu solo.” Bomoni, azalaki koluka kokanga ngai na motámbo. Bomoni? Nalobaki: “Kasi, bomoni, nakoki kosala yango te.”

Alobaki: “Mpo na nini te? Ozali na makoki nyonso esengeli.”

²⁷⁶ Nalobaki: “Kasi, tala, liloba ata moko te ekoki kobakisama to kolongolama.” Bomoni?

²⁷⁷ Pe alobaki: “Ee, bongo, nkake nsambo oyo, omoni,” alobaki, “nkake nsambo oyo ezali konguluma, ekozala te Emoniseli oyo ekopesama na moto moko?”

²⁷⁸ Nalobaki: “Te misie, ekozala kobakisa eloko moko na Yango to kolongola Eloko Moko na Yango.”

279 Makambo nyonso emonisami Kuna na kati, pe Bilembo Nsambo nde efungolaki emoniseli na Yango. Yango wana nde ezalaki. Bomoni, ezali bobele kati na Liloba. Bomoni, bokoki kobima libanda na Liloba yango te. Ekotika Liloba te. Pe Molimo na Nzambe ekotika Liloba yango ata moke te. Ekozala bobele elongo na Liloba; Ekoboma miso ya bamoko, pe Ekofungola miso ya bamosusu. Ekosala bongo ntango nyonso.

280 “Bozali mikanda ekomámá, etángámi na bato nyonso.” To, bozali. . . Nakolimbola Yango, kobongola yango boye, bomoni, nakobongola Yango: “Bozali mikanda oyo ekomami,” mpo bokoki kobakisa eloko moko te na Yango, “oyo etángámi na bato nyonso; Liloba na Nzambe etalisami,” na elobeli mosusu.

Petelo ná Yoane, mpo na kotalisa yango, ntango bakendeki kuna, bamonanaki ete bazalaki bayínga pe batángá te, bayekolá te, kasi basosolaki ete bazalaki elongo na Yesu. Bomoni? Bazalaki bayínga pe batángá te, kasi bazalaki mikanda ekomámá, bomoni, etángámi ete bazalaki elongo na Yesu. Mpamba te, Yesu azalaki komitalisa na nzela na bango, Klisto azipamaki kati na nzoto na bango; atalisamaki, azuaki bomoi.

281 Ndenge moko Azalaki kati na Mose. Ntango Liloba ezalaki kati na Mose, azalaki Nzambe kati na nzoto. Ntango Ezalaki kati na Yesu, Ezalaki Nzambe kati na nzoto. Bomoni? Eloko se moko Asalaki, ezalaki ete Abongolaki ebombelo na Ye, kasi Liloba na Ye te, lolenge na Ye te. Azali motindo moko lobi, lelo pe libela. Abongolaki se lolenge na Ye. Abongwanaki longwa na Nowa kino na Mose; Abongwanaki longwa na Mose kino na Dawidi; longwa na Dawidi, Yosefe; bongo na bongo kino Ayaki na litondi ya Bonzambe na nzoto. Bomoni?

282 Azali bobele Nzambe yango moko! Amen. Amen. Nabanzi ete boyambi yango. Bomoni? Ezali Nzambe yango moko, kasi Alati bobele ezipelo mosusu. Bomoni, Alati ezipelo mosusu.

283 Asalaki bongo na ntango ya ba-réformateur, alataki ezipelo, alataki ezipelo. Kino, sukasuka, Elekaki na eleko ya Luther, na eleko mosusu, bongo sukasuka, Eyei na Mobimba. Bobele liboso n Yango koya, mosakoli moko ateleme lisusu. Eloko ezali kotalisa ezali elilingi ya Liloba, kotalisa awa, komonisa makambo esilaki kosalema, makambo etikalaki, mpo Lingomba ézanga . . . ézanga lisosoli te. Na sima, ntango yango ekosila moke-moke, na ntango wana, ndenge Yoane alobaki: “Ngai nasengeli kokita, Ye asengeli komata,” na ntango wana nyonso-kati-na-nyonso ekokota kati na Ye. Atalisami na mobimba, na nzela ya Luther, Wesley, pe na eleko ya ba-Pantekotiste, pe bongo na bongo, bongo na bongo, Atalisami na mobimba, bomoni, kolandana mpenza, komitalisa, Nzambe komizipola. Botala Ye (Sikawa, botala.) kokokisama na bilaka na Ye mpo na *lelo*, ndenge esálámáká na eleko *mosusu*.

284 Sikawa Mose azalaki Liloba na eleko wana, mpo Liloba epesamaki na Ye mpo na eleko wana; Mose. Yosefe azalaki Liloba

na eleko na ye, azalaki mpenza elilingi ya Klisto. Bomoni, moko na moko azalaki Liloba.

²⁸⁵ Pe ntango Yesu ayaki, Azalaki Liloba na litondi na Yango, mpo mwango mobimba ya lisiko ezalaki kati na Ye. Mwango mobimba ya lisiko ezalaki kati ya Mose te, ezalaki kati na Yosefe te, ezalaki kati na Eliya te. Bomoni, bazalaki bobele eteni ya Liloba, kotalisa bato Yango. Bomoni? Sikawa botala, bobosana likambo oyo te; Ezali koya awa, ndenge nalobaka. Bomoni, mwango mobimba ezalaki kati na bango te. Bazalaki kolakisa mosapi na Oyo ezalaki koya.

²⁸⁶ Yango wana, sima na Ye, Litondi, tokoki kotalisa eloko mosusu te. Ezali kotalisa Ye, Liloba. [Ndeko Branham azui Biblia na ye.—N.D.E.] *Oyo* nde Emoniseli mobimba; eloko moko te ekoki kobakisama to kolongolama na Yango. *Ezali* Emoniseli mobimba. Nyonso wana, ezalaki elilingi na Ye oyo akoya; kasi ntango Ayaki, Azalaki Oyo abongi be. Baebele 1: “Nzambe, mbala mingi, asololaki na ba-tatá na nzela na basakoli,” Nzambe alobaki na nzela na bizipelo, basakoli, “kasi na ntango oyo ya suka, na nzela na Mwana na Ye, Yesu Klisto.” Ezali yango. Azipolamaki kuna na Kalvari, Mwana na Nzambe, azipolamaki.

²⁸⁷ Botala malamumu, “azuaki bomoi.” Pe, lelo, ntango Liloba ezali kotalisama na ba-mbeki ya bato, bizipelo, ezali mpenza Liloba likokisami na eleko yango, elongobani na Nzambe. Lokola tobatisami kati na Ye, kokokana na Bakolinti ya Liboso 12, tokokanisami na Ye. Amen.

²⁸⁸ Nalobaki miníti ntuku misato, kasi nakoki kobakisa mwa moko? [Losambo balobi: “Amen.”—N.D.E.] Bomoni? Botala, nakoki kozangisa makambo oyo awa te. Botala, kokokanisama na Ye!

²⁸⁹ Sikawa botala. Bana-mboka ya Amerika boni bazali awa? Botombola maboko. Malamumu, bozali bana-mboka ya Amerika, bongo, bokokanisami na ekólo oyo. Nyonso oyo ekólo oyo ezali, bosengeli kozala yango. Boye te? Bozali nkembo na yango mobimba pe bozali nsoni na yango mobimba. Bokokanisami na ye. Soki ozali mo-Amerika, na bongo okokanisami na Amerika. Aleluya!

²⁹⁰ Nazalaki elongo na Georges Washington ntango akatisaki ebale Delaware. Nakokanisami na ye. Ya solo. Nazalaki elongo na Abalayama Lincoln ntango apesaki Lisikúlu na Gettysburg. Nazalaki wana. Nazalaki elongo na basodá na esanga Guam, ntango bino bilenge botómbolaki bendele wana. Nazalaki wana. Nazali mo-Amerika; nakokanisami na yango. Amen. Sikawa, kozala mo-Amerika, nsoni nyonso na eleko ya Revolution, ngai pe namemi yango, mpo nazali mo-Amerika. Ezali solo.

²⁹¹ Pe, lokola Moklisto, nakokanisami na Ye. Amen! Nazalaki elongo na Nowa ntango akotaki na masuwa. Nazalaki elongo na Mose ntango abimaki na Ezipito. Amen! Nazalaki elongo

na Eliya likolo na Ngomba Kalemele. Iyo, misie! Nkembo na Nzambe! Nazalaki elongo na ye ntango asalaki bongo. Nazalaki mpenza elongo na Ye, namikokanisaki na liwa na Ye, kuna na Kalvari, ntango nakufaki na makambo ya mokili, na ngai moko pe na mimesano nyonso. Nakokanisamaki na Ye. Nakokanisamaki na Ye na ntongo ya mokolo ya Pásika, ntango Asekwaki longwa na bakufi. Nakokanisamaki na Ye Mokolo ya Pantekote, ntango Molimo Mosanto ekitaki lokola mopepe makasi. Nakokanisamaki na Ye. Nyonso oyo Ye azalaki, nazali yango; nyonso oyo ngai nazali, Azalaki yango; amen, wana tokufi kati na Ye, tokokanisami na Ye. Oyo Ye azali, ngai pe nazali yango. Amen!

²⁹² Oyo ekólo oyo ezali, ngai pe nazali yango. Nazali na litundú ya kozala yango. Nabelemi koyoka nsoni na yango. Nabelemi koyoka nsoni, mpo na kozala Americain. Ya solo. Pe nabelemi koyoka yango mbala mibale mpo na Yesu Klisto! Nyonso oyo Akokaki kozala, ngai pe nazali yango. Nasepelaka kokokanisama na Ye.

²⁹³ Bantóma yango, ntango bazongaki, bakanisaki... batiolamaki, pe bafingamaki na ndenge nyonso, bamonaki ete ezalaki lokumu monene komema nsoni ya Nkombo na Ye.

²⁹⁴ Nazali na esengo lelo kozala moko na bango, lokola nakokanisami na Liloba, oyo ezali Klisto. Nakokanisami na Ye! Lokola tobatisami kati na Ye, tokokanisami; tokokanisami lokola Ye, tokokanisami na Liloba na Ye, oyo ezali Ye moko. Soki nazali kati na Klisto, nazali Liloba na Ye; mpo Ye azali Liloba, pe oyo Ye azali, ngai pe nazali yango. Amen! Bososoli Yango? [Losambo balobi: "Amen."—N.D.E.] Malamu.

²⁹⁵ Liloba litalisami, to limonisami na Emoniseli yango kuna na kati, na bongo, esali nini mpo na ngai? Soki Azali Nkembo yango ya Shekinah, ngai pe nazali eteni na Yango. Amen! Oh! Amen! Ezali solo. Liloba Yango moko limonisami, emonisami Yango moko.

Bokanisa naino! Mabombami ya Nzambe etalisameli biso lelo oyo, na nzela ya Motindami yango moko ya Likolo, oyo atalisamaki na bango na eleko wana; bótala, Likonzi na Móto yango moko oyo etindaki Mose; Likonzi na Móto yango moko oyo ezalaki likolo na Mose oyo akomaki Biblia; Likonzi na Móto yango moko oyo Polo akutanaki na yango na nzela ya Damaseke.

²⁹⁶ Pe Polo akomaki Kondimana ya Sika. Bomikanisela, Matai, Malako, Luka pe Yoane, bakomaki bobele makambo bamonaki; kasi Polo azalaki na Emoniseli. Atalisaki Yango, mpo akutanaki na Likonzi na Móto, ye moko. Pe bokanisa naino, yango moko...

²⁹⁷ Kuna, Yosefe, bango nyonso bakomaki makambo masalemaki, moko na moko na bango bakomaki, na eleko wana. Kasi ntango Mose akotaki na mosala, azalaki na Emoniseli. Akutanaki na Likonzi na Móto, pe Emonisamaki na Mose

makambo esalamaki na Genese. Akomaki buku minei ya liboso ya Biblia, ezalaki Mose. Ezali solo? Mpo ete akutanaki na Nzambe na lolenge ya Likonzi na Mító, azipamaki kati na Likonzi na Mító.

²⁹⁸ Ntango Polo akutanaki na Ye na nzela . . . Bayekoli bakomaki bobele makambo bamonaki Ye kosala, kasi Mose azalaki na Emoniseli; akitaki na Ezipito, asalaki mibu misato, ayekolaki, pe amonaki ete Nzambe ya Kondimana ya Kala ezalaki Yesu ya Sika, Emoniseli! “Nazangaki kotosa emononeli ya Likolo te.” Ezali solo. Ya solo!

²⁹⁹ Pe bokanisa Yango! Likonzi na Mító ysngo moko oyo ekitaki likolo na bato yango oyo bakomaki Biblia, ezali Likonzi na Mító yango moko awa, lelo, oyo ezali kolimbola Biblia. Amen! Totondi Ye mpenza mpo na yango! Yango moko! Oyo nde libondisi! Oyo nde kokokanisama! Natondi na esengo mpo na kokokanisama na yango, nayebi te likambo ya kosala! Nakosepela kokokanisama na Yango koleka kozala mo-Batiste, mo-Methodiste, mo-Presbiterien, mo-Luthérien, ná bamosusu nyonso wana. Kokokanisama na Liloba yango, esika Nkembo ya Shekinah pe Emoniseli ezali!

³⁰⁰ Likonzi na Mító ezali komonana polele kati na biso, kotalisa ete Nsango oyo ezali solo, lokola Asalaki na Ngomba ya Sinai. Bomikanisela, liboso nsango ya solo épesama, Mose ateyaki pe akambaki bango libanda na Ezipito; kasi kuna, liboso mibeko ya solosolo ékomama (Bilembo épesama), Nzambe akitaki liboso na bato pe atalisaki polele ete Mose atindamaki na Ye (ezali solo?) kati na Likonzi na Mító, oyo Mose alobaki ete amonaki na esóbé pe asololaki na ye.

³⁰¹ Oh, na mikolo oyo ya suka, komona Likonzi na Mító yango moko kati na biso, koloba Liloba yango moko; bobele yango te, kasi kolimbola Yango na nzela ya komonisa Yango, pe kotalisa Yango polele, Ezali Solo.

Boye, bato bazali na nzela moko te ya kozanga kondima, bobele soki balingi kosala yango na nko. Pe, na bongo: “Ye oyo akosala lisumu na nko sima na kozua boyebi ya Solo, mbeka mosusu mpo na lisumu ezali te.”

³⁰² Botala malamú, Likonzi na Mító yango moko oyo etindamaki na Mose pe na Polo, oyo ekomaki Biblia, etindami sikawa mpo na komonisa Yango. Ngolu na Nzambe, Nzambe oyo abongwanaka te, azali kokokisa bilaka ya Matai 28: “Tala, Nazali na bino elongo mikolo nyonso”; azali kokokisa Santu Yoane 14:12: “Misala mizali Ngai kosala, bokosala yango pe lokola”; azali kokokisa Santu Luka 17:28-29: “Na mikolo na suka, Mwana na moto akomonisama,” bomoni, bomoni; Malaki 4: “Tala, Nakotindela bino Eliya mosakoli, ye akozongisa Kondima ya bato na Liloba ya ebandeli.” Bomoni? Ndenge yango . . . Bomoni? Oh! la la!

303 Akufaki mpo na komimonisa Ye moko na biso. Sikawa tókufa na biso moko, mpo na komonisa Ye na bamosusu. Tókufa na mimesano pe nyonso wana, mpo na komonisa Ye na moto mosusu. Bókufa na bibongiseli mpo na komonisa Ye na bato mosusu.

304 Botala malamau, tempelo ya kala ezalaki na Nkembo ya Shekinah kati na yango, pe Pole ya Shekinah ezalaki likolo ya Liloba. Liloba ezali Momboto; Epesaka lipa ya kolakisama bobele mpo na bandimi. Makila pe ezalaki likolo na boyokani; pe Makila ezali mai, mai oyo epesaka bomoi na mbuma, lisangu, momboto, oyo ezali Liloba.

305 Lokola Yesu alobaki: “Ndenge Mose anétolaki nyoka na motáko,” na sima Alobaki lisusu, “Nzambe alingaki mokili mingi na motindo ete Apesaki Mwana-na-likinda na Ye; ete moto oyo akondima Ye abebisama te.” Mose abetaki libanga na biliki, mpo na kobikisa bato balingaki kokufa, to mpo na kobimisa mai. Nzambe abetaki Yesu, mpo na kobimisa Molimo kati na Ye, mpo na bato balingaki kokufa. Makila ebimaki kati na Ye, yango ezali “mai ya kosukwama na Liloba.” Pe Mai epesaka Bomoi na Momboto. Pe epesaki Nkembo ya Shekinah; engengaki likolo na Liloba, pe epesaki lipa ya kolakisama. Pe lipa ya kolakisama ezalaki bobele mpo na bato baponami. Ah-ha. Boye te? [Losambo balobi: “Amen.”—N.D.E.]

306 Sikawa, kokota kati na ezipelo, koleka na nzela ya ezipelo, kino Liboso na Ye, esika Liloba ezali (endimeli te), Liloba; kuna na kati, komona Nkembo ya Shekinah, Shekinah, Nguya, Molimo Mosanto kongenga likolo na Liloba, ezali komonisa elaka polele, kotalisa ete ozali sima na ezipelo. Amen!

Nasíli koleka bizipelo epasuká, esika Nkembo ezungaka te, (Hm!)

Aleluya, aleluya; nazali kobika Liboso na Mokonzi.

Nasíli koleka bizipelo epasuká, esika Nkembo ezungaka te,

Nazali kobika Liboso na Mokonzi.

307 Mposo ya gambala ya kala, bibongiseli, esíli kopasuka. Nasíli kokatisa yango, kino na Nkembo ya Shekinah, pe namoni Liloba. Namoni Likonzi na Móto kotámbola. Namoni Liloba kokokisama. Makambo Alobaki ete Akosala na mikolo oyo ya suka, namoni yango kokóla. Nazali komona bana kolia Lipa yango ya Shekinah, oyo euti na kokomela ya Liloba yango, Yango nde bandimi. Amen! Oyo ntango malamau nini tozali kobika na yango! Bomoni, Shekinah ezalaki likolo na Liloba; pe Lipa ezalaki na nse na yango. Pe ezalaki na Makila, emwangisami, ezali kopesa Yango mai. Molimo epesaka Bomoi na Liloba. Pe . . .

Bato boni batángaki, bayokaki bande ya *Kosambisama?* Iyo. Mingi kati na bino bayoki yango. Bomoni kuna, esengeli . . .

Liloba yango esengeli kokóla. Mpo na kokóla, Esengeli kozala na lolenge malamau ya mabelé. Bomoni? Pe soki Nzambe apesi elaka, pe ekómi na motema wana, ekoki kozanga te.

³⁰⁸ Nowa azelaki mibu mokáma na ntuku mibale. Abalayama azelaki mwana mibu ntuku mibale na mitano. Nzambe alobaki bongo, pe ekataki likambo. Bomoni? Ezali nini? Liloba ezalaki wana, ezalaki komwangisama mai na nzela na kondima, kondima Yango, epesaki mbano. Epesaki mwana-mobali; epesaki mbula; epesaki mpela; epesaki mongondo oyo akúmbaki zemi.

³⁰⁹ Mosakoli alobaki: “Mongondo akokúmba zemi.” Na ntembe te bilenge basi nyonso bakendeki kobongisa bilamba na bango ya ba-bebé. Ee, mosakoli oyo, Yisaya, azalaki mosakoli oyo ayebanaki, atitolamaki na Nzambe. Pe Nkolo alobaki: “Mongondo akokúmba zemi. Nakopesa bango elembo ya kokamwa, elembo monene; mongondo akokúmba zemi.”

³¹⁰ Kuna, bato nyonso wana, bandimi yango, bazalaki lokola bino nyonso. Ntango bayokaki mosakoli yango koloba bongo, bana-basi nyonso. . . Moto nyonso alobaki: “Ekozala mwana na ngai ya mwasi. Iyo misie.” Bango nyonso bakendeki kosomba ba-sapáto ya ba-bebé, ná ba-couche, ná nyonso wana, bamilengelaki, mpo bayebaki ete ye nde akobóta mwana yango. Ekeke yango elekaki, pe bamilobelaki: “Mosakoli yango ayebáná, atitolámá na Nzambe, ndenge nini akokaki koloba likambo ya lokuta? Esengeli kozala bongo!”

³¹¹ Esalemaki sima na mibu nkama mwambe, kasi abotaki bebé yango. “Likolo pe nse ekoleka, kasi Liloba na Ngai ekoleka te.”

³¹² “Pe ekosalema, na mikolo na suka,” Nzambe alobaki. Bomoni, biso oyo, Pole li—likolo na Liloba. Ndenge pole ya moi ebóngolaka momboto longwa na nkembo kino na nkembo, biso pe tokómaki—tokokóma koleka lokola Ye, wana tozali kobika Liboso na Ye; lokola Ye, tokokokana na elilingi epambolami na Ye, ntango tozali kotambola elongo na Ye.

³¹³ Botala likambo moi esalaka. Soki oloni momboto, nini esalemaka? Momboto yango epolaka. Bomozi ezalaka kati na momboto. Bomozi ebimaka pe ebimisaka litíti. Sikawa, yango ekokanaka na oyo ya ebandeli te.

Oyo wana nde Luther. Ezalaki litíti. Malamau.

Litíti ekólaki pe, mbala moko, ebimisaki felele. Bomoni, ezalaki kolamuka ya Wesley; ezalaki lokola oyo mosusu te.

Na sima, kolamuka ya ba-Pantekotiste eyaki, bomoni, ebimisaki libatisi ya Molimo Mosanto. Malamau.

Likambo nini esalemaki? Mandéfu ebimaki likolo na mposu ya masangu. Ebandi kokóma ndenge mosusu. Likambo *oyo*, likambo oyo *kuna*, ezali kokokana na Liloba te. Ekokani na

Yango mosusu te. Ekokani te na Mbuma ya ebandeli oyo elónámáki.

³¹⁴ Kasi Nzambe azali se wana kokomisa yango—yango motindo moko. Botala, ezali kosala nini? Sukasuka ekozonga lisusu na lolenge ya Momboto ya ebandeli. Ntango Ayaki na lolenge ya Martin Luther; ntango Ayaki na lolenge ya John Wesley; ntango Ayaki na lolenge ya ba-Pantekotiste, Asengeli komimonisa lisusu lokola Momboto yango moko, oyo ekundamaki na mabelé, Mwana na moto. Amimonisaki lokola Mwana na Nzambe, na eleko ya litíti pe bongo na bongo, kasi na eleko oyo ya suka, Asengeli komimonisa lisusu lokola Mwana na moto. Bososoli yango? [Losambo balobi: “Amen.”—N.D.E.] Malamu, lokola na ebandeli, koyemisama!

³¹⁵ Pe eloko nini ebimaka sima na litíti? Ekokoba kokóla ntango nyonso. Litíti moke yango ekólaka, kasi ekómaka lokola mbuma ya ebandeli te. Nsango ya Luther pe te; te, ba—ba-nsango mosusu eyaki na sima, Finney, Sankey, Knox, Calvin, pe bongo na bongo, ata moko na yango te. Ezalaki bobele nsango kasi, likambo ezalaki ete, bazuaki mobimba ya Emoniseli na Yango te, mpo ntango ekokaki te. Okoki kotia mposo likolo na masangu te, soki ntango na yango ekoki te. Bomoni? Na sima, sukasuka, Momboto ya ebandeli, oyo ekundamaki na mabelé, ekozonga lisusu.

³¹⁶ Bomoni, Nzambe alandaka mpenza bikelamu. Bomoni, Abótamaki mwana-mpate, yango wana Abotamaki na elielo ya bibwele. Ba-mpate babotamaka na mbeto te. Bomoni, *Akambamaki* na Kalvari. Mwana-mpate, ba-mpate bakambamaka. Ezali solo. Ba-ntaba nde bakambaka bango na esika ya kobomama, boyebi yango, na ebomelo. Ntaba nde ekambaka bango, kasi basengeli kokambama. Ah! Ya solo. Boye, Akambamaki kino ebomelo, bomoni, mpo Azalaki Mwana-mpate.

³¹⁷ Makambo nyonso na mokili etalisaki Ye. Yango wana Abotamaki na sanza ya misato to ya minei, na sanza ya zomi na mibale te; Akokaki te, na eleko yango ya mobú, neige emataka kino na météle motoba likolo na mabelé. Azalaki nzambe-moi te, kasi Azalaki Mwana na Nzambe. Bomoni? Nzambe-moi ya ba-Roma, mokolo mwa ntuku mibale na mitano na sanza ya zomi na mibale, ntango moi ezalaki kokóma na bisika na yango, kuna, bazalaki kokende na bisika ya masano pe bazalaki kobenga yango fėti ya mbotama ya nzambe-moi, pe bakómisaki yango ya Mwana na Nzambe. Te, te. Azalaki Mwana na Nzambe. Fėti ya mbotama na Ye ezalaki elongo na mokili. Ya solo.

Sikawa, bótala lisusu sikawa ndenge tozali kokoba, totikali na mwa ntango moke.

³¹⁸ Sikawa, mpo na kobonga be. Sima na litíti kobima; sima na mposo komonisama; sima na mbuma kokóma na mokókóli; na

bongo esengeli kokóma na kobonga be, kozonga lisusu mbuma mpenza.

Pe, bomikanisela, mbuma esengeli kozua bomoi. Bomoni? Soki te, ekobika te. Bomoni? Eloko moko te libanda na bansango wana, ekokoma na Bomoi. Esengeli kozua bomoi mpo na Yango. Kasi, bomikanisela, Bomoi yango moko oyo ezalaki kati na litíti ezali kati na mbuma. Ezali bobele kozonga na kokomela, bomoni. Amimonisaki (nani?) Mwana na moto, mbuma oyo ekundamaki na mabelé. Bososoli Nsango? [Losambo balobi: “Amen.”—N.D.E.]

Ba-Greki balobaki na Ye: “Tolingi komona Yesu.”

³¹⁹ Alobaki: “Soki mbuma ya lisangu ekwei na mabelé te.” Bomoni? Malamu.

³²⁰ Sikawa, na sima Amimonisaki nani? Na lolenge mosusu; litíti, mposo, pe bongo na bongo, nkasa nyonso pe makambo nyonso. Na sima Amimonisaki, (nani?) Molimo yango moko, kasi na lolenge mosusu. Bomoni? Kasi étápe ya suka ya lisangu yango ezali nini? Ekozonga lisusu na lolenge ya mbuma ya ebandeli. Boye te? [Losambo balobi: “Amen.”—N.D.E.]

³²¹ Pe mosala na Ye eleki na nzela ya ba-reforme, pe ezongi lisusu kozala Liloba ya ebandeli. Liloba eyaka na mosakoli. Pe Alakaki na Malaki 4: “Pe, kozongisa Kondima ya bato na mbuma ya ebandeli.” Eloko oyo ekundamaki na mabelé ezali awa motindo moko. Mbuma eleki kino awa. Eyaki lokola Mwana na Nzambe, sikawa Ezali komimonisa awa lokola Mwana na moto, na sima Ekomimonisa lokola Mwana na Dawidi, likolo na Ngwende. Bomoni, Bana misato yango, ezali mpenza yango. Oh! la la! lisusu lokola na ebandeli!

³²² Sikawa, na mosala ebongi be ya Ye moko; moto moko te, ebongiseli moko te, ndenge basalaki na bileko yango kuna, bomoni; kasi Ye moko amitalisi, Azali komitalisa Ye moko kokokana na elaka, kosala ete Santu Luka 17:28, Malaki 4, pe bongo na bongo, Baebale 13:8, ezali ya solo mpenza. Na ntango yango, ekozala ntango nini? Ntango Momboto mokonzi ya Abalayama ezali kozela Mwana na elaka. Pe bilíngi nyonso esengeli kokokisama. Pe Nzambe Ye moko amonanaki na lolenge ya moto, epai na momboto ya nzoto ya Abalayama, liboso na kobebisama; pe Yesu alobaki ete ekosalema motindo moko mpo na Momboto mokonzi oyo liboso Mwana na elaka ázonga lisusu.

³²³ Botala ezipelo ya kala oyo ezalaki kobómba Nkembo. Bamposo ya gambala ya kala, ezalaki kitoko te mpo na kosepela na yango; nzoto na Ye pe ndenge moko. Yango wana bato balobaki: “Moto Moke oyo mokongo egumbámá boye?” Azalaki ntango mosusu na mibu ntuku misato, ná suki pembe, ná mandefu na Ye pembe, azalaki ata kitoko ya kotala te. Biblia elobi: “Azalaki na kitoko te ete tósepela na Ye.” Azalaki lokola Mokonzi te, mposo ya gambala ya kala, kasi, oh, eloko oyo ezalaki na kati!

324 Pe etónge moke ya “batúntuki” baoyo bafandi esika moko kati na ndako ya molunge boye, babengaka bango bongo, bazali na kitoko te mpo na kosepelisa bato, kasi eloko oyo ezali na kati! Nandimisami ete ezipami liboso na mitema mingi, bomoni. Bomoni? Malamu.

325 Na libanda Ezalaki eloko te, kasi nyonso ezalaki na kati. Soki okoti kati na Yango, bongo okomona Yango. Bakotaka Kuna ndenge nini; na mbote ya loboko, na komikitisa? Te. Babótamaka kati na Yango. Kokufa, kolongola mposo ya gambala ya kala, bomoni, ngai na yo ya kala, mpo na kokota na oyo ya sika. Bomoni? Kosundola mposo ya gambala ya kala.

326 Pole ya Shekinah . . . Boyoka, batei! Batei, nalingi ete bóyoka Likambo oyo. Soki osili kokota na kati . . . Sikawa nakokómisa yango pètè mpenza, mpo bókoka mpenza kososola Yango. Soki osili kokota kati na ezipelo, na nse ya Nkembo ya Shekinah, Pole ya Shekinah ezuaka Liloba na Nzambe te mpo na komonisa Yesu lokola “moto na solóka”, te, ndenge bibongiseli bazali kosala lelo, “télépathie, batúntuki, Belezebúla”. Nkembo ya Shekinah emonisaka Ye bongo te.

327 Kasi Nkembo ya Shekinah ékomelisaka Momboto oyo elakamaki mpo na eleko yango, ya Liloba, kotalisa Ye bobele lokola Lísí ya Lobwakú. Etalisaka Momboto yango, Lísí ya Lobwakú, Lipa ya Bomoi, Alifa pe Omega, motindo moko lobi, lelo pe libela. Azali eteni ya bandimi. Nkembo ya Shekinah emonisaka, na mondimi, ete Azali motindo moko lobi, lelo pe libela.

328 Ezali te: “Mikolo, Asílá koleka, Akufaki pe likambo esílá.” Na bongo moninga, soki ondimaka bongo, soki ondimaka bongo, okútáná naino na Nkembo ya Shekinah ata moke te. Ndenge nini Nkembo ya Shekinah ekoki komonisa Ye kati na bato misato? Bomoni? Ndenge nini Nkembo ya Shekinah ekoki komonisa Ye na kobatisa bato na nkombo ya “Tata, Mwana pe Molimo Mosanto,” ntango oyo ata moto moko te na Biblia abátísámá bongo? Ndenge nini Nkembo ya Shekinah ekoki koloba ete Asalaki bobele na ntóma moko, ntango oyo Azali motindo moko lobi, lelo pe libela? Bomoni?

329 Nkembo ya Shekinah etalisaka Ye. Ememaka Liloba ya elaka, sémba liboso na bino. Yango wana Asengelaki kozipa elongi ya Mose, mpo Liloba ezalaki kati na ye. Azipaki Yesu, lokola mwa Moto moko ya komikitisa, mpo bákoka komona Yawe te. Pe Amizipi lelo, kati na ba-mbeki ya mokili, ná Shekinah. Na libanda bazali lokola etónge ya batúntuki, ba-mposo ya gambala ya kala, kasi na kati ezali kobomba Nkembo ya Shekinah.

Ezali kokomelisa Lipa ya kolakisama, oyo tozali kosepela na yango, pe, tozali kokende na ekólo mobimba na motuka, na ntáká ya ba-kilometre nkama na nkama, bomoni? Ezali Bilei

ya bandimi. Ezali bobele mpo na mondimi. Bomikanisela, Lipa ya kolakisa ezalaki bobele mpo na mondimi kaka, bomoni, Momboto-Lipa ya kolakisama. Botala. Esalaka nini? Nkembo ya Shekinah yango, likolo na Lipa ya kolakisama, esalaki ete Ebeba te.

³³⁰ Bomikanisela, mána oyo ezalaki kouta na Likolo, ezalaki kobatelama kati na Nkembo ya Shekinah, na ekeke moko kino na mosusu. Na libanda, ba-nkusú ezalaki kokota kati na yango, na butu moko, ezalaki kopola. Boye te? [Losambo balobi: “Amen.”—N.D.E.]

³³¹ Libanda na Nkembo ya Shekinah, “Ntango ya bikamwa esílá koleka. Bomoni, nyonso wana ezali bilandálanda.” Kasi na kati. . .

³³² Botala, bamoni ba-mbuma ya felele ya tournesol na kati ya ebómbelo ya mbuma na Ezipito, oyo etiamaki kuna na mikolo ya Yosefe, eleki pene na mibu nkoto minei. Yosefe nde atiaki yango kati na ebombelo. Balonaki yango. Etoyaki. Mpo na nini? Ezalaki na bomoi.

³³³ Nkembo ya Shekinah oyo ezali nini lelo? Kokota na ngámbo mosusu ya ezipelo, mpo na komona Nani Nzambe azali, liboso na bino, komona Nani Nzambe azali, awa liboso na biso, li—Likonzi na Móto. Azipami kati na nzoto ya moto. Kasi Shekinah ezali kosala nini, esalaki nini? Momboto-Lipa ya kolakisama, Liloba oyo tosendeli kobika na yango lelo, na nzela ya bilaka oyo, Nkembo ya Shekinah ezali kokomelisa Lipa ya kolakisama yango, kokokisama na yango, kokómisa yango Lipa mpo na mondimi; ezalaki na nkasa ya Biblia, mobú sima na mobú, Liloba mpo na eleko oyo.

³³⁴ Mpo na bibongiseli, Ezali libanga ya libaku. Mpo na bibongiseli, bazali kobeta libaku likolo na Yango. Na mibu nyonso wana, Luther, Wesley, Martin Luther, pe bango nyonso, Sankey, Finney, John Smith, Knox, bango nyonso babetaki libaku likolo na Yango.

³³⁵ Kasi eloko nini esengeli kosalema na ntango ya suka? “*Komonisa*” ezali nini? “Kotalisa!” Malaki 4 asengeli kosala nini? Kobóngola bato longwa na libanga ya libaku wana, kobuka mimesano, pe komonisa Lipa na nzela ya Nkembo na Shekinah. Botala ndenge Ezali kokomela pe kobimisa mpenza eloko oyo Elobaki ete Ekosala, oh! la la! Lipa ya kolakisama mpo na eleko oyo. Mpo na bibongiseli, libanga ya libaku, “etóngá ya bilandálanda.” Kasi, biso baoyo tondimi!

³³⁶ Kasi sikawa, ndenge Emoniseli 10 elakaki: “Mabombami nyonso ya Nzambe, oyo ebombamaki na nkasa na mibu nyonso wana, ekokomela, ekotalisama na eleko ya Nsango ya mwanje na nsambo.” Boye te? [Losambo balobi: “Amen.”—N.D.E.]

Alobaki nini, eleki mobu moko na sanza motoba, elingi kokokisa mibu mibale sikawa? “Kende na Tucson; okozala na

nordi ya Tucson, lokito ya makasi,” pe eloko ekosalema ezali ete, “Bilembo ekofungwama,” Bilembo oyo ekomisa makambo oyo. Nazongaki, bobele ndenge Alobaki.

Ezali nini? Elakisi ete Ekoki kozala moto te. Ezali mpenza bongo, sémba mpenza, ntango nyonso. Ezali nini? Ezali loboko na Nzambe, bomoni, liboso na biso. Pe lokola ezali kati na etónga moke, ezipami kati na nzoto ya moto, ezipami mpo na bato ya libanda. Abombami na miso ya bato ya libanda. Azali komimionisa na bana mike, baoyo balingi koyekola. Bomoni? Ya solo.

³³⁷ Nyonso, bomoni, masese nyonso kati na Biblia, bilíngi nyonso kati na Biblia, etalisami awa liboso na biso. Nzambe yango moko, kati na Likonzi na Móto, oyo akomaki Biblia, Kondimana ya Kala ná ya Sika, azali mpenza awa, kotalisa Yango, kolakisa mpenza makambo mazalaki, kolimbola yango mpenza, pe kotatola ete yango nde mpenza ndimbola.

³³⁸ “Biso tozali na ndimbola!” Na bongo, tómona yango kokokisama. Bomoni, ezali yango, tómona yango kotalisama.

³³⁹ Kotalisama! Yesu alobaki: “Soki Nasali misala ya Tata na Ngai te, bóndimela Ngai te.” Bomoni, esengeli kotalisama polele.

³⁴⁰ Kasi sikawa—sikawa, kotalisama lokola Yesu te, wana bazíngaki e—elamba na motó na Ye pe babetaki Ye na motó, balobaki: “Soki Ozali Mosakoli, yebisa biso nani abeti Yo.” “Pe soki Ozali Mwana na Nzambe, bongola mápa oyo.” Bomoni, oyo wana ezali zabolo. “Soki Ozali Mwana na Nzambe, kitá na ekul- . . .”

³⁴¹ Nalingi koloba, Emoniseli oyo Asengeli kosala, ezali nde Yango. Kasi sikawa, lokola Emoniseli 10 emonisami, mabombami ya Nzambe etalisami polele, eyebani, ndenge Buku ya Bilembo Nsambo elakaki.

Sikawa, tika ete kondima na bino kati na Ye Oyo azali Liloba . . . Mpamba te, na Emoniseli 10, elobami . . .

³⁴² To, nde, na Emoniseli 19. Nakomáki yango awa, Emoniseli 10, ete tokotánga yango; kasi ezali 10 te, ezali nde 19. Ntango Akoya, Akobengama “Liloba na Nzambe”, komata likolo na mpunda ya pembe, pe balandi ya Likolo bakozala sima na Ye.

³⁴³ Bóbúka ezipelo ya ebongiseli ya mayele ya kelasi! Bóbúka ezipelo ya ebongiseli ya mimesano! Bóbúka bizipelo oyo ezali kopekisa bino komona Ye! Bóbúka bizipelo yango ya lolendo, bino basi. Bozali—bozali bana-basi ya Mokonzi; bólakisa yango na bizaleli, bólakisa yango na bomoi. Bóbuka bizipelo nyonso, ata Docteur na Philosophie pe na Droit alobi nini. Soki ekesani na Biblia, búka ezipelo yango!

Mpamba te, tosíli kokatisa ezipelo epasuká. Tozali sikawa na ngámbo mosusu, na ngámbo mosusu. Pe bokomona, soki bokosala yango mpenza, soki bokobuka mimesano yango ya

kala pe nyonso mosusu, pe boyei epai na Ye, bokomona Ye kotelema, Molongi na Nguya, Liloba ya elaka mpo na eleko oyo, kotalisama. Bokomona Nzambe na Nguya azipolami, bokomona Ye kati na biso awa, azipolami, Nzambe na Nguya, alongami na mimesano te.

³⁴⁴ Bamekaki kobomba Ye kuna na sima; basalaki yango, na mibu eleki, kasi ntango ya elaka ekómaki pene. Nzambe atelemisaki Mose na ntango moko, pe akangolaki bana na makambo wana. Pe Azali kino lelo... Akoki kolongama te. “Likolo pe nse ekoleka, kasi Liloba na Ngai te.” Azali motindo moko lobi, lelo pe libela.

³⁴⁵ Balobaka: “Ekoki kosalema te.” Kasi esalemaki. Na sima, ntango esalemaki, balobaki: “Euti na zabolo.”

³⁴⁶ Kasi ebongolaka Liloba na Nzambe ata moke te. Ezali bobele “Nzambe”, mpo na mondimi, “Molongi na Nguya; motindo moko lobi, lelo pe libela,” na lolenge na Ye, na Liloba na Ye, Baebele 13:8.

³⁴⁷ Nakosilisa na koloba boye, mpo etikali miníti mitano liboso na midi, nakoloba bobele boye. Natikali na nkasa pene na zomi to zomi na mibale. Nakolobela yango mokolo mosusu, ntango mosusu na mpokwa.

³⁴⁸ Botala, botala awa. Mokolo moko, bazalaki koteka biloko, pe bazalaki na lindanda moko ya kala. Boyóká yango mbala mingi. Lindanda moko ya kala; pe motéki atunaki: “Bokopesa ngai ntalo boni mpo na yango?” Ntango mosusu nakoloba yango mpenza ndenge esalemaki te, kokokana na poeme. Eleki mibu mingi, mingi mpenza, kasi eyeli ngai na makanisi. Bazuaki lindanda yango, pe ezalaki mpenza kitoko te; ezalaki na bosoto, pe nyonso wana. Akokaki ata kosómbisa yango moto te. Sukasuka, nakanisi balingaki kosomba yango na dollar moko, to eloko moko ya ndenge wana.

³⁴⁹ Pe moto moko azalaki wana oyo amonaki ete esengelaki kotekama na ntalo wana te, na bongo abelemaki pe azuaki yango. Asimbaki yango na maboko, azuaki ebételi, apakolaki yango colophane pe abetaki miziki na yango. Pe, esalaki ye bongo, bango nyonso babandaki kolela. Bayóká naino miziki ya ndenge wana te na bomoi na bango.

Bongo moteki atunaki: “Bokopesa ngai ntalo boni?”

³⁵⁰ “Nkóto mibale!” “Nkóto mitano!” “Nkóto zomi!” Bomoni? Ezalaki nini? Loboko ya ngangamonene emonisaki eloko nini ezipamaki kati na nzenze wana ya kala.

³⁵¹ Motindo moko sikawa! Buku oyo ya kala, Enuní, basekaki, batumbaki, batiolaki Yango. Kasi ntango esiki kokoka oyo bazali koteka na zando ya bibongiseli, Likita ya Mangomba ya Mokili mobimba. Bazali koteka Yango lokola eloko oyo etali moto moko te. Zando moko ya bibongiseli ezali koya.

³⁵² Kasi, bomikanisela, eloko moko ezali kati na Buku yango ya kala, oyo elakaki ete ekozala na loboko moko eponámá pe ebongisámá liboso, oyo ekoya kozua Yango mokolo moko pe ekosala ete Liloba ya Buku oyo, na nzela ya motema ebongisámá, mpo na ntina oyo Yango esalámá, ekomonisa bilaka oyo ezali kati na Yango. Ekoki komonana, oh, lokola mwa etónge moko ya batúntuki, to eloko moko ya ndenge wana; kasi esengeli bobele loboko ya Nganga-monene, Liloba likolo na Yango, mpo na komonisa Liloba yango, pe ekokoma koleka motúntuki. Esili kokoma bongo mpo na moko na biso, boye te, bancinga? Ezali etónge bilandálanda te. Etali nde loboko ya Nani esimbi ebételo.

Tóbondela.

³⁵³ Tata na biso na Likolo, na kondima, lelo, namoni Nganga-monene ya Buku ya kala, oyo basundolaki mpo na kozua mimesano. Basundolaki Yango mpo na kozua bibongiseli. Bamekaki kotéka Yango. Sikawa bazali koteka Yango mpo na kozua li—Likita ya bato ya Mokili mobimba, ya mangomba, ba-communiste, ba-athée. Biloko ezali kotekama, Nkolo.

³⁵⁴ Nzambe, béléma! Na ntembe te, Okosala yango. Tindela biso mosakoli yango, Nkolo, oyo akozua ebetelo yango, oyo akozua Liloba oyo mpo na kotalisa polele ete Yesu Klisto azali motindo moko lobi, lelo pe libela. Bato mingi, Nkolo, bakoteka bomoi na bango, bakobwaka mimesano na bango ya kala, bakobuka bizipelo. Bazali na mposa na Yango, Nkolo. Bakopesa nyonso, nyonso, mpo bápesa bango Yesu.

³⁵⁵ Nkolo, nakanisi ete Otalisi bango Yango polele sikawa. Bauti bipai na bipai. Babebisi misolo na bango. Basalaka nyonso, mpo bákoka kokóma na mayangani, mpo na kosala nyonso bakoki kosala, mpo bamoni Mayaka yango ya motuya monene. Makambo mosusu ezali mpenza na motuya te. Pambola bango, Tata.

³⁵⁶ Likolo na eteyelo oyo, na ntongo oyo, Nkolo, miswále ezali awa. Ntango mosusu bamosusu basengeli kokende lelo, liboso na liyangani ya kobondela mpo na babeli ya mpokwa. E Nzambe na Seko, kitisa miso na nse. Nayebi ete Ozali awa, Ozipami. Pe nazali kotinda bizipelo ya mike oyo, Nkolo, oyo ebengami “miswále”, pe “bilamba” ya mike ná “basapato” ya mike, ya babebé. Nazali kotinda yango lokola bilembo ya ezipelo, ete Liloba na Yo esili koteyama likolo na yango na ntongo oyo, pe, lokola mondimi, natieli yango maboko na ngai, nzoto na ngai, kotalisa ete nandimi Yango. Pe, na kondima, moto moko na moko na ndako oyo andimi ndenge moko, Nkolo. Tika ete babeli bábika.

³⁵⁷ Okoki kosimba li—Liloba awa, Nkolo, ndenge mobetlindanda asimbaki lindanda, sala pe bongo, Nkolo. Sala ete ébeta malamú, wana loboko ya Nganga-meme esimbi ebételo, na ntango wana nde tokomona Ye kotelema wana polele mpenza.

³⁵⁸ Likanisi oyo eyelaki bato wana mokolo wana, ntango baboyaki kopesa motuya, ntango bapesaki motuya moko te mpo na lindanda ya kala. Balingaki yango te. Baboyaki kozala na yango na ba-ndako na bango. Kasi ntango moto oyo ayebaki kobeta nzenze yango azuaki yango, na ntango wana batekaki nyonso bazalaki na yango, mpo na kosomba yango. Bakómaki koswana pe kobunda mpo na yango. Wana ntango esilaki koleka.

³⁵⁹ Ekosalema pe bongo mokolo moko, ntango Kelelo ya Nkolo ekoyula, ntango ekozala lisusu te. Baoyo bazalaki kotalama na nsonge ya miso pe kotioluma, baoyo bazalaki wana, liboso na ezipelo ya kofungwama pe bamonaki Liloba na Nzambe kotalisama (*bamosusu* bakoganga mpo na kozua Yango, kasi, ndenge Olobaki: “Ntango yango, ntango ekosila koleka”), bango bakotaki na Fêti ya Libala; pe *bango* batikalaki libanda, epai kolela, kokimela pe kolia mino ekozala.

³⁶⁰ Sungá moto nyonso ete ándima, na ntongo oyo, Tata; búka bizipelo nyonso ya moyimi, bizipelo nyonso ya kozanga kondima, mpo na komona Molongi na Nguya azipolami liboso na bandimi. Mpamba te: “Tala, Nazali elongo na bino ntango nyonso, kino na suka ya mokili. Etikali moke bamokili bakomona Ngai lisusu te, kasi bino bokomona Ngai.” Mimonisa kati na biso, Nkolo, ndenge Osalaka. Pe tikala ndenge wana, kino tokomónana mpenza liboso na Yo, ntango en morphe ebongwanaki, pe Okómaki lisusu Mwana na moto, pe Mwana na Dawidi. Kokisa yango, Nkolo, na Nkombo na Yesu Klisto.

Wana togúmbi mitó, biso nyonso tózala kati na kobondela.

³⁶¹ Nazali komituna lelo soki ezali na bato awa oyo . . . na kati to libanda. Makoki ya kobenga bato awa na etumbelo ezali te, mpo esika ezali te. Kasi nazali komituna, na bosembo nyonso, bondimi ete oyo ezali Solo? Ntango oyo tozali kobika kati na yango, ná mobulu nyonso oyo, pe na eleko ya zebi lokola na eleko ya Nowa, na eleko ya Mose, na eleko ya Klisto, bondimi ete Nzambe, Tata na nkembo mpo na biso nyonso tobótami kati na Ye, azali elongo na biso lelo oyo?

³⁶² Likonzi na Móto oyo ezali komonana na miso pe etalisami polele na zebi, eleki mibu mingi, ntango nazalaki mwana moke, esololaki na ngai kuna pe elobaki na ngai ete nakobika mpenza awa, pe makambo oyo ekosalema. Nayebisaki bino yango, na sima Yango . . . Mokolo moko kuna na ebale, liboso mosala oyo ébanda, na kolamuka ya liboso, Amonanaki na likolo, Amitalisaki pe Apesaki etinda. Kati na mibu nyonso oyo, nabombaki yango na motema na ngai, nazipaki Klisto, Likonzi na Móto yango moko ezali kolimbola Liloba, ndenge elakamaki. Tokómi na ntango ya suka, na Boyei na Nkolo. Pe soki omoni ete ozali libanda na ezipelo yango, pe kozala na libanda ezali kufa, olingi koloba, na kondima, na ntongo ya lelo: “Na lisungi na Nzambe. Na lisungi na Yo, Nkolo, nalingi koleka na nzela ya

ezipelo yango. Nalingi kokoma esika Yo ozali, mpo na komona Liloba mobimba ya Nzambe”?

³⁶³ Koluka kozala Mose te. Koluka kozala Aaron te. Te. Zalá bobele oyo yo ozali, kasi zalá Moklisto.

³⁶⁴ Wana bogumbi mitó, bolingi kotombola maboko epai na Nzambe, pe koloba: “Nkolo Nzambe, sungá ngai ete nákota kati na ezipelo”? Nzambe ápambola yo. Nzambe ápambola yo. Ezali, bótala maboko!

³⁶⁵ Na libanda kuna, bomikanisela, ntango mosusu namoni loboko na yo te. Ata bongo, ezali—ezali mpenza na ntina te ete námona yango; ezali mpo na Nzambe. Ezali bobele, mpo na ngai, ezali bobele mpo námona ete mo—Momboto ekweaki esika moko, pe, kasi Nzambe azali komona motema ya solo.

³⁶⁶ Soki bamosusu bazali baoyo batombolaki maboko te, baoyo balingi kotombola yango sikawa, botombola maboko mpo tókanisa bino na libondeli. Bótómbola maboko. Nzambe ápambola bino. Ezali malamamu. Nzambe ápambola bino.

³⁶⁷ Tata, tobondeli lelo mpo na bato, Nkolo, baoyo baleki naino na ngámbo mosusu ya ezipelo yango te. Bazali kuna, lokola Yisalaele; bazali kotala malamamu. Bandimi, kasi naino bakoti Awa te, mpo na komona Pole monene ya Shekinah, ya molimo pe ya mokili, mpo liso ya appareil ya fotó ezali kokoba kokanga yango fotó; eleki bobele mposi mibale, bakangi Yango fotó lisusu. Ozali komimonisa, Nkolo, Nzambe na Nguya azipolami mpo na mondimi; Azipami naino mpo na mozangi-kondima, kasi azipolami mpo na mondimi.

Tika ete bákota na kati lelo, Nkolo, bámona kongenga monene pe Nkembo na Ye. Tika ete mitema na bango ébongwana liboso na biso kozonga lisusu na losambo oyo na mpokwa. Tika ete bango nyonso bátondisama na Molimo na Yo, na Bozali na Yo. Tika ete Nganga-monene ázua kondima oyo bazali na yango, Ásimba-simba yango na Liloba; tika ete loyembo ézongela bango: “Osílá kobongisama, liboso na kozalisama ya mokili, mpo na kondima Likambo oyo. Ndimá, mwana na Ngai, pe bikisama.”

³⁶⁸ Tata, Nzambe, topesi bango na maboko na Yo sikawa, koyeba ete eloko mosusu koleka oyo tokoki kosala ezali te. Nyonso ezali sikawa na maboko na Yo, Tata. Napesi Yo bango. Na Nkombo na Yesu Klisto, Mwana na Yo. Amen.

Nalingi Ye, nalingi Ye
Mpo . . . lingaki ngai liboso
Pe Asombi lobiko na ngai
Likolo na Ekulusu.

³⁶⁹ Bolingi Ye? [Losambo balobi: “Amen.”—N.D.E.]

Malamu, malamu, Yesu mpo na ngai,
 Mopesi toli, Mokonzi na Kimia, Nzambe na
 Nguya;
 Abikisi ngai, Abateli ngai na lisumu pe na
 nsoni,
 Mosikoli na ngai azali malamau, nkembo na
 Nkombo na Ye!

Nabungaki, Amoni ngai, kokweisama esili,
 Yesu apesi bonsomi pe lobiko na mobimba;
 Abikisi ngai, Abateli ngai na lisumu pe na
 nsoni,
 Mosikoli na ngai azali malamau, nkembo na
 Nkombo na Ye!

Oh, malamau, malamau, Yesu mpo na ngai,
 Mopesi toli, Mokonzi na Kimia, Nzambe na
 Nguya;
 Oh, Abikisi ngai, Abateli ngai na lisumu pe na
 nsoni,
 Mosikoli na ngai azali malamau, nkembo na
 Nkombo na Ye!

³⁷⁰ Bato boni bamoni Ye wana, Molongi na Nguya, Liloba ekómi
 nzoto, ezipolami liboso na biso; Alífa pe Oméga; Ye oyo Azalaki,
 Azali pe Akoya; Mosisá pe Mwana na Dawidi; Azali Mwana na
 moto, Mwana na Nzambe, Mwana na moto, pe Akozala Mwana
 na Dawidi? Bondimi Yango na motema mobimba? [Losambo
 balobi: “Amen.”—N.D.E.] Azali komizipola na eleko moko na
 moko, Amitalisi mpo na mondimi, Amizipi kati na nzoto ya moto
 mpo na mozangi-kondima. Abombami sima na ezipelo. Tika ete
 Nzambe ábuka bizipelo nyonso, mpo tómona Ye ndenge Azali!

Yesu abuki minyololo nyonso,
 Yesu abuki minyololo nyonso,
 Oh, Yesu abuki minyololo nyonso,
 Ntango Apesi yo bonsomi!

Na ngámbo mususu ya Yaladene,
 Na zamba kitoko ya Edene,
 Epai Nzete na Bomoi eboto felele,
 Kuna nde kimia ezali mpo na ngai.

Yesu abuki . . .

Olingi te kokatisa Yaladene sikawa? Tolekisi ntango molai na
 biliki, boye te? Tókende na ngámbo ya bilaka!

Yesu abuki minyololo nyonso,
 Yesu abuki minyololo nyonso,
 Oh, ntango Apesi yo bonsomi!

³⁷¹ Tótombola maboko sikawa.

Nakokumisa Ye ntango nyonso mpenza,
 Nakokumisa Ye ntango nyonso mpenza,
 Nakokumisa Ye ntango nyonso mpenza,
 Mpo Apesi ngai bonsomi!

³⁷² Amen! Esali ete bómiyoka malamumu, boye te? [Losambo balobi: “Amen.”—N.D.E.] Oh, malamumu mpenza! Na bongo, Azali mpenza malamumu, boye te? Tópesana mbote ya loboko bamoko na bamosusu sikawa, wana tozali koloba:

Yesu abuki minyololo nyonso,
 Yesu abuki minyololo nyonso,
 Oh, Yesu abuki minyololo nyonso, (Nzambe ápambola yo, ndeko.)
 Oh, ntango Apesi yo bonsomi!

Nakokumisa Ye ntango nyonso mpenza,
 (Nzambe na Nguya)
 Na... (“Ndenge moko lobi, lelo pe libela,”
 Abongoli bobele lolenge)... kumisa Ye,
 Nakokumisa Ye ntango nyonso mpenza,
 Mpo (Alongoli bindimeli nyonso na kati na ngai) Apesi ngai... (mpo nándima Liloba na Ye).

³⁷³ Oh, bozali koyoka ndenge Lindanda ya Nganga-monene, ndenge ebetelo ezali koleka na Liloba oyo, boye te? Azali ndenge moko lobi, lelo!

Nakokumisa Ye ntango nyonso mpenza,
 Nakokumisa Ye ntango nyonso mpenza,
 Na... (Ye, Liloba!)... kokumisa Ye ntango
 nyonso mpenza, (Asali nini?)
 Mpo Apesi (sima na ridó) ngai bonsomi!

³⁷⁴ Nzambe ákumama! Nalingi Ye. Bolingi Ye, boye te? [Losambo balobi: “Amen.”—N.D.E.] Oyo ezali ya Likolo te? [“Amen.”] Nasepelaka na misala wana ya Liloba, bomoni, Molimo Mosanto na lolenge ya bopolo pe ya komikitisa. Na—nasepelaka na Yango mpenza. Oh, bokanisa naino!

Na ngámbo mususu ya Yaladene, (etikali moke nákóma wana sikawa)
 Na... kitoko (oyo ekufaka te) ya Edene, ...
 (Nakomona nini kuna?)
 Epai Nzete na... (oyo ezalaki na elanga ya Edene) ebote felele,
 Kuna nde kimia ezali mpo na ngai.

³⁷⁵ Bolingi kokende kuna? Ye moto abukaka minyololo nyonso.

Yesu abuki (mimesano nyonso) minyololo nyonso,
 Yesu abuki minyololo nyonso (bibongiseli nyonso, bindimeli nyonso),

Abuki minyololo nyonso,
Pe Apesi yo bonsomi!

376 Nzambe ákumama! Nalingi Ye mingi. Kokamwa te ndenge Yisaya alobaki: “Azali Mopesi toli, Mokonzi na Kimia, Nzambe na Nguya, Tata na Seko, Malamu!”

Malamu, malamu, Yesu mpo na ngai,
Mopesi toli, Mokonzi na Kimia, Nzambe na
Nguya;
Oh, Abikisi ngai, Abateli ngai na lisumu pe na
nsoni,
Mosikoli na ngai azali malamu, nkembo na
Nkombo na Ye!

377 Oh! la la! Eningisi motema na ngai. Azali mpenza malamu! Boyoka, Oyo ezalaka na suka te! Nakótá kati na Yango eleki mibu ntuku misato na misato, namiyokaka boye. Pe soki Aumeli, mokolo moko nakokanga miso, pe nakokende bobele ndenge moko. Amen!

Malamu, malamu, Yesu mpo na ngai,
Mopesi toli, Mokonzi na Kimia, Nzambe na
Nguya nde Ye;
Abikisi ngai, Abateli ngai na lisumu pe na
nsoni,
Mosikoli na ngai azali malamu, nkembo na
Nkombo na Ye!

378 Nakoki kotikala awa moi mobimba, kati na Yango. Polo alobaki: “Soki nakoyemba, nakoyemba na Molimo.” Iyo. “Soki nakoteya, nakoteya na Molimo. Soki nakotambola, nakotambola na Molimo. Soki nakoloba, nakoloba na Molimo.” Tika ete nyonso ésalema na Liloba pe na Molimo. Iyo, misie. Amen! Nyonso wana ezali Solo ya Nzambe.

379 Namoni Ye, Nzambe na Nguya, azipolami. Namoni Ye kolongola bindimeli ná bibongiseli; kolongola nte—ntembe, manaka ya kelasi, pe nyonso wana; koya kotelema wana. Bokanisi ete bindimeli ekoki kolonga Ye? Bokanisi ete bibongiseli ekoki kolonga Ye? Bokanisi ete Likita ya Mokili mobimba ekoki kolonga Ye? Alongaki biloko nyonso, Abukaki minyololo nyonso, Apasolaki pe Afungolaki ewélo; Abukaki elembo, Akotaki na Ésika eleki búle; Amizipoli epai na biso, lokolo Liloba, ndenge moko lobi, lelo pe libela. Amen. Nalingi Ye.

380 Sikawa, liboso tókutana na mpokwa ya lelo, tolingi kosala likambo moko, ezali:

Mema Nkombo na Yesu,
Mwana na mawa pe bolozi;
Ekopesa yo esengo pe libondisi;
Oh, mema Yango bisika nyonso okokende.

Nkombo kitoko, O ya boboto!
 Elikia ya mokili pe esengo ya Lola;
 Nkombo kitoko . . . (Iyo, nasili kozua
 yango.) . . . O ya boboto!
 Elikia ya mokili pe . . . (. . . ? . . .)

³⁸¹ Soki Satana aluki komeka yo, ete ozali kotala eloko oyo esengeli te, lakisa ye Liloba, ndenge Yesu asalaki. Bomoni? Bomoni? Amen!

Tokogumbamela Nkombo na Yesu,
 Tokofukama na makolo na Ye,
 Na Lola, tokolatisa Ye motóle ya Mokonzi na
 bakonzi,
 Ntango mobembo na biso ekosila.

Nkombo kitoko, Nkombo ya boboto!
 Elikia ya mokili pe esengo ya Lola;
 Nkombo kitoko, O ya boboto!
 Elikia ya mokili pe esengo ya Lola.

³⁸² Billy akozala awa, na pene ya ngonga ya motoba, akokabola bakálati ya mabondeli mpo na baoyo balingi kokota na molongo ya mabondeli. Nabanzi ezali malamú ete tósala yango. Tolingaki kosala yango te, kasi, lokola bato bazali mingi, ezali malamú ete tósala yango, bomoni.

³⁸³ Sikawa bókanisa Ye! Bókanisaka Ye ntango nyonso, na mitema na bino. Bisika nyonso bokokende, bomoni, bókanisaka Yesu.

Mema Nkombo na Yesu (sikawa yoka),
 Lokola nguba liboso na motambo nyonso; (nini
 ekosalema?)
 Wana masenginia mazingi yo, (osengeli kosala
 nini?)
 Loba bobele Nkombo Mosanto wana na
 libondeli.

Nkombo kitoko, Nkombo kitoko; O ya boboto!
 Elikia ya mokili pe esengo ya Lola;
 Nkombo kitoko; O ya boboto!
 Elikia ya mokili pe esengo ya Lola.

³⁸⁴ Sikawa tógumba mitó. Nakosenga na mokengeli soki akoki koya kosilisa liyangani. Ndeko Neville, Nzambe ápambola yo, Ndeko Neville.



KOZIPOLAMA YA NZAMBE LIN64-0614M
(The Unveiling Of God)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na ntongo, mokolo mwa 14, sanza ya motoba, na mobu 1964, na Branham Mongombo, na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2016 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org